

NOCAA TEHUE CANAJE ESOHUI QUEA BAME NEE JESOSA QUITOJA LUCAS

¹ Eyaya mi que tehuenaje Teopino achajja Jesosa ebajji. Quea dejja huisohua Jesusaja ehuhui'yo cuanajo tehue sa aca cua, huohui mee sa aca cua pea'ai. ² Ojaya epeeji cuaa, ojaya esohui huohuijji cuaa, Jesosa ba neinei ca cua. Ohuaya ecuanaya huohui neinei ca cua. ³ Jamajjeya eyaya catehue'yahua onaa huohui ca'yoqui Jesusajo. Jjeya eyaya mi que tehuenaje, Teopino. Jiquio esohui e'e jojo nei Jesusajo. Eyaya shajja'ajja neineinaje onaa huohui ca'yoqui Jesusajo. Majoya jjashahuaba neineiquinaje jiquio etehuejji, jamajjeya e'e jojo nei jiquio esohui. ⁴ Tehuenaje eyaya miquea Jesosa eba neineiiji. Mi jjashahuaba neineiquijji eyaya tehuenaje, de. Jamajjeya jba neineicue jiquio esohui ecue tehue'yo!

Oe esohuidojojjiya Sacania huohui ca cua bacuajji cuajo, Huani ona besameejji epojji cuaje

⁵ Yahujajo pishana Jodioja emeshi mese nequia cua. Yohua bajjani cua ba'a: Enode. Ma eshequiajajo tiya aje ba'ya cua Eyacuiñajji nijje mimiani yohua bajjani ba'a: Sacania. Oya chacochoconia cua Eyacuiñajji nijje emimijji cuana nijje, ma dejja yohua bajjani nijje ba'a: Abiase dejja cuana nijje. Oya cuana Eyacuiñajji nijje mimiania cua. Sacaniaja ehuanase yohua bajjani cua ba'a: Isameni.

Isamenija etiiquiana cuana Eyacuiñajji nijje mimi-
ani pea'ai cua. Anoni dejja bajjani cua. ⁶ Sacania
Eyacuiñajjija epeeji nei nei cua, oja huanase o
jayojja nei neiya cua. Oya cuaa shajja'ajja neinei
ca cua Eyacuiñajjija esohui. ⁷ Jamatii bacuama'
cua; ojaya ehuanase jjamejoqui ajja neinei cua.
Ehuanase epona tii cua; oya edejja tii pea'ai cua.

⁸⁻⁹ Pea pojajo Sacania jjachichaquia cua Ey-
acuiñajji nijje emimiji cuana nijje. Pea cuaa oya
jama aca cua ba'a: —Sacania, ijyeya jiquio pojajo
Eyacuiñajji nijje mimicue! ¡Jyehua nei mee nei
dobiqicue Eyacuiñajjija equi yasijje, equi que-
cuayiji sisi yasijje! ¡Dobiqui majje acui shaa dahua
huichachajeacue huichacha shiye epojji! ¡Ma oj-
jaña aca cua jayojjaya oe acue!

Dobiqui majje Sacaniaa jamaya aca cua Ey-
acuiñajjija equijo nequiya. ¹⁰ Beca cuana aje
oe esecuejo nequia cua Eyacuiñajji nijje emimi-
jji pea'aiya. ¹¹ Sacaniaa aje oe acui shaa quea
shiye dahua huichachajea canequia cua acui
shaa edahuajeajji biajje iya ani. Majoya aje oe
Eyacuiñajjija esohuidojojji jjanequiya'acquia cua,
edahuajeajji ebañei mijijje nequia cua. ¹² Sacania
esohuidojojji ba majje piopio neinei'ya cua es-
ohuidojojji ba po jjima jjejojya. ¹³ Majoya aje oe es-
ohuidojojjiya jama aca cua ba'a: —Sacania, ja'a pi-
opiojji! Miya Eyacuiñajji nijje mimi majamajanaje
ebacua yajjijo. Jamajyeya miya Eyacuiñajjiya
shajja'ajja canaje miquea esohui ebacua yajjijo.
Miquea ehuanase aje oe jjamejoquije. Majoya
¡ebacua cuayajo Huani bajjani acue! ¹⁴ Miya o
cuayajo quea bihui nee nee cuaje. Pea dejja cua-

naya quea bihui nee nee cuaje e bacua cuayajo. ¹⁵ Oya Eyacuiñajjija epeeji nei nei cuaje, jamajjeya miqúanaya quea bihui nee cuaje. Oya acuijjajja na sese ishi ajja cuaje, ecahuishi ishi ajja pea'ai cuaje. Edojjoshahua Bameya jaahuana caje'yo oya cuayajo. ¹⁶ Ohuaya Eyacuiñajjija esohui huohui bame bame caje. Jamajjeya quea huiso Jodio cuaa shajja'ajja caje Eyacuiñajjija esohui. Ohuaya jjapeequi mee caje'yo quea huiso Jodio dejja cuana Eyacuiñajji nijje. ¹⁷ Huaniya ebionei esohui huohui caje, majoya aje Quitohua, Eyacuiñajjija huoojea'yohua esohui huohui caje. Huani Enia jayojja cuaje. Enia ma etiiquiana cua; Eyacuiñajjija esohui huohuiji nei nei cua. Huani Eyacuiñajjija esohui huohui po nequije. Shajjama'cuana ohuaya sohuihuohui caje. Majoya shajjama' cuaa ojaya esohui shajja'ajja caje; jjapeequije Eyacuiñajji nijje. Ojaya esohui shajja'ajja majje Quitoja esohui shajja'ajja sa acaje.

¹⁸ Sacaniaa huohui'ajja ca cua esohuidojojji jama ba'a: —De, ¿achajja acuae po cajji so'o? Oya ca iña edejja tii nojinoji aña, ecuea ehuanase epona tii pea'ai.

¹⁹ Esohuidojojjiya jama tecueame aca cua ba'a: —Eya bajjani Jamieni, eya Eyacuiñajjija esohuidojojji nei nei cueyanaje. Ohuaya eya huoojea canaje minijje mimiya. Ecuea esohui quea bame miyaya shajja'ajjanaje. ²⁰ Miya jjashajja'ajjaqui ajja cuanaje, jamajjeya miya mimi ajja cuaje. Huani cuayajo ca mi ca oe mimije'yo. Ma ecua miya eyaya huohuinaje jayojjaya cuaje miya —jamaya cua esohuidojojji.

Majoya aje Sacania mimi ajja po mee ca'ya cua.

²¹ Pea cuaa esecuejo nequia ishoa'ajja ca nequia cua Sacania. Jama huohui'ajjame aca cua ba'a: — ¿Yajjajje shai Sacania eyiyedojo tii nequi?

²² Majoya Sacania esecue yasijje cuaya'yo majje mimi'yo ajja cua. Eme nei ca ca oe huo canequia cua Sacaniaa. Sohuimajojo jama aca cuaa cua ba'a: —Ohuaya pojja'a ba canaje esohuidojojji nei eyiyedojo nequi, de.

²³ Sacania Eyacuiñajjija equijo chacojeyo majje poquia cua oja equi yasijje. ²⁴ Quijje pishana Sacaniaa ehuanase bacua jea ca cua, o'ejji po majje. Isameni me oeje ba'ime cuayaqui'yo jjima; ania cua oja equijo tii. Oya jjashahuabaquia cua jama ba'a: ²⁵ —Eyacuiñajjiya eya jjamejoqui meesahua canaje quea bihui epojji. Jjeya pea cuana mimi-jaji'yo ajja e bacuajjijo —jamaya Isameni cua.

Esohuidojojjiya Mania huohui ca cua quijje ojaya ebacua ecuayajjijo

²⁶⁻²⁷ Janinea meshijo oe epona ahuema'ani ania cua, Mania bajjani. Oya Nasanena cuiñajjijo ania cua. Isameni Maniaja enene mese cua. Isameni me oeje oe ba'ime o'ejji anijo Eyacuiñajjiya ma esohuidojojji huoojea ca o'oya cua Mania que. Mania jjahuiacui jjima cua; dejja ba po jjima ania cua. Oya ca jjahuiacui sa cua dejja yohua bajjanijo ba'a: Josejo. Joseja baba etiiquiana yohua bajjani cua ba'a: Dabi. Dabi Jodio dejjaja emeshi mese yahuaajo nei nei cua. ²⁸ Esohuidojojji dobiquia cua Maniaja equi yasijje. Jama mimime cua onijje ba'a: —Mania, yani eya. Eya Eyacuiñajjiya huoojea canaje mi que mimiya. Miya ca ca oe ohuaya bacaca canaje ejjamejoquijji. Eyacuiñajji miquea

Emeshi Mese nei, miya ohuaya jaahuana cani — jamaya cua esohuidojojji.

²⁹ Mania quea mete cuanaje esohuidojojjiya esohuijo. Majoya oya jama jjashahuabaquime cua ba'a: —¿Apiojji shai oya jama mimime cuani enijje?

³⁰ Esohuidojojjiya jama aca cua ba'a: —Mania, ja'a quea mete pojji! Eyacuiñajjiya miya quea jea nee acani. ³¹ Jjeyahua nei miya o'ejji anije, ebacujje dejja cuaje. ¡Yohua bajjani acue ba'a: Jesosa! ³²⁻³³ Oya quea bame nee nee ba'eje. Pea cuaa bajjani caje Eyacuiñajjiya Bacua Ejja nei oya. Eyacuiñajjiya oya po mee caje'yo ojjañaja Emeshi Mese nei epojji; Dabi emeshi mese jayojja oya cuaje. Jodio dejjaja Emeshi Mese po tiitiije'yo — jamaya cua esohuidojojji. ³⁴ Maniaa esohuidojojji huohui'ajja ca cua jama ba'a: —¿Achajja jjamejoquime acuae po cajji so'o, ca dejja ba po jjima?

³⁵ Esohuidojojjiya jama aca cua ba'a: — Edojjoshahua Bame nei mi que cueje. Bo jayojja mi que anioqueje. Eyacuiñajjiya miquea ebacua ba'e mee caje. Jamajjeya miquea ebacua quea bame nee nee cuayaje oya Eyacuiñajjiya Bacua jjejojo. ³⁶ Ecuea esohui e'e jojo nei, mique nene Isameni esho'yahua bacuama' tii cua. Jjeya ca ca oe jjamejoquinaje. Me oejje oe ba'ime ejjamejoqui ani. Jamajjeya ecuea esohui e'e jojo cuanaje. ³⁷ E'e, Eyacuiñajjiya camaja'ama po mee caje'yo ojjaña —jamaya esohuidojojji cua.

³⁸ Jamajjeya Mania jama cua ba'a: —Eya Eyacuiñajji nijje jjapee neinei qui sa cuani. Miquea

esohui jayojja jama ca'a cahua Eyacuiñajjiya — jamaya cuanaje Mania.

Majoya esohuidojojji poqui'yonaje.

Mania poquia cua e'a'i meseja equi yasijje anicuaa

³⁹ Quijje pishana Mania poquia cua e'a'i meseja equi yasijje, Isamenija equi yasijje. Jodea meshi bajjani yasijje poquicuajinaje, eyiyojo ba'eca huasijje. ⁴⁰ Isamenija equi yasijje dobiqúi majje Mania jama cua ba'a: —Eya mi que cueyanaje anicuaa.

⁴¹ O mimiajo Isamenija bacua teejo ba'e moquiquia cua. Isameni quea bihui cua; Edojjoshahua Bameya mimi mee ca cua. ⁴² Jamajjeya Isameni jjanobajjima nei mimia cua Mania nijje jama ba'a: —Mania, miya Eyacuiñajjija quea jea nee nee pea epona jayojja jama pojjeama. Jamajjeya miquea ebacua teejo ba'e ojaya quea jea nee nee pea'aiya. ⁴³ E'e, miya cueyanaje e que anicuaa, jamajjeya eya quea bihui nee cuani miya Eyacuiñajjija Bacua ba'e meejojo. ⁴⁴ Mi ecue equi yasijje dobiajo ecuea ebacua moquiquinaje teejo ba'e. ⁴⁵ E'e, miyaya Eyacuiñajjija esohui shajja'ajja neineinaje, jamajjeya jamaya acaje'yo — jama mimimeya Isameni cua.

⁴⁶ Majoya aje Mania jama mimime cua ba'a: —Jjeya eya quea bihui nee nee Eyacuiñajji nijje. ⁴⁷ Eyacuiñajji ecuea Emeshi Mese nei cuani. Ohuaya ecuea mimishi cuijea ca'yonaje. ⁴⁸ Jamatii eya epona, ahuema'ani. Eya ba'e sa cuani Eyacuiñajjija yajjijo. ¿Yajjajo shai Eyacuiñajjiya eya bacaca canaje? Jamatii ojjaña cuana aje oe mimi ti-

itiije'yo ejo jama ba'a: “Mania quea bihui nee nee. Eyacuiñajjiya oya bacaca canaje”. ⁴⁹ Eyacuiñajji quea ca'a nee nee. Jamajjeya eya ohuaya quea bame acanaje. Oya mimishi'ama nei nei, quea bame nee nee ba'e. ⁵⁰ Eyacuiñajjiya ojaya epee-
 jji cuana jaahuana cani. E'e, ojjaña joya oni-
 jje jjapeequiani Eyacuiñajjiya jaahuana cani eti-
 iquiiana yahuajo nei ba'ya cua, esho'iquiana jjeya
 nei ba'yani pea'ai. ⁵¹⁻⁵² Beca cuana onijje jjapee-
 qui jjima ohuaya ca'a'ama po mee ca'yani. Dejja
 mimishi cuana ca'a'ama po mee ca'yani, emeshi
 mese mimishi cuana ohuaya ca'a'ama po mee
 ca'yani. Ojaya epeejji ca ca oe ohuaya quea ca'a po
 mee ca'yani. ⁵³ Ojjaña cuana oja esohuijo jjasha-
 jja'ajjaqui sa cuanijo ohuaya jjashajja'ajjaqui mee
 caje'yo. Beca cuana ca ca oja esohuijo jjasha-
 jja'ajjaqui sa po ajjajo ohuaya jjashajja'ajjaqui
 mee jjima acaje'yo; jeajea caje'yo cuaqui yasijje
 jjashajja'ajjaqui sa po ajjajojo. ⁵⁴ Eyacuiñajjiya Jo-
 dio dejja cuana jaahuana caje. Jamajjeya ohuaya
 oja Bacua Ejja huoojea caje Jodio dejja jaahuanajji
 epojji. Ohuaya pajea'yo jjima acaje'yo. ⁵⁵ Jamaya
 ohuaya esejaya etiiquiiana Amajama jaahuana ca
 cua. Oja bacua cuana pea'ai jaahuana ca cua.
 Oja osecua cuana jaahuana tiitii ca cua. Jjeya
 nei ohuaya eseya jaahuana cani pea'ai —jama
 bihuameya Maniaa Eyacuiñajji aca cua.

⁵⁶ Majoya Mania pea beca peejjima ba'ime ania
 cua oja nene nijje. Majoya aje Mania poqui'ya cua
 oja equi yasijje.

Huani cuaya cua ona besameejji epojji

⁵⁷ Quijje Isamenija bacua cuaya cua; yahue cua.

⁵⁸ Ojaya huapa pojjeama cuana cueya cua oja bacua baa. Ojjaña Eyacuiñajji nijje quea bihui cua Isamenija ebacua cuayajo. ⁵⁹ Me oejje pea beca peejjima cahuime po majje ojjaña cue o'oya cua ebacua bajjaniya; oja cuiishasha jehuissejjajeea pea'ai. Ojjaña bajjani sa aca cua ejeajjija bajjani.

⁶⁰ Isameniya ca jama aca cua ba'a: —Chojja, iyohua bajjani oe acue ba'a: Huani!

⁶¹ Pea cuaa jama aca cua ba'a: —¿Apiojji acuaeya ma bajjani aje? Chama' aje jja che pea bajjani Huani.

⁶² Jamajjeya aje jja oe ojjaña Sacania huohui'ajja ca cua: —¿Ae bajjani acuae jja cuaje so'o?

⁶³ Majoya Sacaniaa mimi ajja jjejojo jama tehueme aca cua ba'a: —¡Huani bajjani oe acue!

Ojjaña jama cua ba'a: —E'e, ¿apiojji shai?

⁶⁴ Majoya aje Sacania mimi mee ca o'oya cua Eyacuiñajjiya. Jamajjeya ohuaya Eyacuiñajji bihui ca o'oya cua. ⁶⁵ Ojjaña cuana ca jja ca jama cua ba'a: —De, Sacania mimi'ya, de.

Majoya ojjaña cuana poquia cua huohui pohua, ojjaña eyiyojo ba'eca cuana huohuiya. ⁶⁶ Ojjaña shajja'ajja majje huohui'ajja ca cua jama ba'a: —Eyacuiñajjiya jaahuana cani Sacaniaja bacua, Huani. Oya quea ca'a nee nee cuaje; Eyacuiñajjiya quea bame nee nee ba'e meesahua caje Huani.

Sacania sohuicuaya cua

⁶⁷ Sacania Edojjoshahua Bameya sohuicuaya mee ca cua. Jama sohuicuayame po mee ca cua ba'a: ⁶⁸ —Eseyaya oe Eyacuiñajji ejjabihuiacui, ojjaña. Oya esejaya Emeshi Mese nei, Jodio dejjaja

Emeshi Mese nei, de. Ohuaya esejaya mimishi cuana cuijea ca'yani. ⁶⁹ Ohuaya Quito huoojea caje ese que. Ma ehoojea'yo Quito quea sohui poja nee nee cuaje'yo. Quitohua eseya quea ca'a po mee caje'yo. Ojaya etiiquiiana Dabi emeshi mese cua yahuajo nei iye ca'a ca'a cua, Quito ca ca oe ojjañaja Emeshi Mese cuaje ese jaahuana-jji. ⁷⁰ Jamaya yahuajo tehue ca cua Eyacuiñajji esohui huohuiji cuaa. Tehue majamaja ca cua Quitojo. ⁷¹ Jama tehueme aca cua ba'a:

“Yani dejja cuana ecuana nijje mimijaji neineiani. Ecuana boti'ama cuani, cuiajea sa acani. Jamajjeya aje oe ecuanaya Eyacuiñajjiya jaahuana cani”.

Jamaya esohui etehue'yo cuana cua.

⁷²⁻⁷³ —Eyacuiñajji yahuajo mimia cua ecuanaja etiiquiiana nijje, Amajama nijje jama ba'a: “Eyaya Quito huoojeaje'yo miquiiana ojjaña jaahuanajji”. Jamaya aca cua ohuaya ojaya epajea'yoggi pojjeamajojo. ⁷⁴⁻⁷⁵ Jamajjeya eseyaya Eyacuiñajji ejjabihuaqui; Quitohua dejja mimishi cuanajo mete'ama po mee cani. Eseyajaahuana caje'yo. Quea bame ba'e mee caje'yo mimishi'ama epo'yoggi —jama sohuicuayameya Sacania cua.

⁷⁶ Majoya Sacaniaa oja bacua jama aca cua ba'a: —Miya ecue bacua oe nei. Miya Eyacuiñajji esohui huohuiji cuaje'yo. Ohuaya miya huoojea caje ebionei. Huohuicue jama ba'a: “¡Oya shajja'ajjacue! Oya Quito, Eyacuiñajji huoojea'yo ojjaña jaahuanajji cueje”. ⁷⁷ Huani, miyaya ojjaña cuana huohuicue jiquio esohui jama ba'a: “Eyacuiñajjiya ojjaña cuanaja mimishi

cuijea caje'yo onijje jjapeequianija”. ⁷⁸ Jamaya eseya Eyacuiñajjiya quea jea nee nee acaje'yo. ⁷⁹ Jamajjeya ecuana mete'ama cuaje onijje jjapeequi majje. Poquije eyahuasijje onijje eba'e titii'yojji. Ohuaya eseya quea bihui po mee caje'yo —jamaya Sacania cua.

⁸⁰ Majoya ebacua tii majje quea ca'a nee nee cua; Eyacuiñajjiya epeeji nei nei cua. Oya oe nei ba'ya cua quimajo. Majo tiiya aje Huaniya esohui huohui ca cua Jodio dejja cuana huasijje.

2

Jesosa cuayanaje (Mateo 1.18-25)

¹ Huani cuaya cua shejo emeshi mese yohua bajjani cua ba'a: Agosto Sesa. Emeshi meseya echacojji cuana huohui ca cua jama ba'a: — ¡Sicoquicue ecue meshijo ba'e cuana! ¿Ache huiso ba'ajja'yo socue? ¡Huohuicue ojjaña dejja cuana jama ba'a: “¡Poquicue mi cuayacua meshi yasijje mique bajjani tehueya; jamaya emeshi mese cuanaje!” acue! —jamaya Sesaa aca cua.

² Emeshi meseya Sesaa jama sico coome aca cua. Ma shejo tiiya pea emeshi mese Sineño bajjani cua; ojaya meshi Sania bajjani cua. ³ Jamajjeya aje oe ojjaña poquia cua o cuaya cua meshi yasijje.

⁴⁻⁵ Jose, Maniaja ejajiba cua. Jose Nasanenajo ba'ejajiba cua, Janinea meshijo. Oja etiiquiana Dabi cua, yahuajo Dabi ba'ya cua Benenajo, Jodea meshijo. Jamajjeya Jose poquia cua Benena huasijje emeshi meseja esohuijo oja bajjani tehue meeya. Jose, oja shiye nijje poquia cua. Quea

huesha poquia cua. Mania e bacua cuayajea'yo pana nei poquia cua. ⁶ Majoya aje Benena bañaqui majje Maniaja bacua cuayañaquinaje. ⁷ Quea deja huiso ania cua Benenajo jjabajjani tehue mee-quiya poqui. Jamajjeya chama' equi ejaachichajji cua. Jamajjeya aje oja bacua cuaya cua ana'ai jaajji equijo. Ojaya e bacua cojjasobo cuaya cua jomajo. Cuayajo ohuaya bebo ca cua daqui oshejo.

Ñajjajja jaahuanajji cuaa esohuidojojji ba ca cua

⁸ Ma mecajje aje Benenajo chipi nei pishana ñajjajja jaahuanajji cuana ñajjajja cuiña po ña cua. ⁹ Majoya aje esohuidojojji jjaja'aquia cua. Majoya aje oe o chipi nei jeajahuajahua ca cua esohuidojojjiya. Mete neinei'ya cua ñajjajja jaahuana-
jji cuana. ¹⁰ Esohuidojojji jama cua ba'a: —¡A'a quea mete pojji! Eyaya esohui quea bame nee huohuiaña ojjaña deja cuana quea bihui nee po meejji. ¹¹ Jjeya nei cuayanaje oe e bacua Dabija meshijo. Ma e bacua Eyacuiñajjija huoojea'yo. Ohuaya miquianajaya mimishi cuijea caje'yo; yohua bajjani cuaje ba'a: Quito. ¹² ¡Miquianaya poquicue e bacua baa Benena huasijje! Jomajo aje ana'ai jaajji equijo ebebo jaa oja nae nijjeya, oja chii Jose nijjeya pea'ai —jamaya cua esohuidojojji.

¹³ Majoya aje quea huiso esohuidojojji cuana jjaja'aquia cua. Sohuicuayanaje ojjaña esohuidojojji cuana Eyacuiñajji bihuiajji. Jama sohuicuayame cua ba'a:

¹⁴ “Eyacuiñajji quea ca'a nee nee. Eyajo ba'e, quea ao nee nee. Eyacuiñajjiya ojjaña ojaya epeejji cuana ojjaña meshijo ba'e quea bihui po mee caje”.

15 Majoya esohuidojojji ba'esohuaqui'ya cua eyahuasijje. Ñajjajja jaahuanajji cuana jama mimime cua ba'a: —De, cue'ajjaa Benena huasijje. Ma esohuidojojjiya huohui canaje jayojjaya aje seya aje.

16 Majoya poqui cuajicuajia cua ebacua sa'ajjaa. Majoya ana'ai jaajji equijo jaa ba cañaquia cua ebacua, Mania, Jose pea'ai. 17 Majoya ba majje huohui'ajja cañaquia cua esohuidojojjiya esohuijo ebacuajo. Pea cuana huasijje huohui ca cua pea'ai. 18 Beca cuana shajja'ajja majje jjashahuabaquia cua ñajjajja jaahuanajji cuanaja esohuijo. Quea bame cua. 19 Mania jjashahuabaquia cua pea'ai. Pajea'yo jjima aca cua ñajjajja jaahuanajji cuaa huohui canaje esohui. 20 Majoya ñajjajja jaahuanajji cuana poqui'ya cua ñajjajja jaahuana'yohua. Poquije'yohua Eyacuiñajji bihuia nei nei ca poqui'ya cua. Esohui quea huiso sohuicuaya cua: —Esohuidojojjiya esohui e'e jojo nei —cuanaje.

Ebacua Jesosa dojobia cooqui ca cua Eyacuiñajji equi yasijje

21 Me oeje pea beca peejjima cahuime cuajo Jesosaja naeya oja chiiya pea'ai bajjani canaje Jesosa. Ma esohuidojojjiya esohui jayojja Mania jjamejoqui jjimahuajo bajjani ca cua. Jesosaja cuiishasha jehuissejjajea ca cua pea'ai, ojjaña Jodioja ebacua jayojjaya jama aca cua.

22 Ba'i oe cuajo Maniaa Joseya pea'ai Jesosa dojo ca cua Eyacuiñajji equi yasijje Jenosanena huasijje. Maniaa Eyacuiñajji equi yasijje dobiqui jjimahuaa Moisesija etehue'yo jayojja aca cua.

Majoya Jesosa dojobiaqui canaje Eyacuiñajjija equi yasijje huohuiya. ²³ Jamaya aca cua Moisesija etehue'yojo ba'a:

“¡Ebacua cojjasobo dejja huohuicue Eyacuiñajji yasijje! ²⁴ ¡Becanejjijji pea'ai huia' quiacue Eyacuiñajji nijje mimiani yasijje equiyo jey-ojeyo'yojji cuaqui pohui pojji epo'yojji! Jamaya miya ajo Eyacuiñajjiya mimishi cuijea caje'yo. ¡Jamaya Eyacuiñajji sosequiajji acue!”

Jamaya Moisesija etehue'yo cua.

²⁵ Oe Jodio etii Simeoni bajjani Jenosanenajo ba'ya cua. Oya Eyacuiñajjija epeeji nei quea bame nee nee cua. Ohuaya Quito ishoa'ajja ca ania cua Eyacuiñajjija huoojea'yo ojjaña jaahuanajji. Jamatii jjashahuabaquiani Eyacuiñajji, jamajjeya Edojjoshahua Bame ojo nequia cua.

²⁶ Jamaya Edojjoshahua Bame onijje cua ba'a: —Miya emano'yojji pojjeama Eyacuiñajjija huoojea'yo cue jjimahuajo.

²⁷ Jamajjeya Edojjoshahua Bameya Simeoni poqui mee ca cua Eyacuiñajjija equi yasijje. Simeoniya Jose, Mania Jesosa bishamijji nequi ba ca cua Eyacuiñajjija equijo. ²⁸ Simeoniya ebacua Jesosa aña majje ba ca cua. Eyacuiñajji bihuia ca cua Jesosa ohua ba mee cajje. Jama cua ba'a: ²⁹⁻³⁰ —E'e de, jjeya nei Eyacuiñajjiya huoojea canaje ma ohua huoojeapana ca cua; jamajjeya ohuaya eya ba mee canaje. Jjeya eya poquije'yo Eyacuiñajji yasijje quea jaji nee eba'e tiiti'yojji. ³¹ Ojjaña meshijo ba'e cuaa Jesosa ba caje, Eyacuiñajjija huoojea'yo ojjañaja mimishi cuijea'yojji. ³² Jesusaa ojjaña dejja cuana quea jjashahuabaqui ja'a nee po

mee caje'yo Eyacuiñajjija esohuijo. Jesosa Emeshi Mese nei epojjijojo, Jodio dejja cuana quea bihui cuaje'yo —jamaya Simeoni cuanaje.

³³ Majoya Jesusaja chii, enaese pea'ai jjashahuabaquia cua Simeonija esohuijo jama ba'a: —E'e de, Simeonija esohui quea bame nee nee Jesusajo.

³⁴ Majoya aje Simeoniya Mania, Jose pea'ai jama aca cua ba'a: —Miquianaya aje Eyacuiñajjiya quea bame acaje'yo. Mique bacua quea ca'a po mee caje. Jaahuana caje'yo. Mania, miya Jesusaja enaese. Mique bacuaa Jodio cuana jjashahuabaqui mee caje'yo Eyacuiñajjijo quea huiso nee. Beca dejja cuana jjapeequije'yo Eyacuiñajji nijje. Beca cuaa cajaa acaje, jjapeequi sa po ajja Eyacuiñajji nijje. ³⁵ Mimijajije Jesosa nijje cuana. Oya quecua caje'yo cuaa. Majoya aje oe miquianaya quea yeno cuaje ma cuanajoya —jamaya Simeoni cuanaje.

³⁶ Jomajo oe epona tii ania cua; Ana bajjani. Eyacuiñajjija epeeji nei nei cua; Panoaneja bacua piona. Ojaya huapa pojjeama Asene bajjani cua. Yahuajo oya jjahuaquia cua. Oja yahue nijje ba'ya cua me oejje beca, 7 shequiajame. Majoya aje ojaya yahue mano'ya cua. ³⁷ Jamajjeya quea huiso nee nee shequiajame, 84 shequiajame ania cua. Etii nojinoji nei e'ahuemano'yo ania cua. Eyacuiñajjija equijo jjeya ani, cuayaqui ajja neinei ania cua. Jamatii mimiania cua Eyacuiñajji nijje, bihuiabihuia tiitiania cua ojjaña pojja.

³⁸ Anaa ba ca cua Jesosa. Quea bihui nee cua. Jamajje dejja cuana nijje mimia cua joya Eyacuiñajjija huoojea'yo ishoa'ajja po ani nijje jama

ba'a: —¡E'e ee bacue jiquio ebacua, Jesosa Quito cuayanaje! Ohuaya quea bei ba'e mee caje'yo Jodio cuana. Ojjaña cuanaja Emeshi Mese nei cuaje'yo —jamaya Anaa aca cua cuana.

Jose poqui o'oya cua oja meshi yasijje Nasanena huasijje

³⁹ Ojjaña Moisesija etehue'yo acua ajeyo'yo majje Jose oja huanase nijje, Jesosa pea'ai nijje poquia cua. Ma o ebionei ba'ya cua meshi yasijje poqui o'oya cua, Nasanena huasijje. ⁴⁰ Jomajo Jesosa tiia cua; quea ca'a nee nee, quea jjashahuabaqui ja'a nee cuanaje. Eyacuiñajjiya oya jaahuana ca cua; quea bei nee nee ojo cua.

Jesosa etii shacuima' nequi epo oja naeya oja chiya pea'ai dojo ca cua Eyacuiñajji equi yasijje

⁴¹ Jesusaja chii oja nae nijje poqui nequia cua Jenosanena huasijje pea Jodio cuana nijje ojjaña shequiajajo. Pascua pohua poquia cua Eyacuiñajji bihuiaa. Yahuajo nei Jodio etiiquianaja bacua cuana esohuidojojjiya cuia'yo jjima aca cua shejo poquia cua ojjaña nijje ijia'ijjiaa. ⁴² Jesosa etii shacuima' nequi po majje, 12 shequiajame po majje poqui pea'aiya cua. ⁴³ Oe semana Jenosanenajo aniya ojjaña cuaa Eyacuiñajji bihuia ca ania cua. Majoya Pascua jjayejjequiajo ojjaña cuana poqui ca'ya cua. Jesosa ca ca poqui'yo jjima cua. Jamatii ojaya enaeseja ba'yo jjima cua, oja chiija pea'ai. Jesosa pea cuana nijje pojebe'yani poso aca cua. ⁴⁴ Majoya aje oe cahuime cuajo Jesusaja enaeseya niñeba ca'ya cua: —¿Aecue jiquio Jesosa so'o?

⁴⁵ —Chama' ca ca Jesosa. ¿Achacua shai poquinaje? —jamaya pea cuana cua.

Majoya aje huacuaya poqui o'oya cua Jenosana huasijje Jesosa sa'ajja'yohua. ⁴⁶ Majoya pea beca peejjima cahuime epo ba ca'ya cua Jesosa Eyacuiñajjija equijo nequi. Jesosaa Eyacuiñajjija esohui huohuijji cuequi tii cuana huohui'ajja ca ania cua; Jesosa jjashajja'ajjaqui ania cua pea'ai. ⁴⁷ Ojjaña jjashahuaba neineiquinaje Jesusaja esohuijo: —E'e de, Jesosa quea ja'a nee nee jjashahuabaquiani, de —pea cuana cua.

⁴⁸ Joseya Maniaa pea'ai Jesosa ba majje mimia ca cua jama ba'a: —¿A'a mi quioya Jesosa? ¿A'ya acuae mi po nequinaje so'o? Ecuana jaya miya ba'yo jjima nei nei cuanaje. Jamajjeya eya mijo quea yeno nee nee cuanaje, Jesosa. Jamajjeya ecuanaya sa'ajjasa'ajja'yoquinaje.

⁴⁹ Jesusaa jama aca cua ba'a: —¿Apiojji acuae iña sa'ajja'yaña so'o? ¿A'a miquea ba jjima eya ecue Chijja equijo enequijji, Eyacuiñajjija equijo?

⁵⁰ Jose Mania pea'ai oja esohuijo jjabahuejjaqui jjima cua yajja cuani poso aca cua.

⁵¹ Majoya aje Jesosa oja chii nijje oja nae nijje Nasanena huasijje poqui o'oya cua, ma o ba'e yasijje. Jamatii Jesusaa shajja'ajja ca cua Jose, Mania pea'ai. Quea bihui ba'ya cua. Mania jjashahuabaquia cua Jesusaja esohuijo; pajea'yo jjima aca cua. ⁵² Jesosa tiiya cua quea ca'a nee nee; quea ja'a nee nee cua. Eyacuiñajji quea bihui nee cua Jesusajo; dejja cuana quea bihui cua pea'ai.

3

*Huaniya Eyacuiñajjija esohui huohui ca cua
(Mateo 3.1-12; Macoso 1.1-8; Huani 1.19-28)*

¹ Quijje nei mahuiso emeshi mese cuana cua ba'a: Shomano dejja cuanaja emeshi mese Time-neo bajjani. Quea huiso shequiajame, 15 shequiajame nequijo Jodea meshija emeshi mese Ponisio Pinato bajjani nequinaje. Janinea meshija emeshi mese Enode bajjani cua. Oja doe etii Penipe bajjani cua. Oya Itoneaja emeshi mese cua, Taconiteja emeshi mese pea'ai cua. Amininijaja emeshi mese Nisania bajjani cua. ² Eyacuiñajji nijje mimiani etii Anasi bajjani cua. Pea ca Caipa bajjani cua.

Jiquio emeshi mese cuana nequijo tiya aje Huani Sacaniaja bacua ejja nequia cua meshi quimajo. Onijje mimi majje Eyacuiñajjiya Huani huoojea ca cua esohui huohuijji epojji. ³ Jamajjeya Huani po'ayequie nequia cua Eyacuiñajjiya esohui huohuiya Jodana cueijje. Ohuaya pea cuana jama huohuime aca cua ba'a: —¡Jjashahuabaquicue Eyacuiñajjiyo; miquea mimishi pajea'yocue! ¡Miquea mimishijo quea yeno pocue! ¡A'a mimishi maja sa po'yojji! Miya mimishi pajea'yajo, aje Eyacuiñajjiya miquea mimishi cuijea caje'yo. Eyaya miya besa meeje enajje pea cuanaja ebajji miya Eyacuiñajjiya epeeji nei nei cuanijo.

⁴ Jamaya Isaiaa yahuajo nei Huanijo tehue ca cua. Isaia Eyacuiñajjiya epeeji, esohui huohuijji cua. Oya etiiquiana nei nei cua. Jama tehuemeya aje yahuajo aca cua ba'a:

“Oe dejja quimajo nequi taaani jama ba'a: ¡Acua pocue! ¡Jjashajja'ajjaquicue Eyacuiñajjiya huoojea'yo ojjaña jaahuanajjiyo!

⁵ Eyacuiñajjiya dejja quea mimishi cuana jeajea caje cuaquí yasijje jjashajja'ajjaquí ajja-

jojo. Ojjaña joya Eyacuiñajjija esohui ojaya ehoojea'yo ojjaña jaahuanajjijo shajja'ajja cani ca ca quea bame nee cuaje'yo. Joya ecua ejiojji quea bame aca yani jama jayojja dejja cuana quea bame acaje'yo. ⁶ Ojjaña meshijo nequica dejjaa shajja'ajja caje Eyacuiñajjija esohui. Joya onijje jjapeequije Eyacuiñajjija mimishi cuijea caje'yo”.

Jamaya cua Isaiaja etehue'yo Huanijo.

⁷ Majoya dejja quea huiso cueya cua Huani que mimishi pajea'yohua nisho, oja besa mee yohua nisho pea'aiya. Jamajjeya aje Huaniya jama tecueame aca cua ba'a: —Miquianaya quea tai cuani. Peyo jayojja cuani. Miquianaaya ca jja ca mimishi pajea nisho'yaña. Miquianaya jjashahuaba taiquiani jama ba'a: “Eyacuiñajjija eya jeajea jjima acaje cuaqui yasijje Huanija enajje ebesa meejojo”. Jamatii miquianajaya ca jja ca oe mimishi pajea'yo jjima nei nei. ¡Ebionei oe shajja'ajjacue Eyacuiñajjija esohui; majoya miquianajaya mimishi pajea neinei'yocue! Majoya oe enajje eyaya besa meeje'yo Eyacuiñajjija epeeji nei epojji. ⁸ Miquianaya Eyacuiñajjija epeeji nei ba'yanijo, mimishi epo beca'yojji pojjeama. ¡Jama jjashahuabaquimeya oe pocue enajje ebasaqui cuahuajje! A'a mimijji jama ba'a: “Ecuea etiquiana Amajama cua. Oya Eyacuiñajjija epeeji nei cua, jamajjeya aje oe ecuanaya Eyacuiñajjija epeeji pea'ai cuani”. Cho, miquianaya ca ca jjapeequi jjima Eyacuiñajji nijje. Miquianaya quea mimishi, de. Eyacuiñajji ojaya epeeji quea huiso sa cuani jojjemo Amajama jayojja epojji, ohuaya mei pana came. ⁹ Miquianaya joya acui jjajjama'

jayojja cuani. Jiquio ecua acui jjajja'yo ajja jajajea ca'yojji jayojja jama Eyacuiñajjiya dejja mimishi acaje'yo, jeajea caje'yo cuaqui yasijje. Jamaya aje miquianaya acaje'yo mimishi pajea'yo ajjajojo, onijje jjapeequi sa po ajjajojo. Beca cuana ca ca joya acui quea jjajja huiso jayojja cuani. Quea bame nee nee ba'yani, Eyacuiñajji nijje jjapeequiani jjejojo. Quea bei ba'yani pea cuana nijje, oya Eyacuiñajjiya quea jea nee nee acani jjejojo.

¹⁰ Majoya aje dejja cuaa jama huohui'ajjame aca cua ba'a: —¿Yajja acuae oe po cajji so'o?

¹¹ Huani jama cua ba'a: —¡Joya miquea beca yanijo daqui quiacue daquima' cuana huasijje! ¡Miquea bobí yanijo ca bobima' cuana huasijje quiacue!

¹² Emeshi meseja bejjo chichajji cuani cuaa jama huohui'ajjame aca cua ba'a: —Esohui huohuijji, ¿yajja acuae pajjaja po cajji so'o?

¹³ Huani jama cua ba'a: —¡A'a quea mimishi pojji! ¡A'a quea sose huiso ajji! ¡Joya emeshi meseja sosehuiso tiiya jjeshecue! —jamaya cua Huani.

¹⁴ Majoya aje sohuinanohua jama huohui'ajjame aca cua ba'a: —¿Yajja acuae ecuanaya cuaje'yo so'o?

Huani jama cua ba'a: —¡A'a miquiaaya dejja cuana ñajji bejjo esiiiji! ¡A'a pea cuana nijje siajje pojji bejjo esiiiji! ¡Miquianajaya bejjojo nei jjaja oe quea bihui pocue! —jamaya Huaniya sohuinano aca cua.

¹⁵ Dejja cuaa Huani Eyacuiñajjiya huoojea'yo ojjaña jaahuanajji poso aca cua oja esohui quea bame nee nee cua joya. ¹⁶ Huani ca ca Eyacuiñajjiya huoojea'yo ojjaña jaahuanajji pojjeama

cua. Oya jama cua ba'a: —Eyaya miquianaya enajje besa meeje'yo Eyacuiñajjija epeejji jojoya. Eya ca ca Eyacuiñajjija huoojea'yo ojjaña jaahuanajji pojjeama. Oya ca ca Quito bajjani quijje pishana cueje. Ohuaya miquiana que Eyacuiñajjija Edojjoshahua Bame dobiqúi mee caje'yo. Jamajjeya miya quea bame cuaje'yo. Mimishi cuana pajea sa po'yo ajjajo ca ca, jeajea caje'yo cuaqui yasijje. Jamaya Quito oe nei quea ca'a nequi. Eya ca ca iña quea ca'a pishana nequi. Jamajjeya eya ca iña onijje nequi sa po ajja miquiana ani cojja nei. Quea bicho eya, de. ¹⁷ Quito cueje ojaya epeejji nei chicha'yohua. Pea cuana ca ca cajaa ajea caje'yo. E'e, jiquio ecua seya anoso shaa jea majje equi yasijje iya'yaña jama ojaya epeejji cuana acaje'yo Quitohua. Jiquio ecua seya anoso cuiahuojo majje shaa jeajeaña jayojja jama Quitohua ojaya epeejji pojjeama cuana jeajea caje'yo cuaqui quijjo'yo ajja huasijje —jamaya Huaniya aca cua.

¹⁸ Huanija pea esohui jama cua ba'a ojjaña cuana: —Eyacuiñajji ojjaña nijje jjapeequi sa cuani, jjeya nei.

¹⁹ Ojaya pea esohui jama cua ba'a: —Esejaya emeshi mese, Enode bajjani quea mimishi nee nee cuanaje. Oja chahuaja, Penipeja huanase sii canaje oja huanase epo'yojji. Ma epona Enodiasi bajjani cuanaje —jamaya cua Huani.

²⁰ Jamajjeya Enode ma esohui shajja'ajja majje quea quene nee nee cua. Iña mee ca cua Huani ejeanobiaejajji, Enodeya quea mimishi nee neeya jjejojo.

Huaniya Jesosa enajje besa mee ca cua
(Mateo 3.13-17; Macoso 1.9-11)

²¹ Huani jeanobiajea jjimahua poquia cua dejja ojjaña cuana nijje Jodana cuei yasijje enajje besa meeya. Jesosa pea'ai poquia cua o que. Huaniya Jesosa besa mee ca'ya cua. Majoya Jesosa Eyacuiñajji nijje mimianijo, eyatahuatahua capajea ca cua. Edojjoshahua Bame huia' jama o sapa biajje cuabesa ba'ya cua. Japashineijje ba'eoquea cua. ²² Majoya esohui shajja'ajja ca cua ojjaña eyahuasijje. Eyacuiñajji Jesosa nijje jama mimime cua ba'a: —Miya ecue Bacua Ejja nei, Jesosa. Eyaya miya quea jea nee aña. Eya mijo quea bihui nee nee —jamaya cua Eyacuiñajji.

Jesosaja etiiquiana
(Mateo 1.1-17)

²³ Jesosa Jodio dejja nei cua. Jesosaa 30 shequia-jame tii majje esohui huohui coo ca cua. ²⁴ Ojaya etiiquiana cuana yohua bajjani cua ba'a: Ebionei Jose nequia cua. Oya Jesosa tii meejji cua; Jesosaja chii jayojja cua. Jose ca Enija bacua ejja cua. Eni ca Mata'aja bacua ejja cua. Mata'a ca Nemija bacua ejja cua. Nemi ca Mequija bacua ejja cua. Mequi ca Janaja bacua ejja cua. Jana ca Joseja bacua ejja cua. Jose ca Matatija bacua ejja cua. ²⁵ Matati ca Amosoja bacua ejja cua. Amoso ca Nahuomaja bacua ejja cua. Nahuoma ca Esinija bacua ejja cua. Esini ca Naquiaja bacua ejja cua. ²⁶ Naquia ca Maataja bacua ejja cua. Maata ca Matatija bacua ejja cua. Matati ca Semeja bacua ejja cua. Seme ca Josequija bacua ejja cua. Josequi ca Jonaja bacua ejja cua. Jona ca Joanaja bacua ejja cua. ²⁷ Joana

ca Shesaja bacua ejja cua. Shesa ca Sonobabeja bacua ejja cua. Sonobabe ca Sanatija bacua ejja cua. Sanati ca Nenija bacua ejja cua. ²⁸ Neni ca Mequija bacua ejja cua. Mequi ca Adija bacua ejja cua. Adi ca Cosamaja bacua ejja cua. Cosama ca Emanamaja bacua ejja cua. Emanama ca Esheja bacua ejja cua. Eshe ca Jesosaja bacua ejja cua. ²⁹ Jেসosa ca Enieseja bacua ejja cua. Eniese ca Jonimija bacua ejja cua. Jonimi ca Mata'aja bacua ejja cua. Mata'a ca Nemija bacua ejja cua. ³⁰ Nemi ca Simeonija bacua ejja cua. Simeoni ca Jodaja bacua ejja cua. Joda ca Joseja bacua ejja cua. Jose ca Jonamija bacua ejja cua. Jonami ca Eniaquimija bacua ejja cua. Eniaquimi ca Meneaja bacua ejja cua. ³¹ Menea ca Menaja bacua ejja cua. Mena ca Matataja bacua ejja cua. Matata ca Nataja bacua ejja cua. Nata ca Dabija bacua ejja cua. ³² Dabi ca Isaija bacua ejja cua. Isai' ca Obedaja bacua ejja cua. Obeda ca Boosija bacua ejja cua. Boosi ca Sanaja bacua ejja cua. Sana ca Naasonija bacua ejja cua. Naasoni ca Aminidabija bacua ejja cua. ³³ Aminidabi ca Adimija bacua ejja cua. Adimi ca Ashinija bacua ejja cua. Ashini ca Eshaomija bacua ejja cua. Eshaomi ca Panesija bacua ejja cua. Panesi ca Jonaja bacua ejja cua. ³⁴ Jona ca Jacoboja bacua ejja cua. Jacobo ca Isaacaja bacua ejja cua. Isaaca ca Amajamaja bacua ejja cua. Amajama ca Taneja bacua ejja cua. Tane ca Nacionija bacua ejja cua. ³⁵ Naconi ca Senocaja bacua ejja cua. Senoca Shacaoja bacua ejja cua. Shacao ca Penecaja bacua ejja cua. Peneca ca Emeneja bacua ejja cua. Emene ca Sanaja bacua ejja cua.

³⁶ Sana ca Cainanija bacua ejja cua. Cainani ca Anajjadaja bacua ejja cua. Anajjada ca Semija bacua ejja cua. Semi ca Noeja bacua ejja cua. Noe ca Nemequeja bacua ejja cua. ³⁷ Nemeque ca Matosaneja bacua ejja cua. Matosane ca Enoqueja bacua ejja cua. Enoque ca Janedija bacua ejja cua. Janedi ca Majananeenija bacua ejja cua. Majananeeni ca Cainanija bacua ejja cua. ³⁸ Cainani ca Enosija bacua ejja cua. Enosi ca Setija bacua ejja cua. Seti ca Adanaja bacua ejja cua. Adana ca Eyacuiñajjija pana cua. Oya ebionei dejja cua.

4

Edosiquiana etiiya Jesosa quea mimishi po mee sa aca cua

(Mateo 4.1-11; Macoso 1.12-13)

¹ Jesosa cueyanaje Jodana cuei yasijje Huanija besa meeya. Jomajo Edojjoshahua Bameya Jesosa dojo canaje quima huasijje. Majoya Edosiquiana etii Jesosa nijje miminaje oja emeshi mese nei epo'yojji nisho. ² Jomajo nequia cua quea huiso nee cahuime, 40 cahuime ijji'ijji jjiima cua. Majoya quea shoe nee nee jjabaquia cua. ³ Edosiquiana etiiya Jesosa jama huohuime aca cua ba'a: —Miya Eyacuiñajjija Bacua jjabaqui majje ca oe ijiquio mei pahui pojji acue! ¡Pahui pojji amajje ijjiacue!

⁴ Jesosa jama cua ba'a: —Chojja de, eya miquea esohui shajja'ajja sa po ajja. Bacue, Eyacuiñajjija etehue'yo jama cuani ba'a: “Dejja cuana bobijo ca'a po majje pojjeama ba'e tiitiije'yo. Ojaña Eyacuiñajjija esohui jayojja jama añajo ca se ca oe

quea bame nee ba'e tiitiije'yo” —jamaya Jesosa cua.

⁵ Majoya aje Edosiquiana ettiya Jesosa dojo ca cua eyiyo ao'ao huasijje. Majoya aje ba mee ca cua ojjaña meshi cuana; Jesosa cahuijo jayojja ba mee ca cua. ⁶ Edosiquiaa huohui ca o'oya cua jama ba'a: —Eyaya miya quiaje jiquio meshi cuana, miya emeshi mese po meeje'yo. Eyaya ojjaña aquiana quiaje'yo. Ojjaña meshi cuana ecuea, jamajjeya eyaya quia sa cuanijo eyaya aje miquea yajji quiaje'yo. ⁷ ¡Miyaya eya bihuiacue, shajja'ajjacue ecuea esohui! Majoya miya emeshi mese po meeje'yo eyaya —jama siajje ameya aca cua Edosiquiaa Jesosa.

⁸ Jesosa jama cua ba'a: —Chojja, ¡poquicue quea huesha, Edosiquiana! Eyacuiñajjija etehue'yo jama cuani ba'a:

“¡Eyacuiñajji oe nei bihuiacue; oya oe nei ojjañaja Emeshi Mese nei nequi! ¡Ojaya ehuohui'yo jama oe acue!” —Jesosaa aca cua.

⁹ Majoya aje Edosiquiaa Jesosa dojo ca cua Jenosanena huasijje. Nequia cañaquia cua Eyacuiñajjija equi biajje. Majoya Edosiquiaa Jesosa jama aca cua ba'a: —Miya Eyacuiñajjija Bacua Ejja nei jjabaqui majje ¡jiquiojo nequi tohuua'ajja'yo socue meshi yasijje! ¹⁰ Eyacuiñajjija etehue'yo jama cuani ba'a:

“Eyacuiñajjiya huoojea caje esohuidojojji cuana mi jaahuanaa. ¹¹ Oquequiajo ohuaya emeya miya iñajjequi caje'yo. Jamajjeya miya ejja-jiojji quecuasajaquijji pojjeama meijo”.

Jamaya cuani, de —Edosiquiana cuanaje.

¹² Jesosaa jama aca cua ba'a: —Chojja, miya jjashahuaba taiquiani, de. Eyacuiñajjija pea etehue'yo jama cuani ba'a:

“A'a jamaya mimijji ba'a: ¿A'a Eyacuiñajjiya oja esohui e'e jojo nei acaje'yo? ¿A'a eya jaahuana nei caje'yo? Caba'ajjasahua. ¡A'a pojji!”

Jamaya yahuajo nei Moisesiya tehue ca cua — jamaya Jesosa cua.

¹³ Edosiquiana jjashahuabaqui jjima cua; pea esohui chama' cua Jesosa quea mimishi po meeji nisho. Jamajjeya Edosiquiana poquia cua. Majoya aje quijje cue o'oya cua o quea mimishi po mee'yohua nisho.

Jesosaa huohui coo ca cua Janinea meshi yasijje
(Mateo 4.12-17; Macoso 1.14-15)

¹⁴ Majoya Jesosa posohuaqui o'oya cua oja meshi yasijje, Janinea meshi yasijje. Edojjoshahua Bameya Jesosa quea ca'a po mee ca cua. Jomajo dejja cuana mimia cua Jesosajo, ojjaña meshi yasijje mimia cua. ¹⁵ Jamatii Jesosa po'ayequeie nequia cua pea cuiñajji cuana huasijje Eyacuiñajjija esohui huohuiya Jodioja equi ejjachichaquijji cuana huasijje. Ojjaña dejja quea bihui cua onijje. Jama cuana cua ba'a: —E'e, ojaya esohui quea ja'a nee, quea bame nee nee.

Jesosa poquia cua Nasanena huasijje
(Mateo 13.53-58; Macoso 6.1-6)

¹⁶ Jesosa poquia cua Nasanena huasijje, oya tii'ya cua jomajo tii. Ojjaña epojja ejomishocajji Jesosa dobiqqui majamajanaje Jodioja equi ejjachichaquijji yasijje esohui huohuiya. Jamajjeya dobiqqui majje oya nequisohua cua Eyacuiñajjija

etehue'yo ajji. ¹⁷ Oe dejjaa, etehue'yo jaahua-najjiya Jesosa quia ca cua etehue'yo. Yahuaajo Isaiaja etehue'yo cua. Isaia Eyacuiñajjiya epeeji nei, etiquiana cua; Eyacuiñajjiya esohui huohuiji cua. Jamajjeya ojaya etehue'yo e'e jojo nei cua. E'e de, Jesosaa she'a ca cua ma etehue'yo, jama ame aca cua jiquio esohui ba'a:

¹⁸ “Edojjoshahua Bameya eya jjashahuabaqui mee cani. Ohuaya eya huoojea canaje jama ba'a: —¡Huohuicue ecuea esohui bame de-
jja aema' cuana huasijje! ¡Huohuicue de-
jja ejeanobiajaa cuana huasijje ecuayaqui
mee'yojji! ¡Huohuicue cojjama' cuana huasi-
jje ejjacojja ja'a meequi'yojji! ¡Huohuicue
pea dejja quea yeno ba'e yasijje quea bihui
eba'e meeji!

¹⁹ Huohuicue jiquio esohui: Emeshi Mese neiya ojjaña cuana quea bihui ba'e mee sa acani”.
Jamaya Isaiaa tehue ca cua yahuaajo nei.

²⁰ Majoya Jesosaa etehue'yo cami ca'yonaje; quia ca o'oya cua ma dejja huasijje. Jesosa anioquea cua huohui epojji. Ojjaña oya ba ca'ya cua; ishoa'ajja ca cua ojaya esohui ehuhuiji. ²¹ Ohuaya esohui huohui ca cua jama ba'a: —E'e, ma etehue'yo huohui cani ejo. Eya cue'yonaje ma dejja cuana huasijje esohui huohuiya. Eyaya miquianaya huohui'ajjaña jama ba'a: Eyacuiñajjiya quea bihui ba'e mee caje'yo miquianaya —Jesosaa aca cua.

²² Ojjaña Jesosajo quea bame mimia cua. Jjashahuabaquia cua ojjaña ojaya esohuijo. Pea cuana ca ca Jesosajo jama cua ba'a: —Jesosaja esohui quea ja'a de, oya ca ca Joseja bacua nei,

Eyacuiñajjija Bacua pojjeama —jamaya pea cuana cua Jesosa Eyacuiñajjija Bacua pojjeamajo poso.

²³ Jesosaa oya cuana tecuea ca cua jama ba'a: —Miquianaya jamaya cuaje miquianajaya ejjashahuabaquijjijo ba'a: “Ejjashicuiquijji, ¿yajjaje acuae jja miyaya mi jjashicui'ajjaquiani so'o?” ¿A'a nequiana jamaya pea'ai jjashahuabaquiani? Jama cuani ba'a: “Ecuanaaya miya shajja'ajjanaje, Jesosa. Miyaya jjaajaqui mee'yonaje Capenaomajo ba'e cuana. ¿Yajjajo acuaeya oe miquea meshijo ba'e cuana jjaajaqui mee'yo jjima añã so'o?” ¿A'a nequiana jamaya jjashahuabaquime cuani? —Jesosa cua —.

²⁴ E'e jojo nei ecuea esohui, jamatii miquianaya Eyacuiñajjija esohui huohuijji mimianijo oja meshijo ojaya huapa pojjeama cuana ca ca jjashajja'ajjaqui sa po ajja.

²⁵ —Miquianajaya eba ma etiiquiana Enia bajjani. Yahuajo nei ohuaya huohui ca cua Eyacuiñajjija esohui. Beshahua nei pea beca peejjima shequiãjame ena po'yo jjima cua. Bobi tii jjima cua ena chamajojo. Ojjaña quea shoe nee nee cua.

²⁶ Yahuajo quea huiso Jodio e'ahuemano ania cua. Jamatii oya cuana ca ca jjashajja'ajjaqui sa po ajja Eniaja esohuijo, Eyacuiñajjija ehuhui'yojo. Jama-jjeya Eyacuiñajjiya Enia huoojea ca cua pea meshi yasijje Sinono meshi yasijje, Saneta cuiñajji yasijje, Sinono e'ahuemano que. Jomajo e'ahuemanohua shajja'ajja ca cua Eyacuiñajjija esohui. Jamajjeya Enia bobia ca cua.

²⁷ —Miquianajaya eba pea etiiquiana Eyacuiñajjija esohui huohuijji Eniseo bajjani ba'ya cua Enia nijje. Quea huiso Jodio dejja batata

epo'yo jomajo ba'ya cua. Jamatii Eniseoja esohui shajja'ajja sa po ajja. Jamajjeya jjaajaqui mee'yo jjima aca cua Eyacuiñajjiya. Pea meshijo ba'e Sinia meshijo oe dejja Naamani bajjani batata epo'yo nequia cua; oya shajja'ajja sa cua Eyacuiñajjiya esohui. Jamajjeya oya poquia cua Eniseo que, Eniseoja jjaajaqui mee'yohua. Ohuaya shajja'ajja ca cua ojaya esohui. Jamajjeya jjaajaqui mee ca'ya cua Eyacuiñajjiya. Jamaya miqianaya shajjama' cuani miqianajaya etiiquiana jayojja. Jjeya nei shajja'ajja sa po ajja Eyacuiñajjiya esohui, jamajjeya jjaajaqui mee'yo jjima acaje Eyacuiñajjiya —Jesosa cuanaje.

²⁸ Ojjaña cuana Jodioja equi ejjachichaquiijjijo anica Jesusaja esohui shajja'ajja majje quenequene neinei'ya cua Jesosa nijje. ²⁹ Jesosa ña majje jeacuayajea ca cua esecue yasijje. Majoya poqui mee ca'ya cua eyiyo hui yasijje e'ñajateohuaajea'yojji nisho. ³⁰ Jamatii Jesosa poquia cua, jjayejjequinana cua ona nequi yiyesamajjeya.

*Oe dejjaja eshahua nequia cua
(Macoso 1.21-28)*

³¹ Pea pojajajo Jesosa poquia cua Capenaoma huasijje, Janinea meshi yasijje. Ejomishocajji pojajajo oya dobiquia cua Jodioja equi ejjachichaquiijji yasijje esohui huohuiya. ³² Ojjaña cuaa jama aca cua ba'a: —De, Jesusaja esohui quea ja'a nee. E'e jojo nei pojja'a Eyacuiñajjiya oya huoojja canaje, de.

Jamajjeya ojaya esohui shajja'ajja sa aca cua. ³³ Oe dejja eshahua nijje tii ania cua Eyacuiñajjiya

equijo. Eshahuaa oya taaa sajasaja mee ca cua Jesosa que jama ba'a: ³⁴—E'e de, ¿apiojji shai miya ecuana que cueyanaje, Jesosa? Miya cueyanaje pojja'a ecuana cuayaqui mee'yohua. Ecuana jaya miya eba, Jesosa. Miya Nasanenajo ba'e, miya Eyacuiñajjija Bacua, miya mimishi'ama, de —jamaya eshahua cua.

³⁵ Jesusaa eshahua tecueajea ca cua jama ba'a: —¡A'a mimijji; cuayaqui'yocue jiquio dejjajo nequi! —Jesosa cua.

Majoya eshahuaa ma dejja jeabichajea mee ca cua pea cuana pejjejo. Eshahua nee'ama nei nei cuayaqui'yome cua ma dejjaja eyamijo nequi. ³⁶ Ojjaña jjajjasohuaquia cua; mimia cua pea cuana nijje jama ba'a: —E'e de, Jesosa quea sohui poja nee nee; ojaya esohuijo eshahua cuayaqui'yonaje, de. ¿Yajjaje shai quea sohui poja nee nee? —jamaya cua ojjaña Jesusajo. ³⁷ Jamaya pea cuaa huohui ca cua ojjaña cuiñajjijo ba'e yasi-jje.

*Jesosa boeca mee ca'ya cua Simohuija ano
(Mateo 8.14-15; Macoso 1.29-31)*

³⁸ Majoya Jesosa cuayaquia cua Jodioja equi ejjachichaquijjijo ani. Cuayaqui majje poquia cua Simohuija equi yasijje. Dobi qui majje ba ca cua Simohuija ano. Simohuija ano quea mano jaa, quea quiyo nee nee jaa ba ca cua. Simohuiya Jesosa jama huohui'ajjame aca cua ba'a: —Jesosa, ¿a'a miyaya boeca meeje'yo ecue ano, ecue huanaeseja enaese?

³⁹ Jesosaa Simohuija ano jama aca cua ba'a: —E'e, jjeyahua nei mi quiyoquiyo pajeaje'yo — Jesosaa aca cua.

Majoya aje epona tii quiyoquiyo pajea'ya cua. Boecanana'ya cua. Majoya boeca'yo majje anisohua'ya cua. Anisohua'yo majje bobí cuacua meesahua ca cua epona tiiya.

Jesosaa quea huiso emanojaa cuana jjaajaqui mee ca'ya cua

(Mateo 8.16-17; Macoso 1.32-34)

⁴⁰ Quijje pishana eshequi oquequiajo ojjaña emanojaa dojo ca cua Jesosa que jjaajaqui mee'yohua. Jesosaa emanojaa cuana emeya napa cajje jjaajaqui'ya cua. ⁴¹ Eshahua cuana pea'ai cuayaqui mee ca'ya cua. Cuayaqui'yo majje eshahua cuana taaa cua jama ba'a: —Jesosa, miya e'e jojo nei Eyacuiñajjija Bacua Ejja.

Jesosa jama cua ba'a: —¡A'a enijje jama mimijji! Miquea eba eya, Eyacuiñajjija huoojea'yo ojjaña jaahuanajji. Pea cuanaja eya ba jjima, de — jamaya Jesosa cua.

Jesosa po'ayequie nequia cua Eyacuiñajjija esohui huohuiya

(Macoso 1.35-39)

⁴² Jjapojjaqui jeahuajo Jesosa oe nei poquia cua dejjama huasijje. Pea cuanaa sa'ajja ca nequia cua: —¿Aecue Jesosa?

Quijje pishana ca ca ba ca'ya cuaa cua Jesosa. Mimia cua onijje jama ba'a: —Jesosa, ¡nequicue ecuanaja cuiñajjijo! ¡A'a poquijji pea cuiñajji yasi- jje!

⁴³ Jesusaa jama huohuime aca cua ba'a: — Chojja, jiquio cuiñajjijo eya nequi ajja. Eyaya Eyacuiñajjija esohui cahuohuiquiahua pea cuiñajjijo ba'e cuana huasijje. Jamajoya aje oe eya ecue Chiya huoojea canaje ojaya esohui bame bame huohuijji pea cuana huasijje. Eyaya iyaaaje dejja cuana jama ba'a: “¡Jashajja'ajja quicue oe! Eyacuiñajjiya miya quea jea nee nee acani, oya miquea Emeshi Mese nei po sa cuani; mi jaahuanajji nei nei po sa cuani. Ohuaya miya ba'e bame mee sa acani. ¡Jamajjeya onijje jjapeequicue!” —jamaya Jesosa cua. ⁴⁴Jamaya ohuaya esohui huohui ca ayequi nequia cua Jodioja equi ejjachichaquijji cuana huasijje, ojjaña meshi cuana huasijje.

5

Jesosaja epeejiya nahuoo cuiashaja ca cua quea huiiso nee nee

(Mateo 4.18-22; Macoso 1.16-20)

¹ Oe pojjajo Jesosa Jenesane bae sahua meshijajjijo ania cua. Pea cuana huasijje Eyacuiñajjija esohui huohui po ania cua. Quea huiiso dejjaa ojaya esohui shajja'ajja sa aca cua. ² Quea dejja huiisojojo shajja'ajja jjima aca cua pea dejja cuaa. Jamajjeya Jesusaa pea e'anijji sa'ajja ca cua ojjañaja eshajja'ajjajji. Majoya becamejijji bishe ai ba ca cua bae sahuajo ba'e. Ma bishe mese cuana nahuoo cuiashajajji shacua'yo po nequia cua. ³ Oe bishe mese Simohui bajjani cua. Jesosa nequisohuaquia cua oja bishe yasijje. Jesusaa Simohui huohui'ajja ca cua jama ba'a: —¡Quecuayiyejeacue ena bae pishana huasijje ojjañaja ecuea esohui eshajja'ajjajji!

—E'e —Simohui cua.

Majoya bishe quecuayiyejea majje Jesusaa bishejo e'anioque aniya tii esohui huohui ca año cua. ⁴ Jesusaa esohui huohuijeyo majje Simohui jama aca cua ba'a: —Simohui, ¡bishe yocue ena bae yiyesama huasijje! ¡Majoya jeacue nahuoo cuiashajaji!

⁵ Simohuiya jama aca cua ba'a: —Esohui huohuijji, ecuana mecajje poquinaje nahuoo cuiashajaa nisho. Chama' de, chama' nahuoo cuanaje. Eyaya ca ca shajja'ajja sa año miquea esohui, jamajjeya eyaya jeaje ena huasijje nahuoo cuiashajaji —jamaya Simohui cua.

⁶ Majoya yo ca cua ena bae yiyesama huasijje nahuoo cuiashajaji. Jea ca cua nahuoo cuiashajaji; quea huiso nee nee nahuoo dobiquia cua. Quecuaisajea'ajja ca cua. ⁷ Majoya Simohuiya ojaya epeeji cuana iyaa ca cua: —¡De, yacua oe yecue bishe pea, che nahuoo jjequijeasohuahuacue!

Majoya pea bishe ye ca cua; cuio ca cua beca bishe nahuohua. Beshahua nei bishe jaadobiquia cua. ⁸ Ma ba majjeya aje Simohui ecui'oshajjajo nequia cua Jesusa pejejejo; jama cua ba'a: —De, ecuea Emeshi Mese, e'e jojo nei miquea esohui, eya miquea esohuijo jjashahuaba taiquinaje, de. ¡Quea huesha nequicue Jesusa, eya quea mimishi cuanaje! —jamaya Simohui cuanaje.

⁹ Simohuiya epeeji cuana jjajjasohuaquia cua nahuoo quea huiso ohua cuiashaja cajo. O jayoja jjajjasoquime pea'aiya cua, de. ¹⁰ Semeneoja bacua cuana Satiaco, Huani, Simohuiya echacosahuajji cuani pea'aiya jjajjasohuaquia cua.

Majoya Jesusaa Simohui jama aca cua ba'a: — ¡A'a jjajjasoaquijji! Miquianaaya banaje ecuea esohui e'e jojo nei nahuoo cuiashajajjijo. Jjeyahua nei miquianaaya dejja quea huiso jjequije ecuea esohuijo ejjashajja'ajjaquijji, ecuea epeeji epojji —jamaya Jesosa cua.

¹¹ Majoya cuaa bishe yo ca'ya cua etaja huasijje. Aquiana cuana jeana'yo majje poquia cua Jesosa nijje.

Jesosaa dejja jjajjea meequi ca'ya cua batata epo'yo ma dejjaa shicui jjima acani
(Mateo 8.1-4; Macoso 1.40-45)

¹² Oe pojajajo Jesosa ania cua pea cuiñajjijo. Cue'ya cua oe dejja batata epo'yo. Ojjañaja oya boti'ama cua, o jayojja epo cuani jjejojo. Oya Jesosa ba majje ecui'oshajjajo nequia cua o bihuiajji. Jama huohui'ajjame aca cua ba'a: —Emeshi Mese nei, miya sa cuanijo, ¿a'a mo che miyaya jjajjeaqui mee'yome so'o? —aca cua ohuaya.

¹³ Majoya Jesusaa napa'ajja ca cua emeya, quea jeajojo huohui ca cua: —E'e, eyaya miya jjajjeaqui meeje'yo batata epo'yo. Quea boejea po meeje'yo.

Jjajjeaqui mee'yo majje chama'yo cua ojaya batata epo'yo. Quea boejea ojaya ejee po'yonaje.

¹⁴ Majoya Jesusaa jama huohuime aca cua ba'a: —¡A'a oe pea cuana huohuijji! ¡Eyacuiñajjija equi yasijje oe poquicue! ¡Jomajo huohuicue Eyacuiñajjija esohui huohuijji: “Jjajjeaqui'yonaje mo” acue! ¡Moisesija etehue'yo jama oe acue! ¡Quiaquicue beca huia', beca ijjiacajji pea'ai, equiajji Eyacuiñajji bihuiajji, miya ojaya ejjajjeaqui mee'yohua jjejojo! Majoya esohui huohuijji cuana

jjabahuejjaquije miquea batata epo'yo chama'yo cuanajejo. Majoya ojjaña jjabahuejjaquije miya quea bojea po'yonaajejo —Jesosaa aca cua.

¹⁵ Jamatii quea huiso dejjaa shajja'ajja ca cua Jesosaa jjajeaqui mee ca'yani batata epo'yo. Ohuaya jjaajaqui mee ca'yani emanojaa cuana. Jamajjeya quea dejja huiso nee cueyanaje shajja'ajjaa, jjaajaqui'yohua pea'ai. ¹⁶ Jamatii Jesosa poqui nequia cua dejjama huasijje Eyacuiñajji nijje mimiya.

Jesosaa jjaajaqui mee ca'yonaaje oe dejja jeo'ajjajaa

(Mateo 9.1-8; Macoso 2.1-12)

¹⁷ Oe pojajajo Jesosa poquinaje onaja equi yasijje esohui huohuiya. Paniseo dejja cuana, Moisesija etehue'yo huohuijji cuana pea'ai cueyanaje Eyacuiñajjija esohui shajja'ajjaa. Quea dejja huiso pea meshijo ba'e cuana cueyanaje, Janinea meshijo ba'e cuana. Jodea meshijo ba'e cuana, Jenosanenajo ba'e cuana pea'ai cueyanaje. Jesosaa Eyacuiñajji nijjeya quea huiso emanojaa jjaajaqui mee ca'yonaaje. ¹⁸ Jamajjeya pea dejjaa oe dejja jeo'ajjajaa ye ca cua equi yasijje. Dojodobiaqui sa aca cua Jesosa que. ¹⁹ Dobiqúi meemee ajja cuana cua quea dejja huisojojo. Jamajjeya aje dojosohua ca'ya cua equi jamacoo huasijje. Huejja ca cua eyiyesama neijje. Jesosa nequi cojja nei jea'oquea ca cua. ²⁰ Jesosaa ba ca cua dejja jeo'ajjajaa ojaya epeejji pea'ai. Jjashahuabaquia cua jama ba'a: —E'e de, jiquio dejja cuanaja eba eyaya jjaajaqui meeje'yo emanojaa cuana.

Jamajjeya jeo'ajjajaa huohui canaje jama ba'a: —E'e ecuea epeeji, jjeya miquea mimishi eyaya cuijeaje'yo.

²¹ Majoya Paniseo cuana, Moisesija etehue'yo huohuiji cuana pea'ai jjashahuaba taiquia cua; Jesosa Eyacuiñajji Bacua pojjeama poso aca cua. Jama cua ba'a: —Jesosa quea tai cuani, de. Oya Eyacuiñajji jama cuani. Oe nei Eyacuiñajjiya mimishi cuijea caje'yo. Jesosaja ca ecuijea'yojji pojjeama —poso aca cua.

²² Jesosaja eba ojaya jjashahuabaquijji cuana. Jamajjeya huohui ca cua jama ba'a: —Miquianaya jjashahuaba taiquiani, de. ²³ ¿Ache esohui ca-maja'ama so'o? Jiquio pojja'a ba'a: “¡Eyaya miquea mimishi cuijeaje'yo!” Pea esohui pojja'a: “¡Nequisohuacue, poqui'ajja socue!” ²⁴ E'e de, eyaya huohuije jiquio dejja jeo'ajjajaa huasijje jama ba'a: “¡Nequisohuacue; miquea equipajaajji bebo majje poqui'yocue miquea equi yasijje!”

Pea cuana huasijje Jesosa jama cua ba'a: —¡Pea cuana shajja'ajjacue, ejjabahuejjaquijji! Eyaya ojjañaja Emeshi Mese nei cuani. Eyaya miquianajaya mimishi cuijea mee yaña ojjaña meshijo ba'eja —jamaya Jesosa cua.

²⁵ Majoya aje dejja ejjachichacui nequijo jeo'ajjajaa nequisohua'ya cua, poqui'ya cua oja equi yasijje. Oya quea bihui cua Eyacuiñajji nijje, Jesosa nijje pea'ai. ²⁶ Pea cuaa Eyacuiñajji bihuia ca cua jama ba'a: —E'e, eseyaya banaje jiquio dejja jeo'ajjajaa jjeya jeojeo'yoqui, mimishi cuijea ca'yonaje pea'ai, de.

Ojjaña cuana Jesosa nijje quea bihui nee nee cuanaje jeo'ajjajaa jjaajaqui mee ca'yajo.

Jesosaa Nemi iyaa ca cua ojaya epeeji epojji
(Mateo 9.9-13; Macoso 2.13-17)

²⁷ Majoya Jesosa equijo ani cuayaquia cua. Poquijeya ohuaya ba canaje Nemi ona emeshi meseja esohuijo sosejjeshejji cuani eba'ejji sosejje. Oya equi sisi e'iyajo ani ejiojji cojja sahuajo. Oya siipojji, de, jamajjeya oya ojjañaja boti'ama. Jesosaa oya ba majje jama aca cua ba'a: —Nemi, ¡cue'ajja; ecuea epeeji po'yocue!

²⁸ Jamajjeya Nemi nequisohua cua; ojaya aquiana jeajeana majje poquia cua Jesosa nijje. ²⁹ Quijje pishana Nemiya iyaa ca cua ojaya epeeji cuana e'ijjia'ijjiajji Jesosa nijje. Iyaa ca cua ona sosejjeshejji cuana, pea dejja cuana pea'ai. ³⁰ Paniseo dejja cuana Moisesija etehue'yo huohuijji cuana pea'aia boti'ama cua ona sosejjeshejji cuana. Jjashahuaba taiquia cua jama ba'a: —Quea mimishi Jesosa, o shajja'ajjajji cuana pea'ai. ¿Yajjajje acuae dejja mimishi cuana nijje ijjia'ijjiani? Quea mimishi epojji pojja'a.

³¹ Jesosaja eba ojaya ejjashahuabaquijji. Jamajjeya huohui ca cua jama ba'a: —¿A'a miquianajaya shajja'ajja jjima jiquio esohui pojja'a? Jama ba'a: “Dejja quea aja eshicuijji bajji yasijje poqui sa po ajja. Emanojaa ca eshicuijji bajji yasijje poquiani”. Jamaya miquianaya joya mimishi'ama poso jjabaquiani. Jamajjeya miquianaya shajja'ajja sa po ajja ecuea esohui. Pea cuana ca quea mimishi nee neeya shajja'ajja cani ecuea esohui. Jamajjeya eya ijjia'ijjiani mimishi cuana nijje. ³² Eya cue'yonaje dejja mimishi iyaaa. Dejja mimishi'ama cuani poso iyaa sa po ajja iña. Dejja

joya quea mimishi nee nee iyaaje mimishi pajea mee'yojji.

*Bobi ijia jjima yajjijo huohui'ajja canaje cuaa
(Mateo 9.14-17; Macoso 2.18-22)*

³³ Paniseo cuaa Moisesija etehue'yo huohuijji cuaa Jesosa huohui'ajja ca cua jama ba'a: — Eseyaya etiquiana jamaya huohui cani ba'a: “¡A'a ijia'ijjiajji jiquio pojjajo! ¡A'a jjashahuabaquijji bobijo; jjashahuabaquicue Eyacuiñajjijo nei! ¡Mimicue onijje, quea yeno pocue!” jamaya eseyaya etiquiaa huohui cani. Huani shajja'ajjajji cuaa jamaya acani pea'ai. Jesosa, mi shajja'ajjajji cuana ca ca ijia'ijjiani tii. ¿Yajjaje shai? Quea mimishi cuani pojja'a.

³⁴ Jesosaa jama aca cua ba'a: —E shajja'ajjajji cuana enijje ijia'ijjiani. Ecuea eba nei nei Eyacuiñajjija esohui e'e jojo nei. Ma esohui huohuijji cuanaja esohui ecuanajaya jjeyahua e'ajji pojjeama. Ejjahuanaquijji pojjajo ojjaña quea bihui cuani, ijia'ijjiani, quea yeno pojjeama cuani.

³⁵ O huanajji epo mano'yajo ojjaña quea yeno cuaje. Ma pojjajo ijia'ijjia sa po ajja cuaje. Jjashahuabaquije'yo emano'yojo. Eya jiquio ecua yahue mano'yani jayojja cuaje. Jjeya ecuanaya quea bihui cuani ijia'ijjiani. Eya quijje pishana manojje'yo. Majoya ecuea epeeji cuana quea yeno cuaje; ma pojjajoya bobi ijia jjima acaje —jamaya Jesosa cua.

³⁶ Majoya ohuaya ojaya esohui huohui ca cua ejjashahuabaquijji jama ba'a: —Daqui eyacua isajea ca ajja daqui chii jaca'yojji. Chojja. Miquea daqui eyacua isajea'yo majje daqui

chii jaca'yojji'yajo, daqui eyacua ehuosho'yojji pojjeama. Daqui chii ejaca'yojji poqui ajja cuiñajji yasijje daqui chiiiji jjejojo.

³⁷ —Ecuea pea esohui jama cuani: Ijjiacajji jee eyacua monsa pojji acajji ena sese nequijji. Ma ena seseya ejee eyacua shejjee mee cani. Majoya oe huana cani cuaa pea ena sese ejee chiijo cuiapojjea caje'yo shejjee majje. ³⁸ Jamajjeya huana cani cuaa ena sese monsa eyacuajo cuiapojjea jjima yajji.

³⁹ —Jamaya ecue sohui eyacua cuani. ¡Miquianaya ecuea epeeji nei po sa cuanijo shajja'ajjacue ojjaña ecue sohui! Beca cuana shajja'ajja sa po ajja ecue sohui eyacuajojo. Jjashahuaba taiquiani, de. Etiqianaja esohui ejee echii jayojja. ¡Jamajjeya ecue sohui oe shajja'ajjacue! —jamaya Jesosa cua.

6

Jesosa shajja'ajjajji cuaa anoso sejja ca cua ejomishocajji pojjajo

(Mateo 12.1-8; Macoso 2.23-28)

¹ Oe ejomishocajji pojjajo Jesosa o shajja'ajjajji cuana nijje poquia cua anoso ai nequi yiyesamajje. O shajja'ajjajji cuaa emeya sejja ca cua anoso eshe tii e'ijjajji quea shoeya jjejojo. ² Majoya Paniseo cuaa Jesosa o shajja'ajjajji cuana ba ca cua. Jesosa nijje mimijajinaje jama ba'a: —¿Yajjajo acuaeya epojja ejomishocajjiijo anoso sejja mee yaña so'o? Moisesija etehue'yo jamaya cuani ba'a: “¡A'a chacojji ejomishocajji pojjajo!”

³ Jesosaa jama aca cua ba'a: —Miya quea sohui tai cuanaje; Eyacuiñajjija esohui nei pojjeama aña miquianaaya. Miquianaya jjashahuaba taiquiiani, de. ¿A'a miquea ba jjima pojja'a ma etiiquiiana, emeshi mese Dabi bajjani? Jama etehue'yo yani Dabijo ba'a: Oya Eyacuiñajjija epeeji nei. Oe pojjaajo oya oja epeeji cuana nijje poquiije, ⁴ dobiquinana cua Eyacuiñajjija equi yasijje bobi sa'ajjaa quea shoe nee neejojo. Ma equijo ani pahui ijia ca'yonaje; quia ca'yonaje ojaya epeeji cuana huasijje pea'ai. Eyacuiñajjija etehue'yo jama cuani ba'a: “Jiquio pahui Eyacuiñajji nijje mimianija e'ijiajjime”. Jamatii Dabi ca mimishi'ama cuanaje. Oya poquianinaje Eyacuiñajjijo chacochocho neineiya. Jamaya aca cua Dabiya. ⁵ Ecuana Dabi jayojja cuani. Eya Eyacuiñajjijo chacochocho neineiiani. Jamajjeya ecuaaya jiquio anoso ai señaña ejomishocajji pojjaajo —Jesosa cua.

Oe dejja meshahuama'yo epo Jesosaa jjameshahuanequi mee ca'ya cua

(Mateo 12.9-14; Macoso 3.1-6)

⁶ Pea ejomishocajji pojjaajo Jesosa poquia cua Jodioja equi ejjachichaquijji yasijje esohui huohuiya. Oe dejja meshahuama'yo epo ania cua jomajo. ⁷ Paniseo dejja cuana, Moisesija etehue'yo huohuijji cuana jjashahuaba taiquia cua Jesosajo jama ba'a: —Jesosa shajjama' jayojja ecuanaja esohuijo cuani. Ohuaya chaco caje ejomishicajji pojjaajo pojja'a; jjameshahuanequi mee caje'yo dejja meshahuama'yo epo. Jesosa jamaya shajjama' cuajo ecuaaya oya iñaje'yo edojjiji ejeadobiaejaji.

⁸ Jeshosaja onajaya ejjashahuaba taiquijji eba cua. Jamajjeya ohuaya ma dejja meshahuama'yo epo ani huohui ca cua jama ba'a: — Meshahuama'yo epo, ¡nequisohuacue ojjañaja ebajji! —Jesosaa aca cua.

Jamajjeya oya nequisohua cua. ⁹ Jeshosaa huohui ca cua pea cuana jama ba'a: —Eyaya miquianaya huohui'ajjaje: ¿Ache quea bame epojji ejomishocajji pojjajo? Quea bame mi ba'e mee cajji chi. Quea tai mi ba'e mee cajji chi. Ba'e mee cajji mi chi. Quecua ca'yojji mi chi.

¹⁰ Jamajjeya ohuaya pea cuana huasijje ba majje ma dejja huohui ca cua jama ba'a: —¡Eme jeapisa'ajja'yosocue!

Majoya eme jeapisa ca'ya cua. ¹¹ Beca cuana quea quene nee nee cua. Jama mimimimia cua ba'a: —Jesosa shajjama' nei nei cuani ecue esohuijo. Ohuaya jjameshahuanequi mee ca'yonaje ejomishocajji pojjajo. ¿Yajja acuae seya Jeshosa aje jjeyahua nei e'ñajji? —jamaya cua Jodio dejja cuana Jeshosa ñajji nisho.

Jesosaa chicha ca cua o shajja'ajjajji cuana 12 huisome

(Mateo 10.1-4; Macoso 3.13-19)

¹² Oe pojjajo Jeshosa poquia cua eyiyo quibo huasijje mimiya Eyacuiñajji nijje. Ojjaña mecajje mimia cua onijje. ¹³ Eshequi jaasohuanijo, jjachichaquia cua o shajja'ajjajji cuana nijje.

¹⁴ Oya cuana yohua bajjani cua ba'a: Simohui, quijje Jeshosaa oya pea bajjani Peno aca'ya cua; Simohuija chahua yohua bajjani ba'a: Anesi; pea o shajja'ajjajji ca yohua bajjani cua ba'a:

Jacobo, Huani, Penipe, Manotonome, ¹⁵ Mateo, Tomasi, Apeoja bacua bajjani Satiaco; Simoni, ojaya meshi quea boti nee nee cua, ¹⁶ Jacoboja bacua Jode bajjani. Pea dejja yohua bajjani cua ba'a: Jodasa Isicaniote, oya Jesusaja epeeji nisho cua. Mahuiso o shajja'ajjajji cuana e'e jojo nei cua.

Jesosaa quea dejja huiso huasijje Eyacuiñajjiya esohui huohui ca cua
(Mateo 4.23-25)

¹⁷ Majoya Jesosa o shajja'ajjajji cuana nijje eyiy-ojo ani jaaoque o'oya cua. Jaaoque majje nequi'ya cua meshi bame bamejo esohui huohuiya. Quea huiso Jesusaja pea e shajja'ajjajji cuana jomajo ania cua. Quea dejja huiso cueya cua, Jodea meshijo ba'e cuana, Jenosanenajo ba'e cuana, Tinojo ba'e cuana, Sinonojo ba'e cuana pea'ai. Quea huesha ba'e cuana cueya cua Jesosa shajja'ajjaa. ¹⁸ Ojjaña shajja'ajja'yo sa aca cua, jjaajaqui'yo sa cua pea'ai. Pea cuanajo nequi eshahua cuayaqui mee ca'ya cua Jesusaa. ¹⁹ Ojjaña Jesosa napa sa aca cua pea jjaajaqui mee'yojjijoyo. Jesusaa emeya napa cajje jjaajaqui ca'yonaje cuana.

Jesosaja esohuiya dejja cuana quea bihui po mee caje beca cuana ca quea yeno po mee caje
(Mateo 5.1-12)

²⁰ Majoya Jesusaa ba majje o shajja'ajjajji cuana huohui ca cua jama ba'a: —Beca cuana jjashahuabaquiani jama ba'a: “E'e de, eya quea mimishi nee. Eyacuiñajjiya ecuea mimishi cacuijea ca'yahua”. Jamaya jjashahuabaquianijo

Eyacuiñajjiya oya ba'e tiitii mee caje'yo onijje eyajo. ¡Oya cuana quea bihui nee capo'yahua!

²¹—Ojaya epeeji cuana Eyacuiñajjiya esohui jayojja jama a sa neinei cuanijo Eyacuiñajjiya oya cuana quea jaji nee nee ba'e meesahua caje'yo. ¡Quea bihui nee capo'yahua oya cuana!

—Oja epeeji cuanaja mimishijo pa neineianijo Eyacuiñajjiya quea bihui nee po mee caje'yo mimishi cuijea ca'yajje.

²²—E'e, ¡miquianaya ecuea epeeji cuana, quea bihui nee nee pocue! Deja cuana miquiana nijje mimijajije, miquianaya deja cuaa cuia caje pea'ai, siajje minijje cuaje pea'ai. Jamatii, miquianaya ecuea epeeji cuanijo, deja cuaa mimishi po mee'yo sa acani. Eyacuiñajjiya ca ca miquianaya quea bihui nee po mee caje'yo.

²³ Jamajjeya ijyehua nei quea bihui nee nee pocue! Eyacuiñajjiya miquianaya eyajo quia caje'yo miquianajaya aquiana quea bame nee nee, quea huiso nee nee. E'e, Eyacuiñajjiya esohui huohuijji yahuajo nei nei ba'ya cua jamaya aca cua mimishi cuaa; napa ca cua pea'ai. Jamajjeya jona jayojja jama pocue, quea bei!

²⁴—Joyaya nequiana oe quea aquiana huiso jjejojo, Eyacuiñajjiyo jjashahuabaqui jjima. ¡Bacue! ¡Jjeya miquianaya quea bihui nee nee jjabaquicue! Majoya aje mi oe quiije quea yeno nee nee cuaje'yo cuaqui yasijje poqui majje mano'yo majje.

²⁵—E'e de, ¡joyaya nequiana oe bobijo jjashahuabaquiani jjejojo Eyacuiñajjiyo jjashahuabaqui ajja bacue! ¡Jjeya miquianaya quea jeje jjejojo quea bei jjabaquicue! Majoya

aje mi oe quijje quea shoe nee nee, quea yeno nee nee cuaje'yo. Bobima' nei cuaje cuaqui yasijje poqui'yo majje.

—¡Joyaya mi oe quea bihui jjejojo soa ani jjabaquicue! Eyacuiñajjijo jjashahuabaqui ajja, quijje pa neineiye'yo; quea yeno nee nee cuaje'yo cuaqui yasijje poqui'yo majje.

²⁶ —¡A'a oe esohui huohuijji nisho pojji, dejja quea bihui epo meeji nisho pojji! Ma ecua esohui huohuijji nisho etiquiaa quea bihui po mee ca cua jama. Jama po majjeya aje mi oe quijje cuaqui yasijje poqui'yo majje quea yeno nee nee cuaje'yo.

Quea boti nee a'yocue dejja cuana minijje quea quene cuani

(Mateo 5.38-48; 7.12)

²⁷ Jesosaa jama aca cua ba'a: — ¡Jjashajja'ajjaquicue oe! ¡A'a oe ona boti'ama pojji! ²⁸ ¡Quea boti a'yocue dejja minijje quea quene cuani! ¡Joya miquiana nijje mimijajianijo mimicue Eyacuiñajji nijje ojo! ²⁹ ¡Onaa shemo cuia cajje shemo mijipeajje cuia mee o'oyacue! ¡Onaa miquianajaya daqui jjequisejjajea cajo dojo mee'yocue miquianajaya pea daqui pea'ai! ³⁰ Onaa: “¡Aquiana che mo quiacue!” acajje, ¡quiacueya oe! Onaa miquianajaya aquiana sii cajo ¡a'a huohui'ajja'yojji! ³¹ Miquianaya mimiani pea cuana nijje jama ba'a: “¡Enijje quea bame nee po tiitii'yocue!” ¡Jamajjeya miquianaya pea cuana nijje quea bame nee po tiitii'yocue!

³² —Joya miquiana quea jea ajji cuani miquiaaya quea jea nee aña pea'ai; miquiana nijje quea quene cuani ca ca miquianajaya

boti'ama. Dejja mimishi cuana aje oe jamaya cuani pea'ai. ¡A'a dejja mimishi jayojjaya pojji! ¡Ojjaña quea jea nee nee acue! ³³ Miquianaaya miquianajaya epeeji quea bame año, pea cuana caya ca oe boti'ama año. Dejja mimishi cuaa aje oe jamaya acani pea'ai, de. ¡A'a dejja mimishi jayojja pojji; ojjaña quea bame acue! ³⁴ Miquianaaya joya jjaquiaqui'yojji yasijje quiaña. Joya jjaquiaqui'yo ajja huasijje quia jjima año. Dejja mimishi cuana aje oe jamaya cuani pea'ai. ¡A'a dejja mimishi jayojja pojji! ¡A'a quea dejja tai pojji! ¡A'a quea nishehui pojji! ³⁵ ¡Miquianaaya miquianajaya epeeji pojjeama cuana quea jea nee a'yocue! Jamajjeya quea bame ba'eje'yo. ¡Pea cuana miquianajaya aquiana dojo sa cuanijo oe pojji cahuime dojo meecue! ¡Miquianaya a'a jjashahuabaquijji miquianajaya aquianajo, miquianajaya bejjojo! ¡Eyacuiñajjiyo oe jjashahuabaquicue! Majoya miquianaya ojaya epeeji nei cuaje'yo. Eyacuiñajjiya ojjaña cuanaya quea jea nee nee acani. Ojjaña dejja cuana, ojaya epeeji cuana, ojaya epeeji pojjeama cuanaya quea jea nee acani, de. ¡Jamaya oe pocue! ³⁶ E'e de, esejaya Chii eyajo quea bame nee ani, ojjaña cuana Eyacuiñajjiya quea jea nee nee acani. ¡Eyacuiñajji jayojjaya jama po tiitiicue!

¡A'a pea cuana niñebajji!
(Mateo 7.1-5)

³⁷ Jesúsaa jama aca cua ba'a: —¡A'a pea niñebajji! Jamaya Eyacuiñajjiya boti'ama. Miquianaya pea cuana niñebajji cuanijo, Eyacuiñajjiya miquianaya tecuea caje'yo pea'ai. Miquianaya pea nijje

jjabeiqui'yajo Eyacuiñajjiya miqúanajaya mimishi cuijea caje'yo. ³⁸ Miqúanaya pea cuana huasijje quea huiso nee quiajo, jamaya quea huiso nee nee miqúanaya Eyacuiñajjiya oya huisoajjaya quia caje'yo pea'ai. Quea huiso nee nee cuaje, de. Oe pojji quiajo ca ca miqúanaya Eyacuiñajjiya oya huisoajjaya quia caje'yo —jamaya Jesosa cua.

³⁹ Jesosaa pea esohui ejjashahuabaqui meejji jama aca cua ba'a: —E'e de, ¿a'a acuae oe cojjamaa pea cojjama' me pejejea majje dojo caje so'o? Cho, eme pejejeajji pojjeama, o pea'ai oquejeajji mei jjani yasijje, de. Cojjama' jayojja dejja mimishi pea dejja mimishiya dojo cajje cuaqui yasijje poquije'yo onijje tii. ¡A'a cojjama' jayojja pojji! ⁴⁰ Oe esohui huohuijji quea ja'a nee nee cuani. Ohua esohui huohui coo canijo, o shajja'ajjajji cuana quea ja'a pishana cuani. Jamatii ma eshajja'ajjajji quea ja'a cuaje ojaya esohui huohuijji shajja'ajja neinei majje. Jamajjeya ¡ecuea esohui shajja'ajja neineicue quea ja'a epojji! Jamajjeya miqúanaya quea ja'a nee huohuije pea cuana huasijje.

⁴¹ —Jamajjeya ¡jjashahuaba bamebamequicue; a'a pea niñebajji! Jamatii miqúanajaya epeejji cuana quea mimishi cuajo, niñebaña. ¡A'a jamaya pojji! ¡Miyaya ebionei miquea mimishi cuana pajea'yocue! ¡Majoya miyaya pea cuana mimishi pajea meesahua'yocue! ⁴² Oya jayojja yani miquea epeejji ecojjajo shabo mimishi jayojja. Jamajjeya miya jjashahuabaquiani miquea epeejji ecojjajo nequi shabojo cuaya mee'yo sa aña jama ba'a: “Epeejji, shabo biso neiya mi cojja dobi canaje. Ache ba'ajja; cahuijji'ajja'yosahua”.

¿A'a acuae jja oe miya jjabaquiani acui cojjajji so'o? ¡Ebionei miquea cojjajo nequi acui huijjia'yo socue! ¡Majoya miquea epeejjija shabo huijjia'yocue! —jamaya Jesosa cua.

*¡Acui quea bame nee jayojja jama pocue!
(Mateo 7.17-20; 12.34-35)*

⁴³ Jesosaa jama aca cua ba'a: —Oe acui quea bame, ojaya ejjajja quea bame pea'ai. Pea acui quea tai, jamajjeya ojaya ejjajja quea tai cuani pea'ai. ⁴⁴ Oe acui ejjajja nei cuani, pea jjajjame pojjeama cuani. ⁴⁵ ¡Miquianaya oe jjashahuabaquicue, acui quea bame nee jayojja jama pocue! ¡Quea bame nee jjashahuabaquicue Eyacuiñajjijo! Majoya miquianaya quea bame ba'eje'yo. ¡A'a jjashahuaba taiquijji oe acui quea tai jayojja! Miquianaya jjashahuaba taiquijajo miquianajaya esohui quea tai cuaje'yo ma acuijjajja quea tai jayojjaya. ¡Jamatii jjashahuabaquicue Eyacuiñajjijo, ojaya esohuijo! ¡Quea bame ba'e tiitiicue pea dejja cuana nijje! —jamaya Jesosa cua.

*Oe dejja jjashajja'ajja neinei quia cua pea jjashajja'ajjaqui ajja cua
(Mateo 7.24-27)*

⁴⁶ Jesosaa pea esohui huohui ca cua jama ba'a: —Miquianaaya eya huohui nishoaña jama ba'a: “Emeshi Mese, eya shajja'ajja sa cuani miquea esohui”. Cho, ecuea esohuijo jjashajja'ajjaqui sa po ajja miquianaya —Jesosa cua—. ⁴⁷ Eyaya miquianaya huohuije beca dejjajo jama ba'a: Oe dejjaa equi iya bamebame canaje jayojja jama miquianaya jjashajja'ajja neineiquiani ecue esohuijo. Dejjaa equi iya canaje quea bame nee nee.

⁴⁸ Ohuaya tio canaje jjani emaco huasijje. Quea doe nee tio canaje. Majoya quea ca'a nee nee nequinaje equi yamajjana. Jama acanaje ojaya equi. Equi iya majje ena quea quemo cueyanaje, beni quea quemo cueyanaje pea'ai. Cuei jjayehuequi'yajo jaabichaqui'yo jjima equi cuanaje. Quea ca'a iyame jojoya mi jaabichaqui'yonaje —Jesosa cua—. Jamaya ecuea esohui shajja'ajja majje miqianaya quea ca'a cuaje ma equi jayojjaya.

⁴⁹ —Beca cuana jjashajja'ajjaqui ajja ecuea esohuijo jiquio ecua oe dejjaa iya tai canaje ojaya equi. Cuei sahuajo ba'e'yonaje. Ohuaya tio canaje jjani sisi; doe'ama. Ena quea quemo cuajo, beni quea quemo cuajo, cuei jjayehuequi'yajo ojaya equi jaabichaqui'yonaje; ca'a'ama equi cuanaje, de. Jamaya miqianaya ca'a'ama cuaje, ecuea esohuijo jjashajja'ajjaqui ajjajo —jamaya Jesosa cua.

7

Jesosaa jjaajaqui mee ca ya'cua esohuinano meseja echacojji
(Mateo 8.5-13)

¹ Jesosa dejja cuana nijje mimijeyo majje poquia cua Capenaoma cuiñajji yasijje. Oe Shomano esohuinano mese jomajo ba'ya cua. ² Ojo chacochoani emanojaa cua. Beshahua nei poquijeyoa cua, de. Ma ojo chacochoani quea bame chacochoani cua. Jamajjeya esohuinano meseya huaquia mee'yo sa aca cua. ³ Ohuaya shajja'ajja ca cua Jesosa yani, Jesosaa pea cuana jjaajaqui mee ca'yani. Jamajjeya esohuinano mese jama

jjashahuabaquime cua ba'a: —¿A'a Jesosaa ejo chacochoacoani jjaajaqui mee caje'yo? Caba'ajja.

Jamajjeya ohuaya huoojea ca cua Jodio etii cuana Jesosa huohui'ajjaa. Oya jama cua ba'a: —¡Poquicue; Jesosa huohui'ajjaquicue jiquiacua ecuejji! “¡Jjaajaqui meehua'yocue ejo chacochoacoani!” acue —jamaya cua esohuinano mese.

⁴ Majoya aje Jodio etii cuana poquia cua Jesosa huohui'ajjaa. Huohui'ajja cañaquia cua esohuinano meseja esohui jama ba'a: —Jesosa, esohuinano meseya ecuana mi que huoojea canaje, jojo chacochoacoani jjaajaqui meequi'yocue pa! Esohuinano meseya aje oe quea bame nee nee nequi. ⁵ Jodio dejja cuana ohuaya quea bame nee ba'e meesahua cani. Ojaya ecuanaya quea boti nee nee, de. Ohuaya iya mee canaje equi ejjachichaquijji ecuanaja meshijo, de —jamaya cua Jodio etii cuana.

⁶ Majoya aje Jesosa jama cua ba'a: —E'e, cua'a.

Majoya aje poquia cua esohuinano meseja equi yasijje. Equi chipi nei cuajo esohuinano meseya huoojea ca cua ojaya epeejji cuana Jesosa huohuiya. Jama aca cua ba'a: —Jesosa, ¡a'a miya cuejji! Miquea esohui quea poja nee nee. Jamajjeya ¡ejo chacochoacoani miya miquea esohuijo jjaajaqui mee'yocue! Eya esohuinano mese, jamajjeya miya pojja'a dobiqui sa po ajja ecuea equi yasijje. Eya jjashahuabaquiani miya pojja'a enijje mimi sa po ajja. ⁷ Jamajjeya eyaya ecuea epeejji huoojeanaje minijje mimiya. Jomajo mimicue miquea esohui nei jama ba'a: “¡Ojo chacochoacoani jjaajaqui'yocue!” Majoya jiquiojo ejo chacochoacoani jjaajaquije'yo. ⁸ Jamaya ecuea emeshi

meseya huohui cajje eya poquije'yo. Ecuea sohuinano cuana eya huoojeajje poquije. Pea sohuinano eyaya iyaaajje cueje. Ecuea echacojji eyaya chaco meeajje chaco caje, de. Jamaya miya huohuiajje ecuea echacojji jjaajaquije'yo — jamaya esohuinano mese huoojeameya aca cua Jesosa que.

Jamajjeya ma ohua huoojea ca cua poquia cua, huohui cañaquia cua Jesosa esohuinano meseja esohuijo.

⁹ Jesosaa shajja'ajja ca cua. Quea bihui cua esohuinano meseja esohuijo. Jesosaa huohui ca cua pea cuana onijje nequi, jama ba'a: —De, ma esohuinano meseja eba eyaya jiquiojo tii ojo chacochoani jjaajaqui meeje'yo ecuea esohuijo tiya. Jodio dejja cuana jjashahuabaqui neinei jjima oya jayojja. Oya ca ca oe jjapee neineiquinaje Eyacuiñajji nijje —jamaya Jesosa cua.

¹⁰ Majoya esohuinano meseja epeeji cuana poquia cua oja equi yasijje. Majoya aje dobiqui majje ejjaajaqui'yo ani ba cañaqui'ya cua, Jesusaja esohuijo jjaajaqui'yo ani: —¡E'e de, e'e jojo nei ojaya esohui quea poja nee nee, de! —jamaya cuana cua.

Jesosaa shequi mee ca'ya cua e'ahuemano'yoja ebacua ejja emano'yojaa

¹¹ Quijje pishana Jesosa poquia cua Naini yasijje. O shajja'ajjajji cuana, pea cuana pea'ai poquia cua onijje. Quea huiso poquia cua, de. ¹² Jesosaa Naini yasijje poquijeya ba ca cua pea dejja cuaa ebacua ejja emano'yo dojo caje ohuajeeaa. Enaese pa neinei poquia cua. Oya quea yeno nee nee

cua oe nei nei oja bacuajojo, e'ahuemano'yo jje-jojoya. Quea dejja huiso nee onijje cueya cua ebacua ohuajea sahuaa. ¹³ E'ahuemano'yohua Jesosa quea yeno po mee ca cua, de.

Jesosaa majoya oya jama aca cua ba'a: —¡A'a pajji!

Ohuaya shequi mee'yo sa aca cua oja bacua eija. ¹⁴ Majoya aje Jesosa poquia cua ebacua eija emano'yojaa huasijje. Majoya aje ma dejja cuana nequiñaquia cua Jesosa cueje ba majje. Jesosaa emano dojojji napa ca cua. Majoya Jesosaa emano'yojaa jama mimiame aca cua ba'a: — Esho'i, ¡shequi'yocue jjeyahua nei!

¹⁵ Majoya aje ma emano'yojaa anisohua'ya cua. Mimi'ya cua, de. Jesosaa oya jama huohuime aca cua ba'a: —¡Poqui'yocue mique nae nijje!

¹⁶ Ojjaña aje majoya jama cua ba'a: —¡De, esho'i emano neinei'yojaa shequi'yonaje yaña, de! Eyacuiñajjiya oya shequi mee ca'yonaje, de. Ohuaya Jesosa huoojea canaje ecuana huasijje. E'e, oya quea sohui poja nee nee, quea bihui nee nee po mee ca'yonaje ecuanaya. E'e de, e'e jojo nei Jesosa, oya cue'yonaje ecuana ba'e meesahuaa —jamaya ojjaña cuana cua.

¹⁷ Jodea meshijo ba'e cuana, quea huesha ba'e cuana, pea meshijo ba'e cuana pea'ai Jesosajo huohui cañaquia cuaa cua.

*Huaniya o shajja'ajjajji cuana Jesosa que huoo-
jea ca cua*

(Mateo 11.2-19)

¹⁸ Huani Eyacuiñajjiya esohui huohuijjiyojo ejeanobiajaa cua. Jamatii Huani ejeanobiajaajo

o shajja'ajjajji cuaa Jesusaja esohui huohuiqui ca cua Huani que. ¹⁹ Huaniya ma esohui shajja'ajja majje beca o shajja'ajjajji cuana huoojea ca cua Jesosa huohui'ajjaa. Jama huohuime aca cua ba'a: —Huohui'ajjacue Jesosa jama ba'a: “Jesosa, Eyacuiñajjiya ojjaña jaahuanajji huoojea caje'yo ecuana huasijje. ¿A'a miya ma ecuana jaahuanajji cuaniya? E'e pojja'a, pea pojja'a ecuaaya ishoa'ajjaje” jamaya acue —Huaniya aca cua.

²⁰⁻²¹ Jamajjeya Huani shajja'ajjajji cuana poquia cua Jesosa huohui'ajjaa. Jesosa ba cañaquia cua emanojaa cuana jjaajaqui mee'yo cuequi. Es-hahua cuana cuaya meequi'yo cuequi. Cojjama' cuana jjacojjaja'aqui mee'yo cuequi. Majoya oya cuaa huohui'ajja ca cua Huanija esohuijo.

²² Jesusaa jama saja'a ca cua ba'a: —E'e, ¡Huani oe huohuiquicue joya miquiaaya shajja'ajjanaje, joya miquiaaya banaje pea'ai! E'e, cojjama' cuana jjacojjaja'aqui mee'yonaje; jio'ajja cuana jeo mee'yonaje; dejja batata epo'yo cuana jja-jeaqui mee'yonaje; shajjaqueba jjashajjaja'aqui mee'yonaje; emano'yo cuana shequi mee'yonaje. Esohui quea bame nee huohuinaje ojjaña dejja quea yeno huasijje Eyacuiñajji epeeji epo'yojji. ²³ Jamajjeya ¡huohuiquicue Huani que! Jama huohuiquime acue ba'a: ¡Japee tiitiquicue Eyacuiñajji nijje, enijje pea'ai; quea ja'a nee ba'ecue! Jama miya ajje quea bhui po tiitiije'yo —jamaya Jesosa cua.

²⁴ Majoya aje Huani shajja'ajjajji cuana poqui o'oyanaje Huani que. Majoya o poqui'yajo, Jesosa pea cuana nijje Huanijo mimia cua:

—E'e de, yahuajo Huani quimajo aninaje. Miquianaya aje majoya o que poquinaje. ¿A'ya acuae jomajo banaje? ¿A'ya acuae miquianaya jjashahuabaquinaje Huani? ¿A'a jjashahuabaquinaje Huani esohui huohuijji quea ja'a pojjeama? Chojja. ²⁵ Miquianaaya ¿ae banaje Huani que poqui majje? ¿A'a dejjaja daqui quea nahue nee ehuosho ba'e banaje? Chojja, dejjaa daqui quea nahue nee huosho cani equi quea quemojo ba'eya. ²⁶ ¿Achajja acuae Huani ba'enaje? ¿A'a miya jjashahuabaquinaje Huani Eyacuiñajjija esohui huohuijji nei nei? E'e, de. Jamatii Eyacuiñajjija pea esohui huohuijjiya quea ja'a pishana huohui ca cua. Huaniya ca ca quea ja'a nee nee huohui canaje. ²⁷ Yahuajo nei Eyacuiñajjija esohui etehue'yo Huani jama cua ba'a:

“Jiquio dejja ecuea esohui huohuijji nei cuani. Jamaya eya sa cuani. Eyaya oya huoojeaje ebionei mi hui dojojji. Ohuaya dejja cuana huasijje huohui caje miquea ecuejjijo”.

Jamaya yahuajo nei nei Eyacuiñajjija ojjaña ba mee canaje Huaniya e cue jjimahuajo, ejo jjabahuejjaqui mee ca'yonaje cuana. ²⁸ Ecuea pea ehuhui a'a pajea'yojji jama ba'a: Huani ma ona besameejji cua oe dejjaya quea bame nee nee pea cuana jayojja jama pojjeama. Jamatii quijje eya Emeshi Mese nei cuaje, ojjaña ecuea epeejji Huani jayojja jama cuaje'yo quea bame nee nee —jamaya Jesosa cua.

²⁹ Ojjaña dejja Huaniya besamee Jesusaja esohui shajja'ajja majje quea bihui nee nee cua Eyacuiñajji nijje. Ojjaña dejja quea mimishi nee

nee cuani cuaaya Eyacuiñajjija esohui shajja'ajja majje mimishi pajea ca'ya cua. Jamajjeya oya cuana Huanija ebesamee cua. ³⁰ Paniseo deja cuaa Moisesija etehue'yo huohuijji cuaa pea'ai ca ca Huanija esohui shajja'ajja jjima aca cua. Eyacuiñajjijo quea bihui pojjeama cua, Eyacuiñajjija epeeji nei po sa po ajja jjejojo. Jamajjeya Huani que enajje pohua poqui jjima cua, mimishi pajea'yo sa po ajja jjejojo.

³¹ Majoya aje Jesosa jama cua ba'a: —Dejja cuana mimishi pajea'yo sa po ajja ¿a'ya jayojja cuani? ³² Joya ecua esho'iquiana quebanei jayojja jama cuani. Esho'i cuana quebanei po majje joya pea que taaani jama cuaje pea nijje jjapeequi sa po ajja jjejojo. Jama jjamimihue'equime cuani ba'a: “Eyaya dehue miaña mi quea bihui epojji nisho. Jamatii miya quea bihui po sa po ajja. Majoya eya pa nishoani, emano'yojo pa ani jayojjaya mi quea bihui epojji nisho. Jamatii miya pa nisho ajja. Jamajjeya ecuea ba jjima eyaya miya achajja quea bihui po meeme aje. Miya niñepoqui jayojja cuani, jamajjeya quebanei po ajja” jamaya esho'iquiana quebanei cuani —Jesosa cua—. E'e de, jamaya dejja mimishi cuana jjeya cuani ma esho'iquiana jayojjaya. ³³ Yahuajo pishana Huani cue'yonaje. Eyacuiñajji nijje mimi tiitianiyo bobi ijja ajja cuanaje. Acuijjajja na sese ishi jjima aca cua. Ojjaña cuaa ca ca huohui canaje Huanijo jama ba'a: “Huani ca jja ca niñepoqui nei”. ³⁴ Eya ca jja ca ijja'ijjiani dejja mimishi cuana nijje. Oya cuana nijje mimimimiani. Jamatii beca cuana ejo siajje cuani jama ba'a: “¡Bacue jiquio dejja Jesosa! Dejja mimishi cuana nijje jjapeequiani; bejjo chichajji

cuana nijje pea'ai jjapeequiani, de". Jamajjeya beca cuana ca ca jjapeequi sa po ajja enijje, Huani nijje pea'ai. Ecuea ba jjima achajja oya cuana eyaya quea bihui po meeme aje. Oya cuana esho'iquiana quebanei po ani jayojja cuani, de. Niñepoqui jayojja cuani. Oya cuana mimijajiani Huani nijje, enijje pea'ai. ³⁵ Eyacuiñajjija esohui e'e jojo nei. Jamaya ojjaña cuana oja esohuijo jjashajja'ajjaqui majje quea ja'a po mee caje — jamaya Jesosa cua.

Oe Paniseo dejjaja equi yasijje Jesosa anicuaa poquia cua

³⁶ Oe Paniseo dejja yohua bajjani cua ba'a: Simoni. Ohuaya Jesosa e'ijjia'ijjiajji iyaa ca cua. Jamajjeya oja equi yasijje poquia cua ijjia'ijjiaa. ³⁷ Jesosa ijjia'ijjia anijo oe epona dobiquia cua equi yasijjeya Jesosa baa. Ma epona quea mimishi ba'ya cua. Tahuoojo shiyeshiye ye ca cua, Jesosa ba majje. ³⁸ Ojaya mimishijo quea yeno nee nee cua. Pa neinei ania cua. Ecojja naa shacua ca aña cua Jesusaja ejiojji. Ojaya esao ao'aohua cui ca aña cua. Jesosa quea jeajojo jiojji tojjo ca cua. Jesusaja ejiojji tojjo majje shiyeshiyeya jiojji sha ca cua.

³⁹ Ma Simoniya epona ba ca cua; jjashahuaba taiquia cua jama ba'a: —Jesosa Eyacuiñajjija esohui huohuijji nei pojjeama pojja'a. Jamajjeya jiquio epona quea mimishi nee nee ohuaya mi huoojea cani. Eyacuiñajjija esohui huohuijji nei nijje mimishi cuana jjanequichipiqui ajja —jamaya e'acaje'yo poso Simoniya aca cua.

⁴⁰ Jেসোসা জাৰা সিমনিয়া এজাশাহুৱাৰা তাইকুইজি। মাজোৱা জাৰা হুহুইমে জেসোসা অচা চুৱা ৰা'া: — সিমনি, এচুৱা এশুই মি কুৱে এহুহুইজি যানি।

—¡Ocue mo huohui'ajja socue! —Simoni cua.

⁴¹ জামাজ্জিয়া জেসোসা জাৰা হুহুইমে অচা চুৱা ৰা'া: —Oe dejja quea bejjo huiso nee ba'enaje. মাজোৱা এজে ৰেচানেজিইজি পে'াই দেজ্জা পোকুইনেজে ও কুৱে ৰেজ্জা সোসেমা' জ্জেশেয়া, কুইজে এসেজুইয়া'য়জি নিশু। Oe dejjaa iye huiso jjeshe canaje 500. পে'া দেজ্জা চা জ্জেশে চানাজে ৰা'া ও পেজ্জি নেই 50.

⁴² মা দেজ্জা চুৱানাজা ওয়া সোসেজুইয়া'য় জ্জিমা তিই চুৱানেজে। জামাজ্জিয়া মা দেজ্জা কুৱা ৰেজ্জা হুইসু জ্জাপেইকুই সা চুৱানেজে ৰেজ্জা জ্জেশেজ্জি চুৱানেজে চুৱানা নিজে। জামাজ্জিয়া এজ্জেশেজ্জি এপু চুৱানাজা এৰাজ্জানি চুইজে চা'য়নেজে জামাতিই ৰেজ্জা সোসেজুইয়া'য় জ্জিমায়ে তিইয়া। মাজোৱা ওয়া চুৱানা কুৱা ৰিহুই পু'য়নেজে ৰাজ্জানি চুইজে চা'য়াজ্জে। E'e, ¿ache dejja quea bihui nee nee cuanaje oja bejjo sosema'yo tiijojo? মা দেজ্জা কুৱা হুইসু, 500 সোসেজুইয়া জ্জিমা পোজ্জা'া। পে'া দেজ্জা ইয়ে হুইসু, 50 সোসেজুইয়া জ্জিমা পোজ্জা'া —জামায়া হুহুই'াজ্জা চা চুৱা জেসোসা।

⁴³ সিমনি জাৰা চুৱা ৰা'া: —মা দেজ্জা কুৱা হুইসু ৰেজ্জা কুই চানাজে, 500.

জেসোসা জাৰা অচা চুৱা ৰা'া: —E'e de, e'e jojo nei.

⁴⁴ জামায়া জিকুইও এপনা এয়া মিমিশি চুইজে'য়াজ্জে কুৱা ৰিহুই নেই চুৱানি। এয়া ডুবিকুইনেজে মিকুৱা একুই যাসিজে। মিয়া চা মি চা ও এচুৱা এপেইজি পোজ্জেমা চুৱানেজে, সিমনি। জামাতিই ৰেচা চুৱানা চুৱানিজি একুই মেসেয়া ওয়া এপেইজি চুৱানা জিওজি টপু চানি। জামায়া মিকুৱা অজ্জিমা। মা এপনা চা চা এচুৱা এজিওজি টপু চানাজে ওয়া এচোজ্জা না। ওয়া সাও অ'অুৱা চুই চা'য়নেজে। ⁴⁵ E'e, মিয়ায়া এচুৱা এপেইজি পোজ্জেমা জ্জেজোজি মি শেমু টোজ্জনেজে। জিকুইও

eponaa ca mo ca ejiojji tojjo tiitii canaje ojaya quea jea nee neejojo. ⁴⁶ Miyaya eya sha jjima anaje shiyeshiyejo ejjapeequiiji. Jiquio eponaa ca ca ecue ejiojji sha canaje shiyeshiyeya ecuea epeeji nei sa cuaniya jjejojo. ⁴⁷ E'e, jamajjeya eyaya miya huohuiaña jama ba'a: Ma epona jjapeequi sa cuanaje Eyacuiñajji nijje. Jamajjeya aje oe ohuaya ecuea ejiojji topo canaje, quea shiye po mee canaje pea'ai. Ma epona quea mimishi nee nee cuanaje. Jamajjeya eyaya, Eyacuiñajjiya pea'ai oya mimishi cuijea'yonaje quea jea nee neejojo —jamaya Jesosa cua.

⁴⁸ Majoya Jesusaa epona jama huohuime aca cua ba'a: —Miquea mimishi cuana eyaya cuijea'yonaje jjeya nei.

⁴⁹ Pea dejja cuaa equijo ijjiia'ijjiia aniya Jesusajo jama huohuime aca cua ba'a: De, ¿a'ya acuae jja che mimishi cuijea'yojji pome so'o?

⁵⁰ Jesusaja eba cuanaje ma dejja cuana mimi ca'ani. Jamajjeya ohuaya epona huohui ca cua jama ba'a: —¡Miquea mimishi cuijea'yonaje, jamajjeya quea bame ba'e'yocue mimishi'ama! —jamaya Jesosa cua.

8

Epona cuaa Jesosa yohua sahua ca cua

¹ Majoya aje Jesosa pea cuiñajji yasijje poquia cua Eyacuiñajji esohui huohuiya. O shajja'ajjajji nei cuana, 12 poquia cua onijje. ²⁻³ Quea huiso epona cuana poquia cua Jesosa nijje, ma ohuaya yahuajo jjaajaqui mee ca'yonaje, edosiquiana cuaya meequi ca'yonaje pea'ai. Oe epona Sosana bajjani; pea epona Mania Madanena bajjani cua.

Maniaja 7 edosiquiana cuana Jesosaa cuaya mee-qui ca'ya cua. Pea epona Huana bajjani cua. Oya Cosaja ehuanase cua. Cosa emeshi meseja, Enode Antipaja echacojji cuana jaahuanajji cua. Quea huiso epona cuaa bobi jjeshe ca cua oja bejjojo Jesosa bobiajji, o shajja'ajjajji cuani cuana bobiajji pea'ai.

Eso' jeaajajji

(Mateo 13.1-23; Macoso 4.1-20)

⁴ Quea dejja huiso nee nee poquia cua Jesosa shajja'ajjaa. Jjachichaquia cua Jesosa pejejo. Jesosaa huohui ca cua jiquio esohui. Jama huohuime aca cua ba'a: ⁵ —Oe dejja poquinaje que yasijje eso' jeaajaa. Oe pojji eso' jeaaja canaje ejiojji yasijje. Cuichojsi cuaa ma eso' ijji ca'yonaje. ⁶ Pea eso' jeaaja canaje meshi mei biajje ani yasijje. Majoya aje jeaaja cajje pohua'ajja'yonaje. Majoya aje pohua'ajja'yo majje shocana'yonaje. ⁷ Pea eso' jeaaja cajje oquequinaje acuisha yiye yasijje. Majoya aje jeaaja cajje pohua'yonaje. Majoya aje pohua'yo majje acuishaa mano mee ca'yonaje. ⁸ Pea eso' ca ca meshi bame bame yasijje jeaaja canaje. Majoya aje jeaaja cajje tii'yonaje. Majoya aje tii'yo majje quea jjajja huiso nee nee cuanaje, de. E'e, mahuiso. ¡Shajja'ajjacue jiquio esohui; a'a shajjama' jayojja pojji! —jamaya Jesosa cua.

⁹ Quijje o shajja'ajjajji cuana poquia cua Jesosa huohua'ajjaa. Jama huohua'ajjame aca cua ba'a: —¿Yajjajje ma esohui quea quehua cuanaje ecuanaja? —jamaya cua.

¹⁰ Jesosaa jama huohuime aca cua ba'a: — Miquianaya Eyacuiñajjiya ba meesahua caje ojaya

esohui eyacua. Beca cuana shajjama' cuani ca ca
 ohuaya eba meesahuajji pojjeama. Esohui eba
 meesahuajjijo huohuiaña beca cuana shajjama'
 cuanijojo. ¹¹ Jamajjeya eyaya miqúanaya hu-
 huije quea ja'a epojji. Ma eso' Eyacuiñajjija esohui
 jama cuani; meshi dejja jayojja cuani. ¹² Meshi
 ejiojji quea ca'a huasijje eso' oquequinaje, de-
 jja shajjama' Eyacuiñajjija esohui shajja'ajja sa
 po ajja jayojja. Eyacuiñajjija esohui jjaja'aqui
 ajja quea sapa ca'a jjejojo. Cuichojjiya eso' ijja
 cani jayojja jama Edosiquiana etiya Eyacuiñajjija
 esohui pajea mee ca'yani, jjaja'aqui mee jjima
 acani. Jamajjeya ohuaya dejja jjapeequi mee jjima
 acani Eyacuiñajji nijje. ¹³ Meshi mei biajje anijo
 eso' pohua'ajja'yani jama jayojjaya dejja cuaa Ey-
 acuiñajjija esohui shajja'ajja cani. Ebioneiya aje
 ca Eyacuiñajji nijje jjapee nishoquianiya. Ma-
 joya aje pea cuana onijje mimijajiajo Eyacuiñajjija
 esohui pajea ca'yani. Jjapeequi pajea'yani Ey-
 acuiñajji nijje. ¹⁴ Pea dejja meshi acuisha yiye-
 jji jayojja jama. Eyacuiñajjija esohui shajja'ajja
 cani. Ebioneiya aje ca oe shajja'ajja caniya Ey-
 acuiñajji nijje jjapee nishoquiani. Majoya aje
 jjashahuabaqui'yani pea aquianajo quea mimishi
 epo'yojji. Jama jjashahuabaqui'yomeya cuani Ey-
 acuiñajji epajea'yojji. Eyacuiñajjija esohui ebajji
 nisho cuani. Ma eso' acuishaa mano mee ca'yani
 jayojjaya ejjashahuaba taiquijjiya aca'yani Ey-
 acuiñajji nijje epo pajea'yojji. ¹⁵ Pea dejja meshi
 quea bame nee nee jayojja cuani. Eyacuiñajjija
 esohui shajja'ajja neinei cani. Shajja'ajja neinei
 majje Eyacuiñajjija epeeji tii tii cuani. Ohuaya
 ojaya esohui ba neinei cani. Jjashahuaba bame-

bamequiiani. Ma dejja cuana ecuea esohui ba neineiiji epojji —jamaya Jesosa cua.

Esohui ehuohui'yojji cuaquijijjo
(Macoso 4.21-25)

¹⁶ Jesosaa jiquio esohui jama huohuime aca cua ba'a: —¿A'a eseya eseja cuaquijijiya jeaja'a came eshajajo capa nequiya? Chojja. ¿A'a eseya ejaajji quimejjeje nequiya jeaja'a came? Chojja, de. ¡Eseya quea ja'a po mee sa añajo ca eyajo nequia-sohuacue ojjaña quea ja'a epojji! ¹⁷ Jama jayojjaya Eyacuiñajjiya ojjaña ecuea esohui onaaya ba mee caje'yo quiije. Quea ja'a nee cuaje'yo. ¹⁸ Miya ecuea esohui shajja'ajja sa cuanijo Eyacuiñajjiya miya quea ja'a nee nee po mee caje. Beca cuana ecuea esohui shajja'ajja sa po ajjajo ohuaya quea ja'a po mee jjima acaje —jamaya Jesosa cua.

Jesosaja nae, oja chahua pea'ai
(Mateo 12.46-50; Macoso 3.31-35)

¹⁹ Majoya Jesosaja enaese cue'ya cua equi yasi-jje Jesosa ba'yohua. Ba'yo jjima cua ojaya, quea dejja huisojojo. ²⁰ Oe dejjaa Jesosa jama huohuime aca cua ba'a: —Mique naeya mi sa'ajja ca'yoqui mique chahuaa pea'ai.

²¹ Jamaya Jesosa cua ba'a: —E'e de, ojjaña nei neiya Eyacuiñajjiya esohui shajja'ajja neineiiji cuani ecue nae nei nei cuani, ecue chahua nei nei cuani, Eyacuiñajjiya epeeji nei nei cuanijojo —jamaya Jesosa cua.

Jesosaa beni nequioque meequi ca cua
(Mateo 8.23-27; Macoso 4.35-41)

²² Oe pojajajo Jesusaa o shajja'ajjajji cuana jama aca cua ba'a: —¡Cua'a; bae ojje miji yasijje besa poquicue!

²³ Jamajjeya bishe ai yasijje ojjaña ania cua. Jesosa onaa dojobesa cajje cahuia cua. Majoya aje quea ichi po majje beni quea quemoo nee nee cueya cua. Enashajohua bishe nanejea ca cua. ²⁴ Oe dejjaa majoya Jesosa jama ishe'ame aca cua ba'a: —Esohui huohuijji, ¡shequicue oe! Coya aje se hui'i'ya.

Majoya aje Jesosa shequijeana cua onaa ishe'a cajje. Majoya aje shequi majje mimia cua beni nijje, ena nijje pea'ai. Majoya aje o mimiajo beni nequioquequia cua enashajo pea'ai. Majoya aje enashajo po jjima jayojja po'ya cua. ²⁵ O shajja'ajjajji jama mimimeya cua ba'a: —De, Jesosa quea sohui poja nee nee, de. Miminaje beni nijje; beni po jjima jayojja po mee ca'yonaje, de.

Majoya aje Jesusaa jama aca cua ba'a: —¿Yajjaje acuae jja nequiana metenaje so'lo, de? Jjashahuabaqui jjima pojja'a jja nequiana Eyacuñajjijo, de —Jesosa cua.

Dejjaja eyamijo nequi eshahua cuana Jesusaa cuaya meequi ca'ya cua

(Mateo 8.28-34; Macoso 5.1-20)

²⁶ Majoya oya cuana ba'eñaquia cua Jjanana meshi yasijje. Ba'eñaquia cua pea ojje miji yasijje, Janinea ba'e cojja nei besa poquia cua. ²⁷ Jesosa bishejo ani etaja huasijje nequisohuaquiajo, oe dejja cueya cua. Ma dejja quea shahua huiso jjejojo niñepoqui cua. Daquima' nei nei cua; quima' pea'ai. Oya emojeajaaca huasijje ba'ya

cua. ²⁸⁻²⁹ Jamatii oya quea tai po mee canaje eshahuaa. Jamajjeya oya dejja cuaa jeyo ca cua cadenaaa, poqui ajja epojji. Jamatii ca ca cadena jjasejjajeaqui mee ca cua eshahuaa. Poqui mee ca'ya cua ma quima huasijje, de. Ma dejjaa Jesosa ba neinei ca cua. Majoya aje Jesosa nequi cojja nei ecui'oshajjajo nequioqueña cua. Majoya aje Jesusaa jama aca cua ba'a: —¡Eshahua cuana, cuayaqui'yocue!

Majoya ma dejja jama cua ba'a: —De, miya Jesosa, Eyacuiñajjija Bacua Ejja e'e jojo nei. ¡A'a mo miyaya jinapajji so'o! —jamaya cua.

³⁰ Majoya Jesosa jama cua ba'a: —¿Ae bajjani acuae miya?

—Eya Quea Shahua Huiso bajjani —jamaya cua ma dejja quea shahua huiso jjejojo.

³¹ Eshahua cuaa Jesosa jama huohuime aca cua ba'a: —¡A'a ecuana huoojeajji cuaqui yasijje!

³² ¡Ecuana oe cuichi cuanaja yami yasijje dobiqui mee'yocue!

—¡E'e ocuae dobi'ajjaqui socue! —jamaya aca cua Jesusaa.

³³ Majoya aje cuayaqui'ya cua dejjaja eshahua cuana, dobiqui'ya cua cuichi cuana huasijje. Majoya aje cuichi cuana emacojo nequi cuajicuaji jaoquequinana cua bae yasijje; hui'i'ya cua ojjaña. ³⁴ Cuichi hui'ije'yo ba majje cuichi jaahuanajji cuana poquia cua cuiñajji yasijje ojjaña huohuiya. Jama aca cua ba'a: —De, Jesusaa eshahua cuana cuaya mee canaje dejja niñepoqui meejji po nequinaje. Dobiqui mee canaje ecuanaja cuichi

yasijje, hui'i'yonaje ojjaña cuichi, de. Cuajicuajinananaje bae yasijje, hui'i'yonaje. ¡Chama'yo tii, de!

³⁵ Majoya ojjaña dejja cueya cua ae Jesosa po ani baa. Onaaya cue majje ba ca cua ma dejja niñepoqui cuanaje Jesosa pejejeo ani. Ma daquima' cuanaje daquijji ani'yo ba ca'ya cua dejja cuaa; quea bei ani'yo ba ca'ya cua. Jesosa quea so-hui poja nee neejo ojjaña quea mete po'ya cua. ³⁶ Ma niñepoqui bajji cuanajeya Jesosajo huohui ca nequi'ya cua pea meshijo ba'e yasijje jama ba'a: —Jesosaa eshahua cuana cuaya meequi ca'yonaje.

³⁷⁻³⁹ Ojjaña cuana ma meshijo ba'e quea mete nee nee cua. Quea meteya jjejojo Jesosa huoojeajea ca'ya cua. Ma niñepoqui cuanajeya ca ca Jesosa jama huohua'ajjame aca cua ba'a: —Jesosa, eya minijje poqui sa cuani.

Jesosa jama cua ba'a: —Chojja, ¡miya poquicue miquea huapa pojjeama cuana huasijje! ¡Huohuicue ojjaña ma mi Eyacuiñajjiya jama acanaje! —jamaya Jesosa cua.

Majoya aje ma dejja poquia cua o ba'e yasijje huohuiya. Huohui ca'ya cua Jesosaa eshahua cuayaqui mee ca'ya cua.

Jainoja bacua piona emano'yojaa pea epona naji poani tii tii

(Mateo 9.18-26; Macoso 5.21-43)

⁴⁰ Majoya aje Jesosa besajebe'ya cua. Ba'eña'ya cua ojaya meshi yasijje. Ojjaña cuanaja Jesosa quea boti nee cua. Ishoa'ajja ca nequia cuaa cua.

⁴¹ Oe dejja Jaino bajjani Jodioja ejjachichaquijji equi jaahuanajji cua Cesanenajo. Oya cueya cua

Jesosa que. O cojja nei ecui'oshajjajo nequioqueña cua. Ohuaya Jesosa huohua'ajja ca cua ojaya equi yasijje epoquijji oja bacua piona jjaajaqui mee'yojji. Ojaya ebacua piona ahuema'ani quea mano nee nee cua. ⁴² Oja bacua piona oe nei cua, de. Majoya aje Jesosa onijje poquia cua. Beshahua nei poqui jjima cua quea dejja huisojojo. ⁴³ Oe pea epona quea mano dejja quea huiso yiye-samajo nequi. Oya quea mano nee nee, ojaya ena' cuayaqui nequia cua 12 shequiajame, de. Oya eshicuijji jjeshejji jjejojo bejjoma'yo cua. Eshicuijji quiajjija epona na' cuaya pajea meequi'yo jjima cua. ⁴⁴ Jesosa poquianijo ohuaya Jesusaja daqui cuesha iña ca cua. Ma daqui cuesha iña cajje aje najji popajea mee ca'ya cua. ⁴⁵ Majoya aje Jesusaa jama aca cua ba'a: —¿Aya acuae mo iña canaje so'o?

O shajja'ajjajjiya, Penohua jama aca cua ba'a: —Cua'a, de. Quea dejja huisohua jjejojo mi, ¿aya shai mi iña canaje Jesosa? Napa jjima ca mi ca ecuanaja —jamaya Jesosa aca cua Penohua.

⁴⁶ Jesosa jama cua ba'a: —Cho, ecuea eba Eyacuiñajjiya a'ya shai huaquia mee ca'yonaje e daqui iña cajo.

⁴⁷ Ma epona Jesusaja esohui shajja'ajja majje piopio cua. Ojjaña nequijo piopiojea cua. Ecui'oshajjajo nequioqueña cua Jesosa nequi yasijje. Ohuaya Jesosa jama huohuime aca cua ba'a: —E'e ee, Jesosa, eyaya nei miquea daqui cuesha iñanaje. Jjashahuabaqui majje che mi daqui iña majje ena' huosa mee'yojji. Jamajjeya che eyaya jamaya miya anaje —jamaya ma epona cua.

48 Majoya Jesosa jama cua ba'a: —¡A'a quea mete pojji, she! Eyaya miya na' huosa mee'yonaje, miya jjashahuaba neineiquinajejojo. ¡Poquicue, quea bihui po'yocue!

49 Jesosa epona nijje mimianijo tii Jainoja epeeji cueya cua Jaino que. Jama cua ba'a: —Jaino, miquea ebacua piona mano'yonaje. Chama'yo tii, de. ¡A'a poqui meeji ma esohui huohuiji nei!

50 Jesusaa ma esohui shajja'ajja majje jama huohuime aca cua ba'a: —¡A'a miya quea mete pojji! ¡jjashahuaba neineiquicue oe Eyacuiñajjijo! Miquea bacua jjeya shequije'yo.

51 Majoya Jainoja equi yasijje poquiña cua. Jesusaa beca cuana dobiqúi mee jjima aca cua equi yasijje. Peno, Satiaco, Huani ca ca oe dobiqúi mee ca cua. Ma ebacuaaja chii enaese pea'ai dobiqúi mee ca cua. Mahuiso dobiquia cua emano'yojaa baa.

52 Dobiqúi majje oya cuaa ba ca cua ojjaña pa'ani quea yeno nee nee jjejojo, ebacua emano'yojaaajo. Jesusaa jama huohuime aca cua ba'a: —¡A'a pajji! Ma epona sho'i mano'yo jjima, ecahuijaa.

53 Majoya ojjaña soa'ya cua. Ojjaña jama aca cua ba'a: —Chojja, mano neinei'yonaje jja coma, de —cuana cua.

54 Majoya aje Jesusaa epona sho'ija eme iña majje janobajjima nei mimia cua jama ba'a: —¡Esho'i, nequisohuacue!

55 Majoya aje shequi'ya cua, nequisohua'ya cua: —¡Quiacue oya bobi! —Jesusa cua.

56 Ma esho'ija chii quea bihui po'ya cua oja nae pea'ai. Jesosa jama cua ba'a: —¡A'a

huohuijji cuana jiquio eya mique bacua shequi mee'yonajejo! —jamaya Jesosaa aca cua.

9

Jesosaa o shajja'ajjajji cuana 12 huoojea ca cua esohui huohuiya

(Mateo 10.5-15; Macoso 6.7-13)

¹⁻² Jesosa jjachichaquia cua o shajja'ajjajji cuana nijje, 12 huisome nijje. Ohuaya jama huohuime aca cua ba'a: —Eyaya miquianaya huoojeaña pea cuana huasijje esohui huohuiya, pea cuana jjaajaqui mee'yohua, eshahua cuayaqui mee'yohua pea'ai. ¡Huohuicue jama pea cuana huasijje ba'a: “Eyacuiñajji ojjaña huoojeajji cuaje'yo” acue! ³ ¡Aema' oe poquicue! ¡A'a acui ejaquecuaca'aquijji dojojji; bashosoco pea'ai a'a dojojji! ¡A'a bobi, bejjo pea'ai dojojji! ¡Ma miquea eyamijo ba'e nei oe dojocue! ⁴ ¡Po'ayequi nequicue oe pea cuiñajji yasijje! ¡Miquianaya oe pea cuiñajji yasijje poqui majje miquianajaya epeejji epojji sa'ajjacue; ojaya equijo anicue! ⁵ Dejja cuaa pea cuiñajjijo ba'eya miquianajaya esohui cajaa acaje'yo pojja'a. ¡Huohuicue jja oe ma dejja cuana jama ba'a: “Quea mimishi mi coma” acue! “Eyacuiñajjiya jja miya ba cani. Ohuaya jja miya quea nee nee po mee caje'yo” acue. ¡Ma esohui jama huohui majjeya oe cuayaqui'yocue cuiñajjijo ani! ¡Majoya cuayaqui'yo majje miquianajaya ejiojjijo ani meshi pohui cuiaiyajajjeana'yocue oya cuana jjashajja'ajjaqui ajja cuanajejojo! ¡Jamajjeya oe pea cuiñajji yasijje poquicue! —jamaya Jesosaa aca cua.

⁶ Jamajje o shajja'ajjajji cuana po'ayequi nequia cua Jesosaja esohui huohuiya. Onaaya huohui ca cua Eyacuiñajjija esohui; jjaajaqui mee ca'ya cua emanojaa cuana.

Jesosa emeshi meseya Enode Antipaa Huani poso aca cua

(Mateo 14.1-12; Macoso 6.14-29)

⁷ Emeshi meseya Enode Antipaa shajja'ajja ca cua peaja esohui Jesosajo. Pea cuaa Enode siajje aca cua jama ba'a: —Huani ca jja ca Jesosaya cuanaje. Huani ca jja ca shequi'yonaje —pea cuana cua. Enode quea ajjajja nee nee cua Jesosa Huani poso jojoya. ⁸ Pea cuaa Enode siajje aca cua jama ba'a: —Chojja, Jesosa ca jja ca Eniaya, ma etiiquiiana shequi o'oyanajeya —posoya aca cua.

Pea cuana jama siajje pomeya cua: —Jesosa pojja'a pea etiiquiiana shequi o'oyanaje.

⁹ Enode majoya jama cua ba'a: —Eyaya nei ca jjaja ca Huani sapasejjajea meenaje, Huani mano neinei'yonaje, ecuea jjaja eba, de. ¿Ajeo shai jjaja ojjaña mimiani? Ache jja eyaya caba'ajja sahua Jesosa —jamaya Enode cua.

Jesosaa 5.000 dejja cuana bobia ca cua

(Mateo 14.13-21; Macoso 6.30-44; Huani 6.1-14)

¹⁰ Quijje o shajja'ajjajji cuana esohui huohuiya poqui cue o'oya cua; Jesosa que huohui poña'ya cua. Majoya Jesosa shajja'ajja majje oya cuana poquia cua Betesaina huasijje. ¹¹ Jomajo o ba majje ojjaña jjachichaquia cua Jesosa que. Ojjaña quea bhui cua Jesosaa Eyacuiñajjija esohui huohui caquiyo. Jesosaa jama aca cua ba'a: “Ojjaña joya mimishi pajea'yojji cuani, onijje e'e

nei japeequiani Eyacuiñajjiya jaahuana caje'yo". Ohuaya emanoojaa cuana jjaajaqui mee ca'ya cua pea'ai. ¹² Jjasinecuaquiajo ojjaña quea shoe nee cua; ye jjima ojaya bobi cua. O shajja'ajjajji cuaa Jesosa jama huohuime aca cua ba'a: —¡Huoojeacue ojjaña, bobi sa'ajjaa, ecahuijji sa'ajjaa pea'ai! Beshahua nei esejaya bobi jiquiojo chama' ba'a, de.

¹³ Jesosa jamaya cua: —Chojja, ¡miquianaaya oe bobi quiacue e'ijjiajji!

Jamaya oya cuana cua: —De, oe pojji bobi yani. Beca nahuoo sisi yani, me oeje pahui yani. ¿A'a ecuanaya capoquiahua cuiñajji yasijje bobi jjequiya pojja'a, ojjaña dejjaja bobi jjequiya; quea bobi huiso epojji? ¹⁴ Yani quea dejja huiso nee nee, 5.000 yani, de.

Jesosaa jamaya aca cua ba'a: —Chojja, ja'a poquijji, ojjaña cuana anioque meecue, jjaanichichaqui meecue pea jjocojo, 50 anioque meecue!

¹⁵ Majoya aje o shajja'ajjajji cuaa dejja cuana jama aca cua ba'a: —¡Anioquecue oe nequiana!

¹⁶ Majoya acua po majje Jesosaa ma pahui nahuoo pea'ai jjeshe ca cua oja emeya. Jjeshe majje eyahuasijje jjabajeasohuaquia cua Eyacuiñajji nijje emimijji. Ohuaya Eyacuiñajji bihuia ca cua bobi e'ijjiajji. Majoya Jesosaa miji sisisi ca cua pahui, nahuoo pea'ai. Majoya ohuaya bobi quia ca cua o shajja'ajjajji cuana huasijje. Pea cuana huasijje quia ca cua o shajja'ajjajjiya. ¹⁷ Ijjia'ijjia majje ojjaña dejja cuana quea jeje cua, de. Ojjaña dejja cuana jejeajo iya ca'ya cua pea eshajajo tiia iya ca poqui'ya cua; 12 shajame bobi e'ijjiasejjaja ecuatajea cua.

*Penohua Jesosa shahuaba ca'ya cua oya Quito
(Mateo 16.13-28; Macoso 8.27-9.1)*

¹⁸ Oe pojajajo Jesosa oe nei mimia cua Eyacuiñajji nijje. O shajja'ajjajji cuana onijje nequia cua quea huesha pishana. Jesosaa oya cuana huohui'ajja ca cua: —¿Yajja mimime dejja cuana ejo cuani?

¹⁹ Jamajjeya o shajja'ajjajji cuana jama cua ba'a: —De, pea cuana ca jja ca mijo jama mimime cuani ba'a: Miya ca pajja mi ca pea dejja cuaa Huani poso acani. Pea dejjaa ca pajja mi ca Enia poso acani, ma etiiquiana, de. Pea dejjaa ca pajja mi ca pea etiiquiana shequi o'oyanaje poso acani, de.

²⁰ —De, ¿miquianaya yajja cuani so'o? —cua Jesosa.

Peno ca ca jama cua ba'a: —Miya ca ca Eyacuiñajjija Bacua Ejja oe nei, oja huoojea'yo ojjaña jaahuanajji epojji. Ecuea Emeshi Mese nei nei, de. Miya Quito bajjani ecuea Emeshi Mese nei nei jjejojo.

²¹ Majoya Jesosaa Peno jama huohuime aca cua ba'a: —E'e de, e'e jojo nei. ¡A'a huohuijji pea cuana, ecuea bajjani Quito, miquea Emeshi Mese nei! ²² Eya Eyacuiñajjija huoojea'yo. Eya quea nee nee acaje'yo cuaa. Beca cuaa eya cajaa acaje'yo, Jodio etii cuaa, Eyacuiñajji nijje mimiani etii cuaa, Moisesija etehue'yo huohuijjiya pea'ai. Mano mee caje'yo eya, de. Eya mano'yo majje pea beca peejjima cahuime po majje shequije o'oya —jamaya Jesosa cua.

²³ Majoya aje o shajja'ajjajji cuana Jesosaa huohui ca cua jama ba'a: —Ojjaña ca jja ca enijje e'e jojo nei jjapeequi'yo sa cuani, oya Eyacuiñajjija esohui jayojja caba'yahua. E'e, ¡e jayojjaya pocue;

enijje poqui'yocue! Jamatii onaa napa cajje aje jja mi oe quea nee nee cuaje'yo. ²⁴ E'e, ojjaña cuana ecuea esohui shajja'ajja sa po ajjajo ba'e tiitii ajja enijje eyajo. Joya ecuea esohui shajja'ajjajji cuani ca ca ba'e tiitiiye'yo enijje eyajo. ²⁵ E'e pojja'a dejjaa quea huiso nee nee aquiana ojaya yajji chicha cani. Jamatii oya cuana cuaqui yasijje jea cajo ojjaña ojaya aquiana cuana edojjji pojjeama. ¿A'a ojjaña ojaya aquiana cuana quea bame cuaje oya cuaqui yasijje poqui majje? Chojja, de. ¿A'a aquiana sosejje cuayaqui mee caje'yo cuaquiijo ani? Chojja, de. ²⁶ Oe dejja pojja'a: “Cajaa” cuani ejo, ecuea esohuijo pea'ai. Jamajjeya eyaya cue o'oya majje oya cajaa aje'yo pea'ai. E'e jojo nei eya ojjañaja Edoe Mese cueje o'oya. Quea jeajahua nee nee, quea ca'a nee nee cueje'yo. Eya esohuidojojji quea huiso nee nijje cueje o'oya, de. ²⁷ E'e jojo nei miqianaaya jiquiojo nequiya mano'yo jjimahuaa Eyacuiñajjija epeeji nei quea huiso nee nee baje —jamaya aca cua Jesosaa.

Jesosa quea cojja jiji cua
(Mateo 17.1-8; Macoso 9.2-8)

²⁸ Quijje, jiquio esohui huohui majje oe nomico ani'yo Jesosa poquia cua eyiyo huasijje. Peno, Satiaco, Huani pea'ai poquia cua onijje. Poquia cua Eyacuiñajji nijje mimiya. ²⁹ Eyacuiñajji nijje mimi majje Jesusaja ecojja quea jiji nee nee cua eshequi jayojja. Ojaya daqui pea'ai quea oshe nee nee, quea siyo nee nee cua. ³⁰ Beca dejja emano'yo eyajje jjanequiija'aqui'ya cua Jesosa nijje. Oya cuana mimia cua Jesosa nijje. Oe dejja Moisesi etiiquianaya cua. Pea ca Enia etiiquiana

cua, ma yahuajo nei nei ba'ya cua. ³¹ Quea bame nee nee quea jiji nee nee miminequia cua Jesosa, Enia, Moisesi pea'ai. Jesosa miminequia cua onaja mimishijo emano'yojji jjejojo Jenosanenajo. Jama mimimea cua Jesosa. ³² Peno, Satiaco, Huani pea'ai quea cojja mano cua. Majoya aje shequi nei'ya cua, ba ca cua Jesosa, Enia, Moisesi pea'ai; quea jiji nee nee nequi, de. ³³ Moisesi Enia mimi-jeyo majje poqui o'oya cua eyahuasijje. Poquije'yo ba majje Penohua Jesosa jama aca cua ba'a: —De, Eshui huohuijji, quea bame nee nee ecuanaya jiquiojo ani. Pea beca peejjima equi eja'iyacui, oe miquea, oe Moisesija, oe Eniaja —jamaya cua Peno jjashahuaba bamequi jjima jjejojo.

³⁴ Peno mimianijo tii bo oshe nee neeya oya cuana quehua ca cua. Bo ba majje quea mete nee nee po'ya cua. ³⁵ Majoya Eyacuiñajjiya bo tejjeeya esohui huohui ca cua jama ba'a: —Jiquio Jesosa ecue Bacua Eja, ecuea quea jea nee nee, eya ojo quea bihui nee nee. ¡Oya oe oe neiya shajja'ajjacue! —jamaya aca cua bo tejjee Eyacuiñajjiya.

³⁶ Ohuaya cuana ma esohui shajja'ajja majje ba ca'ya cua Jesosa oe nei nequi; pea cuana chama'. Peno, Huani, Satiaco pea'ai mimi'yo jjima nequia cua. Pea o shajja'ajjajji cuana huohui jjima aca cua. Quijje nei nei ca huohui ca cua, de.

Esho'i niñepoqui Jesosaa eshahua huoojja ca'yajo niñepoqui pajea mee ca'ya cua
(Mateo 17.14-21; Macoso 9.14-29)

³⁷ Mecahuajje jjapojjaquiajo Jesosa eyiyojo nequi jaaoque'ya cua. Quea dejja huiso nee neeya

Jesosa ishoa'ajja ca nequia cua. ³⁸ Oe dejjaa janobajjima nei jama huohuime aca cua ba'a: —¡Esohui huohuijji, bahuacue ecue bacua! Ecuea ebacua oe nei, de. ³⁹ Eshahuaa napa cajje, taaani jeabichajea canaje meshi yasijje; huapani pea'ai. Eshahuaa manojea mee'yo sa acani. Jamatii oya cuani, de. ⁴⁰ Eyaya huohui'ajjanaje miquea eshajja'ajjajji cuana eshahua cuayaqui mee'yoyji. Eshahua cuaya meequi'yo jjima acanaje mi shajja'ajjajji cuaa —jamaya aca cua niñepoquija ejeajjiya.

⁴¹ Jesusaa ojjaña cuana jama aca cua ba'a: —De; ¿ache shono acuae jja nequiana ejo jjashahuabaquije e'e jojo nei? ¡Quea sapa ca'a mi coma! ¿Ache cahui huiso minijje nequi majje miyaya eya baje'yo Eyacuiñajjiya huoojea'yo ojjaña jaahunajji quea ca'a nee nee? —jama tecueameya Jesusaa aca cua.

Majoya ma dejja Jesusaa huohui ca cua jama ba'a: —¡Miquea ebacua jjequicue!

⁴² Majoya esho'i jjequi ca cua Jesosa que. Ye cajo eshahuaa esho'i jeabichajea ca cua; niñepoquia cua. Jesusaa eshahua esho'ijo nequi cuaya meequi ca'ya cua. Esho'i niñepoqui pajea'ya cua. Majoya aje Jesusaa ejeajji nijje esho'i poqui mee ca'ya cua. ⁴³ Ojjaña ba majje jama aca cua ba'a: —De, quea sohui poja nee Jesosa cuanaje. Eyacuiñajjiya Jesosa quea sohui poja nee po mee canaje.

*Jesosaa huohui ca o'oya cua o manojeyoyo
(Mateo 17.22-23; Macoso 9.30-32)*

Ma esho'i niñepoqui pajea mee'yo majje ojjaña bihuia ca cua Jesosa, Eyacuiñajji pea'ai. Ohua

bihuia cajje Jesusaa o shajja'ajjajji cuana jama aca
cua ba'a: ⁴⁴ —¡Shajja'ajjacue jiquio esohui! ¡A'a
pajea'yoyji! Quijje dejja cuaa eya ña caje emano
mee'yoyji —jamaya cua Jesosa.

⁴⁵ O shajja'ajjajji cuanaja ca quea quehua cua
Jesusaja esohui. Eyacuiñajjiya quea quehua po
mee ca'ya cua. Jamatii oya cuana quea mete cua
ehuohui'ajjajji.

*¿Ache dejja quea bame eyajo cuaje'yo?
(Mateo 18.1-5; Macoso 9.33-37)*

⁴⁶ Jesosa shajja'ajjajji cuana jjaniñebaqui ania
cua. Jama cua ba'a: —¿Ache oja eshajja'ajjajji
acuae eyajo quea bame nee nee nequije so'o?
Eya nei emeshi mese cuaje eyajo, pojja'a, miya
pojjeama.

Pea aje oe jama cua ba'a: —Chojja, eya, de.

⁴⁷ Jesusaa jama tecueame aca cua ba'a: —
Miquianaya jjashahuaba taiquiani. ¡Shajja'ajjacue
oe! ⁴⁸ ¡Bacue jiquio esho'i cuana, emeshi mese po
sa po ajja! ¡A'a emeshi mese po sa pojji! ¡Jamaya
miquianaya pocue esho'i jayojjaya! ¡Japeequicue
jiquio ecua esho'i cuana jayojja oe pocue, dejja
quea bame nee nee epojji! Miquianaya ecuea
epeeji nijje japeequi majje miya ecuea epee-
jji cuani, Eyacuiñajjiya epeeji pea'ai. Jamajjeya
miquianaya esho'i quea bame jayojja cuani, ma-
joya miquianaya quea bame nee nee nequije'yo
eyajo —Jesosa cua.

*Oe dejja Edosiquianaja epeeji pojjeama cuani
jamajjeya oya Jesusaja epeeji nei cuani
(Macoso 9.38-40)*

⁴⁹ Majoya Huaniya Jesosa jama aca cua ba'a: —Esohui huohuijji, ecuaa banaje oe dejja; ohuaya pea cuanaja eshahua cuana cuaya meequi ca'yonaje miyaya jayojjaya. Miquea epeeji cuani pojja'a, oya ca ca cue ajja tii ecuana nijje. Jamajjeya ecuaa oya jama huohuinaje ba'a: “¡A'a cuayaqui mee'yojji eshahua; miya ecuana nijje poqui ajja!”

⁵⁰ Jesosa jama cua ba'a: —Cho, ¡a'a jama pojji! Oya ecuea epeeji nei cuani. Oya Edosiquianaja epeeji pojjeama cuani, jamajjeya oya ecuea epeeji cuani. E'e, ma dejja quea bame cuani, oya quea tai pojjeama. Jamajjeya oya ecuanajaya epeeji cuani pea'ai —jamaya cua Jesosa.

Jesosaa Satiaco Huani pea'ai tecuea ca cua

⁵¹ Beshahua nei acua cua Jesosa emano'yojji, eyahuasijje epoqui'yojji pea'ai Eyacuiñajjija esohui jayojja yajji. Jamajjeya jjashahuabaqui majje oya poquia cua Jenosanena huasijje o shajja'ajjajji cuana nijje. ⁵² Poquijeya Jesosaa beca o shajja'ajjajji cuana huoojea ca cua Samania meshi yasijje ecahuijji sa'ajjaa. ⁵³ Jomajo Samania dejja jama cua ba'a: —Chojja, ¡a'a miquianaya jiquiacua cuejji! Cajaa, miquianaya Jodio dejja joya, ecuanaja ca mi ca boti'ama Jodio dejja cuana Jenosanena huasijje poqui majamajjijijo Eyacuiñajji bihuiaa.

⁵⁴ Majoya ma esohui shajja'ajja majje Satiaco, Huani pea'ai poquia cua Jesosa que huohui pohua. Oya cuana jama cua ba'a: —Jesosa, Emeshi Mese nei, ecuaaya cuaqui oque mee sa aña ma

esohui quea tai miminaje yasijje. ¿A'a acuae quea bame jama epojji so'o, Jesosa?

⁵⁵ Jesosaa jama tecueame aca cua ba'a: —Chojja, ja'a miquiyanaya jama jjashahuabaquime pojji!

⁵⁶ Majoya aje poquia cua pea cuiñajji yasijje cahuiya.

*Jesosa nije jjapeequi majje quea camaja cuaje
(Mateo 8.19-22)*

⁵⁷ Ejiojjijje poquijeya, dejjaa Jesosa jama huohuime aca cua ba'a: —Jesosa, Emeshi Mese nei, eya minijje jjapeequi sa cuani. Jamajjeya eya minijje e'e jojo nei po'ayequi sa cuani.

⁵⁸ Majoya aje Jesosa jama cua ba'a: —E'e pojja'a de, quea camaja cuaje. Eya ojjañaja Edoe Mese cuani. Jamatii ecuea equi chama' ejomishocajji. Samao ca ca jjanijo cahuijaa, cuichojji cuana ejajo cahuiani. Eya ca ca iña quima' ecahuijji. Jamatii beca cuanaja equi quea nahue cuani e boti'amajojo —jamaya Jesosa cua.

⁵⁹ Pea pojjaajo pea dejja Jesosaa jama huohuime aca cua ba'a: —¡Jjeyahua nei enijje cuecue ecuea epeeji epojji!

Ma dejja jama cua ba'a: —Emeshi Mese, quijje pishana poquije minijje. Jjeya ecue chii etii nojinoji, manojeyo pojja'a. Eyaya camojea sahua mano'yajo.

⁶⁰ Jesosa jama cua ba'a: —Chojja, pea cuaa Eyacuiñajjija epeeji pojjeama cuaa oe cacuiña cahua. Ohuaya cuaa camojea cahua mano'yajo. ¡Cuecue jjeyahua nei; enijje ejjahuhuiquiqui Eyacuiñajjija esohui pea cuana huasijje!

⁶¹ Pea dejjaa Jesosa jama huohuime aca cua ba'a: —Emeshi Mese, eya po'ayequi sa cuani minijje. Ebionei oe ecuea huapa pojjeama cuana cahuohuiqui'yo sahua jama ba'a: “Poquia iña Jesosa nijje”.

⁶² Jesosa jama cua ba'a: —Chojja, ijje ya nei cuecucue enijje! ¡Miya enijje jjapeequi sa cuanijo cuecucue jjeyahua nei enijje! Miya cue sa po ajjajje miya bame'ama cuaje Eyacuiñajjija epeeji epojji.

10

Jesosaa dejja quea huiso huoojea ca cua 72 huisome

¹ Majoya Jesosaa dejja quea huiso jjequi tepe ca cua, 72 huisome. Ohuaya becamejijiji pea'ai huoojea ca cua ojjaña meshi cuana huasijje joya o poqui sa cuani yasijje ya. ² Ohuaya jama huohuime aca cua ba'a: —Dejja cuana anoso quejo jahua jayojja jama, quea huiso nee nee. Ojjaña cuana ecuea esohui shajja'ajja sa cuani, oe pojji ca ca Eyacuiñajjija esohui huohuijji yani. Jamajje ya ¡mimicue Eyacuiñajji nijje quea huiso esohui huohuijji epojji, quea huiso anoso sejja'yojji cuana jayojja epojji! ³ ¡Poquicue miquianaya ma dejja cuana quea mimishi nee nee nequi yasijje esohui huohuiya! Ma dejja cuanaya pojja'a mimijajije minijje; ba'ajja. ⁴ ¡A'a bashosoco dojojji; bejjo, ejiojji shejee pea'ai a'a dojojji! ¡A'a pea nijje mimipoquijji; quea cueiji pashi nee oe poquicue! Quea huiso Eyacuiñajjija esohui shajja'ajja sa cuani. ⁵ Equi yasijje dobiqui majje jja ca oe equi mese huohucue jama ba'a: “Eyacuiñajjiya miya quea bei po mee caje”. ⁶ Ma equi mese

quea bei po sa cuanijo, Eyacuiñajjiya oya quea bei po mee caje. Pea equi meseya miya cajaa acanijo, Eyacuiñajjiya oya quea bei pojjeama acaje. ⁷ ¡Miquianaja epeeji epojji sa'ajjacue; ojaya equijo tiiya anicue! ¡Ojaya bobi ijia anicue ma cuiñajjijo ani majje! Equi meseya miya cabobia cahua Eyacuiñajjija esohui huohuiaña sosejje, ojaya echa-cojji jayojja cuani jojaya. ⁸ Pea cuiñajji yasijje poquiajo dejja cuaa miquianajaya esohui shajja'ajja sa cuanijo ohuaya miya bobia caje. ¡Jamajjeya ijia'ijjiacue onijje! ⁹ ¡Jjaajaqui mee'yocue emanoojaa cuana! ¡Huohuicue oe oya Eyacuiñajjija esohui jama ba'a: “Jjeya nei Eyacuiñajjiya miya oja epeeji po mee sa acani” acue! ¹⁰ Pea cuiñajji yasijje poquiajo dejja cuana ca ca miquea esohui shajja'ajja sa po ajja pojja'a cuaje. ¡Ma dejjaya jja oe jama huohuime acue ba'a: ¹¹ “Miquianaaya cajaa aña Eyacuiñajjija esohui, jamajjeya ecuanaya pea dejja cuana huasijje poquije esohui huohuiya miquianaya shajjama' jojaya. Ecuana quea yeno cuani miquianaaya Eyacuiñajjija esohui cajaa anaje jojaya. E'e de, ohuaya miquianaya huoojea caje'yo cuaqui yasijje. ¹² Yahuajo Eyacuiñajjiya Sonoma cuiñajjijo ba'e cuana aca cua jayojjaya miquianaya acaje'yo, quea nee nee po mee caje'yo” jama huohuimeya acue! —jamaya Jesosa cua.

Beca cuiñajjijo ba'e cuana shajjama' cua
(Mateo 11.20-24)

¹³ Majoya aje Jesosa tecuetecuea cua dejja shajjama' cuana nijje. Jama huohuime aca cua ba'a: —Coya nequianaya quiyo'yo chana',

Conasijo ba'e cuana, Betesainajo ba'e cuana pea'ai. Miquianaaya eya banaje, ecuea esohui shajja'ajjanaje pea'ai. Jamatii miquianaya ca mi ca oe shajjama' nei nei cuani, de. Yahuajo Eyacuiñajjiya Tinojo ba'e cuana Sinonojo ba'e cuana pea'ai quiyojea mee ca'ya cua quea mimishi nee neejojo. Ojaya cuanaja ca ca eya shahuaba jjima nei nei cua, de. Ohuaya eya eshahuaba joggemo ecuea esohui eshajja'ajja joggemo quea yeno nee nee poqui'aye ojaya mimishijo. Conasijo ba'eja ca jjaja ca iña oe eshahuaba cuanaje, jamatii jjejojaya ca nequiana ca oe shajjama' nei nei cuanaje ecuea esohuijo, de. Betesainajo ba'e jayojja ca mi ca oe cuanaje. ¹⁴ Jamajjeya Eyacuiñajjiya miquianaya huoojea caje'yo cuaqui yasijje, quea nee nee nee cuaje'yo miquianaya. ¹⁵ Capenaomajo ba'e cuana, miquianaya shajjama' neiya cuani pea'ai. Jamajjeya aje jja miquianaya quiyojea pea'aije'yoya. Miquianaya jama jjashahuabaquiani ba'a: “Ecuana ca ca eyahuasijje poquije'yo”. Cho, miquianaya poquije cuaqui yasijje ecue sohuijo shajjama' cuanijojo —jamaya Jesosa cua.

¹⁶ Majoya aje Jesusaa o shajja'ajjaji cuana jama huohuime aca cua ba'a: —E'e de, miquianaya ecuea esohui huohuiji cuani. Miquianaaya ecuea esohui nei huohuiaña. Jamajjeya dejja cuaa miquianajaya esohui shajja'ajja canijo ecuea epeeji cuaje. Pea dejja cuana ca ca oe shajja'ajja sa po ajjajo ecuea epeeji pojjeama cuaje, Eyacuiñajjiya epeeji pojjeama pea'ai cuaje. E'e de, mahuiso ecuea esohui —jamaya aca cua Jesusaa.

Majoya aje ma dejja cuana iye huiso huoojea ca cua esohui huohuiya.

Ma dejja cuana, 72 huisome cue o'oya cua Jesosa que

¹⁷ Majoya ma dejja cuana 72 huisome esohui huohui majje Jesosa que cue o'oya cua; quea bihui nee cua. Oya cuana jama cua ba'a: —Jesosa, ecuea Emeshi Mese nei, ecuanaya quea sohui poja nee cuanaje; mi jayojja cuanaje. Ecuaaya miquea bajjanijo eshahua huoojeacuaya'yonaje.

¹⁸ Jesosa jama cua ba'a: —E'e de, ecuea eba. Eyaya Edosiquiana banaje oquequinaje eyajo nequi pojjeje jayojja, de. ¹⁹ Eyaya miquianaya quea ca'a po meenaje epoquijji. Peyohua, ajiya pea'ai ijia cajje miquianaya mano'yo jjima po meeje'yo eyaya. Edosiquiana miya quecua jjima ameeje'yo eyaya. ²⁰ Miquiaaya eshahua cuayaqui mee'yaña. ¡A'a quea bihui nee pojji miquianaya quea sohui poja nee cuani! ¡Miquianaya ca oe quea bihui pocue miquianajaya bajjani tehue canaje Eyacuiñajjiya eyajo edobiqui meeji! Miquianaya poquije eyahuasijje Eyacuiñajji nijje ba'e'yohua. ¡Jamajjeya ma esohuijya quea bihui pocue! — jamaya Jesosa cua.

*Jesosa quea bihui cua
(Mateo 11.25-27; 13.16-17)*

²¹ Majoya aje Edojjoshahua Bameya Jesosa quea bihui po mee ca cua. Jesusaa Eyacuiñajji jama huohuime aca cua ba'a: —De, eya quea bihui nee cuani minijje. Eyacuiñajji, miya ecue Chii nei, miya Emeshi Mese nei cuani, ojjaña meshi cuanajo eyajo pea'ai, de. E'e, beca cuana

jjashahuaba taiquiani jama ba'a: “Ecuea quea ja'a nee esohui, jamajjeya eya Eyacuiñajjija esohui shajja'ajja sa po ajja”. Miyaya, Eyacuiñajjiya, oya cuana ba meesahua ajja oya cuana jjashahuaba taiquianijojo. Pea cuana ca ca miquea esohuijo esho'iquiana jayojja jjabahuejjaqui sa cuani. Jamajjeya miyaya oya cuana quea ja'a po meeje'yo. E'e ecue Chii, miyaya jamaya aña miquea ej-jashahuabaquijji jama —Jesosa cua.

²² Majoya Jesosaa pea cuana jama huohuime aca cua ba'a: —Eyacuiñajji ecue Chii e huoo-jea'yojji epo. Eya ojaya esohui huohuijji cuani. Ecue Chiiya eyajo anija ecuea ejjashahuabaquijji ojaya eba nei nei, ojaye nei. Ecue Chiiya ej-jashahuabaquijji ecuea eba nei nei pea'ai, ecuea nei. Eyaya ecuea epeeji ba meesahuaña quea ja'a nee ecue Chiiya ejjashahuabaquijji —jamaya Jesosa cua.

²³ Majoya aje o shajja'ajjajji cuana Jesosaa jama huohuime aca cua ba'a: —¡Quea bihui pocue, miquianaaya Eyacuiñajjija ejjashahuabaqui'yojji bañajo! ²⁴ E'e jojo nei eyaya miquianaya huohuiaña jama ba'a: Yahuajo quea huiso Eyacuiñajjija esohui huohuijji cuana, emeshi mese cuana pea'ai Eyacuiñajjija ejjashahuabaqui'yojji ba nei nei sa cua. Ecuea esohui shajja'ajja nei nei sa cua pea'ai. Jamatii onajaya eya ba jjima cua, shajja'ajja jjima cua ecuea esohui. E'e, oya cuana shajja'ajja sa cua jiquio miquianaaya jjeya shajja'ajjaña —jamaya Jesosa cua.

Esohui oe Samania dejja quea bame cuajo

²⁵ Oe Jodio dejja Moisesija etehue'yo huohuijji poquia cua Jesosa dasiaa nisho. Huohui'ajja ca cua jama ba'a: —Jesosa, miya esohui huohuijji cuani, ¿yajja acuae po cajji Eyacuiñajji nijje eba'e tiitii'yojji so'o?

²⁶ Jesosa jama cua ba'a: —¿A'ya acuae Moisesiya tehue ca cua? ¿A'a pojja'a miquea ma esohui ba jjima?

²⁷ —De, ecuea eba, eya Moisesija etehue'yo huohuijji nei nei cuani. Ojaya esohui jama cuani ba'a: “¡Miyaya Eyacuiñajji quea jea nee nee acue! ¡Ojo nei oe jjashahuabaquicue; oya oe bihuiacue ojjaña pojja!” Pea etehue'yo jamaya cua ba'a: “Eseya jjajaahuanacuiani. ¡Jama jaahuanameya oe acue mique doe cuana!” jama cua Moisesija etehue'yo yahuaajo —jamaya cua ma esohui huohuijji.

²⁸ Jesosa jama cua ba'a: —E'e de, quea bame nee miquea esohui. ¡Ma esohui jayojjaya oe miyaya acue! Majoya aje miya Eyacuiñajji nijje eyajo ba'e tiitiije'yo.

²⁹ Ma esohui huohuijji Eyacuiñajji nijje, pea cuana nijje pea'ai quea bihui nisho cua. Ojaya pea cuana boti'ama cua. Jamajjeya ohuaya Jesosa edasia'yojji nisho jama huohui'ajjame aca cua ba'a: —¿A'ya acuae ecue doe cuana? —ojaya ba jjima nisho cua.

³⁰ Jamajjeya Jesusaa esohui jama huohuime aca cua ba'a: —Oe Jodio dejja ba'enaje Jenosane-najo, poquinaje ejiojjijje Jenico huasijje. Ejiojjijje poquianijo siipojji cuana nequinaje ejiojjijo sii epojji. Siipojji cuaa dejja eshema' nei cuiahuejjajeame acanaje e'aquiana jjeshe'yojji. Ojaya

daqui sii ca'yonaje, de. Siipojji cuaa ma dejja jea cana'yonaje, beshahua nei emano'yo. ³¹ Majoya oe Jodio dejjaa, Eyacuiñajji nijje mimiani dejjaa ma dejja ecuiajeajaa yejje canananaje. Bajea canananajeya aje jja ca oe. Jjequi sohuasohua'yo ajja jjaja cua. Poquia jjaja oe cua. ³² Quijje pea Jodio dejjaa yejje canananaje bajea canajeya aje jja ca oe pea'ai. Oya Eyacuiñajjija equi jaahuanajji cua. Jjequi sohuasohua'yo ajja jjaja cuanaje. Poquia jjaja oe cua. ³³ Quijje aje jjaja oe Samania dejja cueyanaje. Samania cuanaja Jodio cuana boti'ama. Jamatii jiquio Samania dejjaa Jodio dejja ecuiajeajaa ba canaje. ³⁴ Ohuaya ba majje shicui canaje. Majoya aje iyasohua ca'yonaje mona biajje, dojo canaje ejaachichajji equi yasijje. Majoya aje jaahuana canaje sosema' tii. ³⁵ Pea cahuijo Samania dejjaa bejjo quia canaje equi mese yasijje, o cahuinaje sosejje. Jama huohuime aca cua ba'a: “Eya poquije chacohua. Ma ecuiajeajaa dejja ca anije, ¡miyaya oya jaahuanacue! Ma'aje bejjo o jaahuana sosejje. Quijje eya cueje o'oya mi sosequia o'oyaa” jamaya cuanaje Samania dejja —Jesosa cua.

³⁶ Majoya Jesusaa Moisesija etehue'yo huohuijji jama huohuime aca cua ba'a: —Pea beca peejjima dejjaa ecuiajeajaa dejja ba canananaje. ¿Ache dejja acuae oja doe jayojja cuanaje?

³⁷ —Ma o jjequisohua'yoyji cuanaje, Samania dejja ojaya doe jayojja cuanaje —jamaya oya cua.

—E'e de, e'e jojo nei. ¡Miyaya jamaya acue, pea cuana jama jaahuana meeya acue, mique doe jayojja acue! —jamaya Jesosa cua.

*Jesosa, Manta, Mania nijje pea'ai anicuanana
cua*

³⁸ Jesosa o shajja'ajjajji cuana nijje Jenosana huasijje poquije Mantaja equi yasijje do-biquinana cua ijia'ijjiaa. ³⁹ Mantaja shehue, Mania Jesusaja esohui shajja'ajja sa cua. Jama-jjeya Jesosa chipi nei ania cua oja esohui shajja'ajja neineiiji. ⁴⁰ Mantaja cuacuacuacuaquija jjejojo Jesusaja esohui shajja'ajja jjima cua. Oya quea quene cua oja shehue nijje. Mantaa Jesosa jama huohuime aca cua ba'a: —Jesosa, eya ecue shehueja cuacuasahua jjima. ¡Huoajeacue oya e cuacuasahuaa!

⁴¹ Jesosa ca oe jama cua ba'a: —Chojja, Manta, miquea ecuacuajjijo ca ca miña jjashahuabaquiani. Jamajjeya miya ecue esohuijo jjashahuabaqui jjima cuani. ⁴² Mania ca ca oe quea bame cuani, ohuaya ecuea esohui shajja'ajja neinei cani. ¡Mique shehue jayojja jama pocue! —jamaya Jesosa cua.

11

*¡Eyacuiñajji nijje jama mimime pocue!
(Mateo 6.9-15; 7.7-11)*

¹ Jesosa pea pojajajo mimia cua Eyacuiñajji nijje. Majoya aje cojjacahuijeyo majje o shajja'ajjajjiya Jesosa jama huohui'ajjame aca cua ba'a: —Emeshi Mese nei, ¡huohuicue iña miyaya achajja mimime acuae po cajji so'o! Yahuajo Huaniya ona besameeji cuanajeya o shajja'ajjajji cuana huohui ca cua achajja mimime epojji Eyacuiñajji nijje. ¡Jamaya huohuicue ecuanaya!

² Majoya aje Jesosaa jama aca cua ba'a: —Jama mimimeya oe pocue Eyacuiñajji nijje ba'a: Eyacuiñajji, miya ecue Chii nei nei. Miya oe nei nei ani, pea mi jayojja chama'. Ecuea eba nei nei miya mimishi'ama nei nei. Miya ojjaña cuanaja Emeshi Mese nei cuani; ojjaña jaahuanajji cuani. Jamajjeya ojjaña cajjapeequiahua minijje.

³ ¡Quiacue mo ecuea bobi eba'ejji!

⁴ ¡Ecuanaajaya mimishi cuana cuijea'yocue!

Eya quene'ama pea cuana nijje; joya enijje quea mimishi cuani nijje.

Jamajjeya ecuea mimishi cuanajo ¡a'a quene pojji pea'ai!

¡A'a ecuana quea mimishi po meeji! Acua. ¡Jamaya mimicue Eyacuiñajji nijje! —jamaya Jesosa cua.

⁵ Majoya Jesosaa o shajja'ajjajji cuana pea esohui ejjashahuabaqui meeji jama huohuime aca cua ba'a: —Miquianaya pojja'a mee nei poquije miquea epeejiija equi yasijje mecashono nei. Miyaya huohuiñaquije jama ba'a: “Jjeya nei ecuea epeeji cue'yonaje. ⁶ Chama' bobi ecuea equijo, oya ca ca quea shoe, de. ¡Che mo bobi quiacue ecuea epeeji nijje ebobajji!” jamaya cuaje miya pojja'a. ⁷ Majoya oya jamaya cuaje ba'a: “Chojja, de. Equiajji pojjeama mi, cahuijaa so'o ca ca iña, de. Ca'a'yonaje oya aña ecuea esecuejjani ca mi quiajji”. ⁸ Miyaya huohui'ajja majamajjje ca mi ca oe quia caje. Ojaya epeejiijojo pojjeama ca mi ca oe quia cani miya mi cahuime yajje —jamaya Jesosa cua—. ⁹ E'e de, eyaya huohuinaje maya esohui miquea ebajji achajja

mimime Eyacuiñajji nijje epojji. ¡Miquianaaya huohui majamajacue esecuejo nequia jayojjaa! Majoya Eyacuiñajjiya miquianaya quia caje. ¡A'a Eyacuiñajji nijje mimi pajea'yojji ohuaya miya saja'a caje'yo! ¹⁰ E'e, ojjaña cuaa Eyacuiñajji huohui'ajja canijo, Eyacuiñajjiya oya cuana quia caje'yo. Jamaya ma esohui epeejjijo, de. Oya poquinaje bobi sa'ajjaa, huohui'ajja majamaja canequinaje. Majoya aje bobi quia canaje. Jamaya aje Eyacuiñajjiya acaje miquianaa huohui'ajja majamajaje. ¹¹ Miquianaja bacuaa nahuoojo huohui'ajja cajje, ¿ae quiaje? Peyo pojja'a. Chojja, miquianajaya equiajji pojjeama peyo, de. ¹² Miquianaja bacuaa cachinajjajo huohui'ajja cajje, ¿ae quiaje? Aji pojja'a. Chojja, miquianajaya equiajji pojjeama, de. ¹³ Miquianaya quea mimishi ba'yani. Jamatii miquianaja bacua nijje quea bame cuani, Eyacuiñajji ca ca mimishi'ama nei nei cuani. Ohuaya quea bame nee nee quia cani miquiaa huohui'ajjaje. Ohuaya miquiana huasijje Edojjoshahua Bame nei huoojea caje miquiaa huohui'ajjaje —jamaya Jesosa cua.

Jesosa Edosiquiana etiiya quea sohui poja po mee cani poso —aca cuaa cua

(Mateo 12.22-30; Macoso 3.20-27)

¹⁴ Oe dejja mimi'ajja nequia cua eshahua oja yamijo nequi jojo. Oya poquia cua Jesosa que. Jesosaa eshahua cuayaqui mee ca'ya cua. Ma dejja eshahua cuayaqui'yajo mimicoo'ya cua, de. Majoya aje ojjaña cuana jama cua ba'a: —De, Jesosa quea sohui poja nee nee yaña.

¹⁵ Pea dejja cuanaya jama siajje pomeya cua ba'a: —Edosiquiana etii nijjeya jjejojo, Jesusaa eshahua cuaya meequi ca'yonaje, Edosiquiana etii Meesemo nijjeya.

¹⁶ Pea cuana jjashahuaba taiquia cua Jesusaja epeeji nisho epojji. Jesosa jama aca cuaa cua ba'a: —Ecuanaa ajjima aña Eyacuiñajjiya miya ca ca ameesahua caje pojja'a. ¡Jamajjeya amee'ajja socue oe! Majoya jama miya ajo, ecuanaa baje e'e jojo nei Eyacuiñajjiya miya huoojea canaje ecuana huasijje. Majoya aje oe ecuanaya jjapeequije minijje —jamaya cuana cua Jesosa Eyacuiñajjiya huoojea'yo pojjeama posojo.

¹⁷ Jesusaja eba onajaya ejjashahuaba taiquijji. Jamajoya aje Jesusaa jama tecueame oya cuana aca cua ba'a: —¡Jjashajja'ajjaquicue oe! Joya emeshi mese ojo chacochoani cuaa shajja'ajja sa po ajjajo, ojee jjaquecuaqui majje jjaquecua iyaiyaquije'yo dejja cuana ma meshijo ba'e; chama'yo tii cuaje'yo. Huapa pojjeama cuana nijje jjacuaquiajo chama' epeeji cuana cuaje'yo.

¹⁸ Jamaya pea'ai Edosiquiana etiiya Satanasaa pea eshahua ehoojeacuaya'yo jojjemo, dejja huoojea'yojji pojjeama po'yoquiaye. Chojja, jama pojjeama ca coma. ¹⁹ ¿A'aya eyaya Edosiquiana nijjeya niñe cuana, pea eshahua cuana pea'ai huoojeacuayajeaña poso aña? Jamajjeya miquea epeeji cuanaa ¿ae nijje eshahua huoojeacuayajea cani? Eyacuiñajjiya asahua canijo, jamajjeya ojaya eba miquianaya ejo siajje cuani. ²⁰ E'e, Eyacuiñajji nijjeya eyaya eshahua huoojeacuayajea yaña. ¡Jamajjeya bacue eya e'e jojo nei Eyacuiñajji, Emeshi Mese oe nei jjeya cuani tii! ²¹ ¡Bacue!

¿A'a dejja quea ca'a neeja equi yasijje dobiqijji oja aquiiana siiya o jeyo jjima nequijo? Chojja, o jeyo majje ojaya aquiiana cuana sii caje cuaa. ²² Jiquio ecua e'aquiiana mese ebionei jeyo cani jama amajje eyaya eshahua cuana jeacuayajeaña. ²³ Miquianaya shajja'ajja sa po ajja ecuea esohui, jamajjeya ecuea epeeji nei pojjeama miquianaya cuani. Miquianaaya ecuea esohui pea cuana huasijje huohui sa po ajjajo, jamajjeya miquianaaya pea cuana quea mimishi po mee sa aña, de —jamaya Jesosa cua.

*Eshahua dejjaja yami yasijje cue o'oyani
(Mateo 12.43-45)*

²⁴ Jesosaa esohui ejjashahuabaqui meeji huohui ca cua jama ba'a: —Eshahua dejjaja yamijo nequi cuayajeaqui'yo majje quea huesha poquinaje. Sa'ajja ca'yonaje pea enequi'yojji. Jamatii ba'yo jjima cuanaje. Eshahua po'ayequeiquinaje o nequijji sa'ajja'yohua. Jamajjeya oya jjashahuabaquinaje jama ba'a: “Eya poquije o'oya huacuaya ma e cuayaquinaje yasijjeya, ma ecuea equi jayojja huasijjeya”. ²⁵ Jamajjeya oya dejja huasijjeya cue o'oyanaje. Ojaya yami yasijje dobiqiyonaje Eyacuiñajjija epeeji pojjeama jojaya, ojaya eyami equi ecuiashaba jayojja jama, ehua bamebame jayojja equi se ejjama'. ²⁶ Jamajjeya ma eshahua poquinaje pea eshahua cuana jjequiya onijje enequi'yojji ma dejjaja yamijo. Oya cuana quea mase nee nee cuanaje. Oe nei yahua ca ca quea mase pishana cuanaje. Majoya aje ojjaña dobiquiajo ma dejja quea yeno nee nee cuanaje.

Yahuajo oe eshahua nequiahuaajo ca ca quea yeno pishana cuanaje.

¿Yajja acuae po caji quea bihui epojji?

²⁷ Jesosa mimianijo oe epona ojjaña yiyesama neijo nequi sohuicuaya cua jama ba'a: —Jesosa, Eyacuiñajjiya miquea enaese quea bihui capo mee ca'yahua, ohuaya miya cuayajo tii mee canajejo.

²⁸ Majoya aje Jesosa jama cua ba'a: —E'e, quea bame pishana. Eyacuiñajjiya esohui shajja'ajja nei nei majje ca ca oe quea bihui nee nee capo'yahua. Joya Eyacuiñajji nijje jjapeequi neinei majje quea bihui nee nee capo'yahua. ¡Jamaya pocue quea bihui nee nee epojji! —jamaya Jesosa cua.

*Dejja mimishi cuaa Jesosa huohui'ajja ca cua
(Mateo 12.38-42; Macoso 8.12)*

²⁹ Quea dejja huiso nee nee ejjachichaqui nequia cua Jesosa nijje. Majoya Jesusaa esohui jama huohuime aca cua ba'a: —Miquiaaya Eyacuiñajjiya esohui cajaa anaje. Jamatii miquianaya ba o'oya sa cuani eyaya yahuajo anaje jayojja. Ecuea jamaya e'abeca'yojji pojjeama miquea ebajji eya Eyacuiñajjiya huoojea'yo. ¡Jjashahuabaquicue yahuajo nei Eyacuiñajjiya Jjona jaahuana ca cua jai ai'aija sei aijo ba'e! ³⁰ Jjona emano'yo jayojja cua. Majoya shequi o'oyanaje jayojja cua pea beca peejjima cahuime po majje jaiya ojjajea ca'ya cua. Majoya dejja cuana Ninebe cuiñajjiyo ba'e yasijje poquia cua. Oya jjashahuabaqui'yo aña cua Jjona eshequi o'oya jayojjajo. Jjashahuaba bame nequia cua e'e jojo nei Eyacuiñajjiya Jjona huoojea ca cua oja esohui huohuiya. Eya

Jjona jayojjaya cuaje, eya mano'yo majje mei jjanijo jaa shequiye o'oya pea beca peejjima cahuime po majje, miquiana jjashahuabaquiji Eyacuiñajjiya eya huoojea canaje miquiana huasijje. ³¹⁻³² E'e, yahuajo Ninebejo ba'e cuaa Jjonaja esohui shajja'ajja majje mimishi pajea ca'ya cua. Jjapeequia cua Eyacuiñajji nijke. Jjonaa esohui quea bame huohui ca cua. Jjeya eyaya miquianaya huohui bamebame yaña, de. Jamatii miquianaya ecuea esohui shajja'ajja sa po ajja. Jamajjeya Eyacuiñajjiya miquianaya jeajea caje'yo cuaqui yasijje shajjama' jojoya.

—E'e, jamaya yahuajo cua ba'a: Eeno cuejji-jje emeshi mese pona cua. Oya quea huesha nee nee cueya cua Sanomoja esohui shajja'ajjaa. Sanomo quea jjashahuabaqui ja'a pishana cua. Eya ca iña quea jjashahuabaqui ja'a nee nee cuani. Jamatii miquianaya ecuea esohui shajja'ajja sa po'yo ajja. ¿Yajjajo acuae miquianaya ma epona jayojja mi po'ajjani so'o? Jamajjeya Eyacuiñajjiya miquianaya jeajea caje'yo cuaqui yasijje shajjama' jojoya, de —jamaya Jesosa cua.

Esohui ecojja cuaquijiji jayojjajo

(Mateo 5.15; 6.22-23)

³³ Jesosa jama cua ba'a: —¿A'a miquianaya cuaquijiji dedo majje capanequiaña eshajaa? Chojja. ¿A'a miquianaya enequia quehua nequiya jeaja'a came? Chojja. E'e, eyajo nequiya jeaja'a cani. ³⁴ Miquianajaya ecojja cuaquijiji jama, de. Miquianajaya ecojja quea ja'a cuanijo miquianaya poqui bameje. Miquianajaya ecojja ja'a'ama cuanijo epoqui bamejji pojjeama.

Jamaya miqianajaya ejjashahuabaquijjiya quea ja'a cuanijo, ba'e bameje. Miqianaya jjashahuaba taiqianijo, miqianaya cuaquijji enequia quehua jayojja cuaje. ³⁵⁻³⁶ ¡Jamajjeya ma cuaquijji eyajo nequiasohua nequi jayojja jama jjashahuaba bamebamequimeya oe pocue! —jamaya Jesosa cua.

Jesosaa Paniseo dejja cuana Moisesija etehue'yo huohuijji tecuea ca cua

(Mateo 23.1-36; Macoso 12.38-40; Noca 20.45-47)

³⁷ Jesosa mimipajea'yajo oe Paniseo dejjaa Jesosa iyaa ca cua ijia'ijjiaa ojaya equi yasijje. Jesosa dobiqui majje e'anjijjo anioquea cua. Oya jjametopo neinei qui jjima cua, Jodio etiiquiaa acani jayojja ajjima aca cua. ³⁸ Jamajjeya Paniseo dejjaa Jesosa ba majje jjashahuaba taiquia cua jama ba'a: —E'e de, Jesosa quea tai cuani, eme topo neinei ajja, etiiquiaa jayojja jama ajjima acani, de.

³⁹ Jesusaja eba onajaya ejjashahuabaquijji; jamajjeya jama tecueame aca cua ba'a: —De, miqianaya, Paniseo dejja cuana jamatii esohui huohuijji nisho cuani, quea tai, de. Miqianaya joya caneco yiye topo jjimajo jayojja cuani. Jamaya miqianaaya dejja cuana jjashahuabaqui meeña, miqianaya Eyacuiñajjija epeeji cuani poso acani dejja cuaa. Miqianaya ca mi ca ojaya epeeji pojjeama, ojaya miqianaya eba, de. Ojjaña miqianaya quea bame cuani poso acani. Miqianaya ca ca quea tai nee nee cuani; jjashahuaba quehuaquiani, de.

⁴⁰⁻⁴¹ Miqianaya Eyacuiñajjijo jjashahuaba

nishoquiiani, ojaya epeeji nisho cuani. Jamajjeya beca cuaa miquianaya quea bame ba'e poso acani. Eyacuiñajjiya miquianaya quea bame nee jjashahuabaqui mee sa acani. Jamajjeya jja oe ionijje jjapeequicue e'e jojo nei epojji! Majoya aje miquianaya quea bame cuaje'yo.

⁴² —E'e de, miquianaya Paniseo dejja cuana jjashahuaba taiquiiani, de. ¡A'a quea dejja tai pojji! Shajja'ajjaña ajeya ca oe Eyacuiñajjiya esohui, ojjaña ojaya esohui aje jje oe shajja'ajja jjima cuani, e'e nei. ¡Miquianaaya ojjaña Eyacuiñajjiya esohui shajja'ajja jeyojeyocue! ¡Huapa pojjeama cuana quea jea acue, Eyacuiñajjiya ojjaña cuana quea jea acani jayojja oe acue! E'e de, ¡a'a pajea'yojji quea jea ajji! Jamajjeya miquianaya quea bame cuaje.

⁴³ —E'e de, miquianaya ca jja ca oe quea tai cuani, Paniseo dejja cuana. Jamatii miquianajaya equi ejjachichaquijjiyo e'anijji quea bame sa'ajjaña. Pea nijjeya aje jja mi ca oe quea bame jayojjaya cuani, majoya aje jja mi oe pea cuaa quea bame poso acani. Miquianaya ca jja mi ca siajjepojji, de. E'e, ejiojjijje pea'ai miquianaya po'ayequiequijo dejja cuanaja esohui shajja'ajja sa cuani jama ba'a: “Paniseo dejja cuana ca jja ca quea bame nee nee, de”. Ma esohui ca jja ca e'e jojo nei pojjeama acani.

⁴⁴ —E'e miquianaya quea tai po majamajani. Miquianaya dejja equehua mojea'yojaa jayojja, ma onajaya ba jjimajojo quishi cani jayojjaya cuani. Pea cuana jjashahuabaquiiani ma meshi joya quea bame poso acani. Jamaya miquiana ma emojea'yojaa jama cuani. Pea cuana jjashahuabaquiiani miquiana quea bame, onajaya

miquianaya ba jjima quea tai nee nee cuani. Miquianaya jjashahuabatai tiitiquiani; quea bame pojjeama cuani —jamaya Jesosa cua.

⁴⁵ Oe Moisesija etehue'yo huohuijji cuani jama cua ba'a: —Jesosa, miya pojja'a ecuana nijjeya pea'ai tecuetecueani.

⁴⁶ Jesosaa oya jama huohuime aca cua ba'a: —E'e jojo nei eyaya miquianaya tecueaña. Miquianaya Moisesija etehue'yo huohuijji nisho cuani pea'ai, de. Miquiaaya pea cuana huasijje esohui quea camaja huohui nishoaña. Jamatii miquianaya ma esohui jayojja ba'e ajja; ona asahua ajja.

⁴⁷⁻⁴⁸ —E'e, miquianaya quea tai nee nee cuani, miquianaja etiiquiana jayojja, de. Miquianaja etiiquiaa Eyacuiñajjija esohui huohuijji quecua ca'ya cua jjashajja'ajjaqui ajjaa jjejojo. Jamatii miquianaaya cuia'asha poquia tiitiaña etiiquiaa quecua ca'ya cua shahuaba poquia tiitijji, equecua'yo sajaa quea pame epojji epajea'yo cuani jjejojo. Jamajjeya miquianajaya etiiquiana jayojja jama jjashahuabaquime cuani. ⁴⁹ E'e, Eyacuiñajjija eba, jamajjeya ohuaya jama huohuime aca cua yahuajo ba'a: “Eyaya ecuea esohui huohuijji cuana, e shajja'ajjajji cuana huoojeaje pea cuana huasijje. Ecuea ehoojea'yo cuana beca cuaa quecua caje'yo nei nei. Beca ca mimi panajajije onijje” jamaya Eyacuiñajji cua. ⁵⁰⁻⁵¹ E'e, miquianajaya etiiquiana huasijje huoojea ca cua Eyacuiñajjija huoojea'yo cuana. E'e, yahuajo miquianajaya etiiquiaa quecua ca'ya cua Eyacuiñajjija huoojea'yo cuana, de. Yahuajo Eyacuiñajjija esohuijo tehue ca cua

Abenijo. Miquianajaya etiiquiaa Cainiya Abeni cuiahuejjajea ca'ya cua. Majoya oya jayojjaya quea huiso cuiahuejjajea ca'ya cua Eyacuiñajjija esohui huohuijji cuana. Quijje yejje nei Eyacuiñajjija etehue'yojo tehue ca cua ojaya pea esohui huohuijjijo, Sacaniajo. Oya Eyacuiñajji nijje mimiani cuiahuejjajea ca'ya cua cuaa Eyacuiñajjija equijo, aquiana dahuajeajji pejjejo, de. Jamajjeya eyaya miya e'e jojo nei huohuiaña jama ba'a: Jjeya nei Eyacuiñajjiya miquianaya quea nee nee po mee caje'yo ojjaña etiiquianaja mimishi cuanaajo, miquianaya etiiquiana jayojja cuani jojoya. ⁵² E'e jojo nei miquianaya, Moisesija etehue'yo huohuijji cuana quea tai nee cuani. Jamatii miquianaya ca mi ca oe esohui huohuijji nisho, siajjepojji. E'e, miquianaya Eyacuiñajji nijje jjapeequi ajja nei. Pea cuana Eyacuiñajji nijje jjapeequi sa cuani, miquianaaya jjapeequi pajea meeyaña, de. Jamajjeya miquianaya quea nee nee po mee caje'yo quijje, de, quea nee tii tii cuaje'yo —jamaya Jesosa cua.

⁵³⁻⁵⁴ Jesosa mimipajea'yajo Paniseo dejja cuana, Moisesija etehue'yo huohuijji cuana quea quene nee nee cua Jesusaja esohuijo. Oya cuana jjashahuaba taiquia cua. Ohuaya cuana Jesosa huohui'ajja neinei ca cua esohui quea tai ojaya yajji nisho, ejjajejanobiaquijji yasijje edojjiji nisho.

12

Jesosaa esohui huohui ca cua ona jjashahuaba taiquianijo
(Mateo 10.26-27)

¹ Quea dejja huiso nee nee ejjachichaqui nequia cua Jesosa shajja'ajjajji. Jjiojji quishi canequia cuaa cua quea dejja huisohua jjejojo. Jesosaa o shajja'ajjajji cuana jama huohuime aca cua ba'a: —Paniseo dejja cuana jjashahuabatai majama-jaquiani. Jamajjeya aje esohui huohuijji nisho cuani, Eyacuiñajjija epeejji nisho cuani, de. Coya mi o jayojja po chana'. ²⁻³ Eyacuiñajjiya oya cuana ba cani ojaya epeejji nisho cuani. Ojaya ojjaña eba o jjashahuabaqui'yojji cuani cuana. Eyacuiñajjija eba ojjaña, de. Jamajjeya joya Eyacuiñajjiya quea ja'a po mee caje huiso tiya, quehua'ama cuaje'yo tii ojjañaja ebajji.

¡A'a quea mete pojji dejja cuanajo!
(Mateo 10.28-31)

⁴ E'e ecuea epeejji nei, ¡a'a quea mete pojji ojjaña cuanajo, eshahua cuanajo pea'ai! Oya cuaa miquianaya quecua caje'yo pojja'a. Jamatii miquianajaya edojjoshahua mano jjima cuaje. ⁵ ¡Miquianaya jja oe jjashahuabaquicue Eyacuiñajjijo, de! Shajjama' cuajo ohuaya miquianaya mano mee'yo majje cuaqui yasijje jeajea caje'yo miquea edojjoshahua.

⁶ —E'e de, quea anohuii huiso nee nee yani. Anohuii beshahua nei sosema' quea huisojojo. Eyacuiñajjiya oya cuana pajea'yo jjima acani. Ojaya eba ojjaña. ⁷ Ohuaya anohuii jaahuana cani, jamajjeya ohuaya miquianaya jaahuana neinei cani pea'aiya, de. Ojaya esico miquianajaya ehuojjaña. Jamajjeya ¡a'a pajea'yojji miquianaya ohuaya nahue cani! Anohuii ohuaya nahue cani pishana —jamaya Jesosa cua.

*¡A'a quea bicho pojji Jesosa nijje jjapeequi majje!
(Mateo 10.32-33; 12.32; 10.19-20)*

⁸ Jesosa jama cua ba'a: —Ecuea epeeji cuaa ejo huohui cani jama ba'a: “E'e, eya ca iña bicho'ama Jesosajo. Eya ojaya epeeji nei nei, e'e jojo nei”. Jamajjeya eyaya Eyacuiñajjija esohuidojojji cuana o que huohuije jama ba'a: “E'e, oya cuana ecuea epeeji nei, e'e jojo nei”. ⁹ Pea cuana ca jja ca quea bicho cuani ejo. Jamajjeya oya cuaa huohui caje jama ba'a: “Cho, eya Jesusaja epeeji pojjeama”. Jamajjeya eyaya Eyacuiñajjija esohuidojojji cuana huohuije jama ba'a: “Cho, oya cuana ecuea epeeji pojjeama, cajaa” eyaya aje —Jesosa jamaya cua —. ¹⁰ Beca cuaa eya niñeba cani; Eyacuiñajjiya maya mimishi cuijea sa acani. Peaa pojja'a Édojjoshahua Bame niñeba cani, Eyacuiñajjija ca ca maya emimishi cuijea'yojji pojjeama. Ma mimishi ani tiitiije'yo.

¹¹ —Pea cuaa miqianaya dojo caje esohuinano mese ani yasijje, Jodio dejja etii ani yasijje ecuea epeejjijojo. Miqianaya pojja'a quea mete nee nee cuaje. Miqianaya jama jjashahuabaquije pojja'a ba'a: “¿Achajja shai huohuime acajji? ¿Achajja shai saja'ame aje?” ¡A'a jamaya jjashahuabaquiji! ¡Mete'ama nei onijje mimicue! ¹² Edojjoshahua Bameya miqianaya mimi bame meesahua caje esohuinano mese nijje. Quea bame cuaje miqianaya —jamaya Jesosa cua.

¡A'a bejjojo jjashahuaba majamajaquiji!

¹³ Oe dejjaa Jesosa jama huohuime aca cua ba'a: —Esohui huohuijji, ecuanaja chii mano'yonaje. Ecue o'ija che eya bejjo esejja quia'yo jjima ecue

chiija quijjojea. Jamajjeya jama huohui'ajjame acue ecue o'i ba'a: “Che pa ichahua bejjo eseja quia'yocue!” acue —jamaya cuanaje oja chahua bejjo sa cuanijo.

¹⁴ Jesosaa jama huohuime aca cua ba'a: — Chojja de, ¿yajjajo acuae moya jama huohui'ajjame añã? Eya ca iña mique chiija quijjojea bejjo quia'yohua cue pojjeama. Maya ecuea echacojji pojjeama, de. ¹⁵ Ojjaña dejja manojeyo quea bejjo huiso cuana, aema' cuana pea'ai. Miquea aquianaa miquea bejjohua miya ba'e meesahua jjima acaje'yo, de. Jamajjeya ia'a aquiana bejjo pea'ai sa majamajaji! —jamaya Jesosa cua.

¹⁶ Majoya Jesosaa jiquio esohui ebajji huohui ca cua jama ba'a: —Oe dejja quea bejjo huiso nee ba'enaje. Anoso que quea huiso nee nee cuanaje. Sejjajeyo'yo majje quea huiso nee nee cuanaje. ¹⁷ Oya jama jjashahuabaquinaje ba'a: “De, eya quea bihui nee, quea bejjo huiso nee nee cuaje. ¿Achejo shai eyaya anoso quea huiso nequijje? ¹⁸ Eyaya pojja'a cajiyeaje'yo anoso nequijji, equi quea quemo nee nee iyaje'yo anoso quea huiso nee nee nequijji, de. ¹⁹ Majoya anoso iyajeyo'yo majje eya quea bihui cuaje, ecuea bejjo quea huiso nee nee cuaje. Quea shequiya huiso nee nee eya chachaco'yo jjima cuaje quea huiso jjejojo. Eyaya bobi quea huiso nee nee ijiaje quea bihui epojji” jamaya cuanaje ma dejja. ²⁰ Majoya aje Eyacuiñajjiya ma mecajje huohui canaje jama ba'a: “De, miya ca ca niñepoqui cuanaje. Miya jjeya nei manojeyo. ¿Ajea acuae cuaje'yo miquea aquiana jiquio miya jaahuaña? Poquijeyo'yo miya jiquio mecajje.

Chama'yo tii cuaje. Miquea aquiana, anoso, bejjo pea'ai dojo'yo jjima cuaje. Miya aema' poquije'yo cuaqui yasijje enijje jjapeequi jjima jjejojo” cuanaje Eyacuiñajji. Majoya aje mano'yonaje ma de-
 jja; chama'yo tii cuanaje —jamaya Jesosa cua—
 . ²¹ E'e de, ma dejja jayojjaya miqianaya cuaje miya bejjojo jjashahuaba majamajaquianijo. Oe dejja jjashahuaba majamajaquiani ojaya bejjojo Eyacuiñajjijo oya jjashahuabaqui jjima cuani —jamaya Jesosa cua.

Eyacuiñajjiya ojaya epeeji cuana jaahuana cani
 (Mateo 6.25-34)

²² Majoya Jesusaa o shajja'ajjajji cuana jama huohuime aca cua ba'a: —E'e jojo nei eyaya miqianaya huohuiaña: ¡A'a quea yeno jjashahuaba tiitiiquijji miqianajaya eba'ejjijo! Jama ba'a: “E'e pojja'a eya bobimajo manoje'yo; bobi yasijje cuaje'yo. Ecuea daqui pojja'a huiñaje'yo, daquima' nei nei eya cuaje'yo”. ¡A'a jamaya jjashahuaba tiitiiquijji! ²³⁻²⁴ E'e de, cuichojji cuana ca ca quea jaji nee ba'e. Oya cuana ca ca chacochocho ajja, bobi chicha ajja equi yasijje quijje e'ijjia'yojji. Eseja Chiiya jja oya cuana jaahuana cani, de. Miqianaya ca ca oe ohuaya jaahuana neinei cani. ¡Jama jjashahuabaquimeya jja oe pocue ca quea bame eba'ejji, daquijo, bobijo! ²⁵ ¿A'a miya quea ao cuaje'yo jjashahuabaquime cuani? Chojja, jamatiiya cuaje'yo. ²⁶ Jamajjeya oe ¡a'a aquianajo jjashahuaba tiitiiquijji! —Jesosa cua —. ¿Apiojji miqianaya jjashahuaba tiitiiquiani miqianajaya daquijo? ²⁷ ¡Bacue shasha tiiani!

Shasha cuana chacochocho ajja; oja daqui cuana soco ajja. Jamatii quea bame nee nee nequiani. Jamaya Eyacuiñajjiya shasha pohua mee cani. Jodioja emeshi mese yahuaajo nei nequia cua Sanomo bajjani. Ohuaya daqui quea nahue nee nee huosho ca cua. Jamatii oja daqui quea bame pishana cua, shasha ca ca oe quea bame nee nee cuani. ²⁸ E'e, Eyacuiñajjiya shasha cuana pohua mee cani quea bame nee. Jjeya shasha cuana enequi; mecahuajje yaa'yani, joca'yani; dahuaajea cani cuaa pojja'a, chama'yo tii cuani. Jiquio ecua Eyacuiñajjiya shasha quea bame nee pohua mee cani jamaya ohuaya e'e jojo nei miqianaya ba'e meesahua caje'yo quea bame nee nee. Miqianaya ojaya quea boti nee nee cuani. Miqianaya jjashahuaba taiquiani jama ba'a: "E'e pojja'a eseya jaahuana jjima Eyacuiñajjiya". Cho, ¡a'a jamaya jjashahuabaquijji! —jamaya Jesosa cua.

²⁹ —E'e, a'a jama pea'ai jjashahuabaquime pojji ba'a: "¿A'ya shai che ijjiaje? ¿A'ya shai che ishije; chama ena? ¿A'ya shai che ecuaa huoshoje?"

³⁰ Ojjaña cuana Eyacuiñajjiya epeeji pojjeama cuana aquianajo jjashahuabaquiani tii tii. Eyacuiñajjiyo jjashahuabaqui ajja. E'e jojo nei esejaya Chii eyajo ani miqianajaya aquianajo, eba'ejjijo jjashahuabaquiani. Ojaya eba ojjaña, de. Jamajeya ohuaya miya jaahuana cani. ³¹ ¡A'a pea cuana jayojja pojji! ¡Jjashahuabaquicue oe Eyacuiñajjiyo! ¡Onijje oe jjapee tiitiquicue! ¡Ojaya esohuijo jjashajja'ajja tiitiquicue! Jamaya jjashahuabaquianijo ohuaya miqiana huasijje aquiana eba'e meeji quia caje'yo —jamaya Jesosa cua.

*Jesosaa eseya ojo chacochocho ani quijje eyajo
quea huiso sosequia caje'yo*

(Mateo 6.19-21)

³² —E'e ecuea epeeji cuana, ja'a quea mete pojji Eyacuiñajji nijje jjapeequi majje! Ohuaya miqianaya quea bihui po mee caje. Ohuaya miqianaya ba'e tiitii mee caje'yo eyajo. ³³ ¡Quiacue miquianaaya aquiana aema' cuana huasijje! Miquianaaya quia jjima ajje miqianajaya aquiana sii ca chana'; nojjo ca'yo majje huiñaje'yo. ¡Jjeya Eyacuiñajjijo chacochocho neineicue! E'e jojo nei ohuaya quijje miqianaya sosequia caje'yo quea huiso nee nee eyajo. Miquianajaya esiiiji pojjeama, miqianajaya epo'yo tii tii. ³⁴ E'e jojo nei miqianajaya aquiana equijo jaahuanaña, jamatii jjashahuabaquiani miqianajaya equijo. Miquianajaya aquiana ca ca eyajo jaahuanaña, jamatii jjashahuabaquiani eyajo eba'e'yojjijo —jamaya Jesosa cua.

¡Acua epo oe anicue!

³⁵⁻³⁶ Jesosaa jama huohuime aca cua ba'a: —Shajja'ajjacue jiquio esohui ehuohui'yojo: Oe emeshi mese poquinaje cuiñajji yasijje. Ojo chacochochoani cuaa emeshi mese ishoa'ajja canaje. Echacojjija ba jjima ache shono shai ojaya emeshi mese cueje o'oya. Jamajjeya daqui bame huosho canaje, cuaquijiji jijinequinaje pea'ai. Cahui jjima cuanaje ishoa'ishoanequi jjejojo. Emeshi mese cue'yajo, ojo chacochochoani cuaa dobiqii mee ca'yonaje ojaya equi yasijje. Emeshi mese quea bihui cuanaje ohua ishoa'ajja ca'aninaje jjejojo. ³⁷ Jamajjeya ojjaña ojee anioquenaje

e'ijjia'ijjiajji. Majoya aje ojee ijia'ijjia majje ojaya echacojji cuana quea bihui nee nee cuanaje. ³⁸Jamaya oya cuana quea bame cuanaje ishoa'ajja neinei canequinajejo. Mecajje, mecashono, epo-jjajo pea'ai ishoa'ajja canequinaje, de. ¡Jamaya miquianaya pocue! ¡Ejo jja'ishoa'ajjaqui anicue! ³⁹E'e, jiquio jama cuaje ba'a: Equi meseya siipojji ache shono cueje poso acani. Ojaya eba jojjemo, ohuaya ishoa'ajja ca anime equi jaahuanajjiya. ⁴⁰Eya miquianajaya Edoe Mese, ¿ache nei eshequi nequijo eya miquiana que cueje o'oya ebajo ese? ¡Jamajjeya jja'ishoa'ajjaqui anicue! —jamaya Jesosa cua.

*Ojo chacochoacoani quea bame nee nee cua
(Mateo 24.45-51)*

⁴¹Penohua Jesosa jama huohui'ajjame aca cua ba'a: —Esohui huohuijji, ¿a'a jiquio esohui ecuanajaye nei ebajji? Ojjañaja ebajji pojja'a ca coma.

⁴²Jesosa jama cua ba'a: —Eyaya huohuinaje jiquio esohui onaa shajja'ajja caje huiso tiija ejjashahuabaquijji. Shajja'ajjacue jama ba'a: Oe emeshi mese poquinaje pea cuiñajji yasi-jje. Poqui jjimahuaa ojo chacochoacoani huohui canaje pea ojaya echacojji bobiajji. Ojo chacochoacoaniya emeshi meseja sohui shajja'ajja nei canaje. ⁴³⁻⁴⁴Emeshi mese cue'yo majje quea bihui cuanaje ojo chacochoacoani quea bame nee nee chacochoaconajejojo. Jamajjeya emeshi meseya oya jama huohuime acanaje ba'a: “¡Miyaya jjeya ojjaña ecuea aquiana cuana jaahuacue, miyaya ecuea esohui shajja'ajja neineinajejojo!” Jamajjeya ojo chacochoacoani quea bihui cuanaje. ⁴⁵Pea

ojo chacochoacoani jjashahuabaqui jjima cuanaje. Jama jjashahuaba taiquime cuanaje ba'a: "Ecuea emeshi mese quiije nei cueje'yo, jamajjeya eya pea echacojji cuana huasijje bobi quia sa po ajja. Poquije ca iña ishi'ishiya". Majoya oya ojaya pea echacojji cuana nijje jjacua majamajaqui nequinaje, huoo majamajanequi jjejojo. Oya chacochoaco jjima cuanaje. ⁴⁶ Majoya aje oe ojaya emeshi mese cue'yonaje. Emeshi meseya ba caña'yonaje ojo chacochoacoani ehoojaa. Majoya aje quea quene nee nee poña'yo majje quecua caña'yonaje shajjama'jojo. Ohuaya jeajea canaje quea huesha. Jamaya Eyacuiñajjiya ojjaña mimishi cuana acaje'yo, huoojeajea caje'yo cuaqui yasijje —jamaya Jesosa cua.

⁴⁷ —E'e de, echacomeejji eba emeshi meseja esohui, oya ca ca shajjama' nei nei cuanaje. Jamajjeya aje oe emeshi meseya echacomeejji cuia caña'yonaje. ⁴⁸ Pea echacomeejji ca ca ba jjima nei emeshi meseja esohui cuanaje. Jamajjeya emeshi meseya echacomeejji oe pojji cuia meeme acanaje oja ba jjimajojo. Jamaya Eyacuiñajjiya esohui eba nei nei epo cjjashajja'ajjaquiahua ojaya epeeji nei nei epojji. Shajjama' jojaya ca Eyacuiñajjiya cuaqui yasijje jeajea caje'yo —jamaya aca cua Jesosaa.

*Beca cuana Jesosaja epeeji nei cuaje beca cuaa
ca ca cajaa acaje
(Mateo 10.34-36)*

⁴⁹ Jamaya Jesosa cua ba'a: —Eya cueyanaje ojjaña nijje jjapeequiya, beca cuana jjapeequije

enijje, beca cuana ca ca enijje ejjapeequijji pojjeama. Jama huoojeameya eya acanaje Eyacuiñajjiya. ⁵⁰ Eya quea nee nee cuaje'yo, mano mee caje'yo cuaa. Eya manocuaji'yo sa cuani ojjañaja mimishi cuana cuijea'yojji sosejje. Quea camaja eya cuaje'yo, de. Mano'yo majje ca eya camaja'ama cuaje'yo. ⁵¹ ¡A'a jjashahuabaquijji eya cueyanaje ojjaña cuana ojjaña meshijo ojee quea bei ba'e mee'yohua! Chojja, de. Pea cuana quea mase cuaje ecuea epeeji cuana nijje. ⁵² E'e, jamaya cuaje. Oe equijo ba'e beca cuana ecuea epeeji nei, beca cuana ca ca ecuea epeeji pojjeama, Eyacuiñajjiya epeeji nijje ba'e sa po ajja oya. ⁵³ Ebacua ejja esohui ba epo ejeajji nijje ba'e sa po ajja ohua quea mimishi e'aca cuani jjejojo. Enaeseya oja bacua piona tecuea cani, ecuea epeeji jojo. Jamajjeya oja bacua piona onijje ba'e sa po ajja. Yano mese osecuajana nijje mimijajiani o esohui ba epo jojoya. Jamajjeya osecuajana onijje ba'e sa po ajja. E'e, jamaya miquianajaya equijo cuaje —jamaya Jesusaa aca cua.

Ojjañaja eba ena cuaje jamatii Jesosa ba jjima cua

(Mateo 16.1-4)

⁵⁴ Majoya Jesosa jama cua ba'a: —Mecajjeahua quea ichi nee nequijo, miquianaya jama cuani ba'a: “E'e de, quea ichi nequi, ena cuaje, de”. E'e jojo nei ena cuani. ⁵⁵ E'e de, jamaya pea'ai miquianaya cuani ba'a: “E'e de, eeno jjayejjequiajo quiyo dobi'yani”. E'e jojo nei quiyo dobi'yani. ⁵⁶ Miquianajaya eba ena cuanijo, quiyo dobi yanijo pea'ai. Jamatii beshahua nei miquianaya ca jja ca oe

jjashahuabaqui jjima e cueyanajejo. ¡Miquianaya jja oe jjashahuabaquicue Eyacuiñajjija esohuijo! Jamajjeya eya miquianaaya baja —jamaya Jesosa cua.

Pea esohui ejjashahuabaqui ja'ajjijo
(Mateo 5.25-26)

⁵⁷ —¿A'a miquianajaya eba quea bame eba'ejji? E'e pojja'a, jamajjeya jjashahuabaquicue jiquio esohuijo jama ba'a: ⁵⁸ Miquiana nijje oe dejja quea quene nee nee cuajo miquianajaya aquiana sosequia jjimajojo, ohuaya miquianaya dojo caje sohuinano huasijje. Jamajjeya ¡dojo jjimahuaa aquiana miquianaaya sosequia'yocue! Miquiaa mi sosequia'yajje ohuaya miquianaya dojo caje sohuinano huasijje ejeadobia meejji. Majoya miquianaya sohuinanohua jeadobia caje. ⁵⁹ E'e jojo nei ejeadobia tii jaaje. Ejeacuaya'yojji pojjeama miquiaa mi sosequiajje. Miquianaya sosequiajeyo'yajje ca mi ca oe jeacuaya caje'yo. ¡jiquio jayojjaya oe pocue! Jamajjeya ijjeya Eyacuiñajji nijje jjapeequicue miquianaya mano'yo jjimahua, cuaqui yasijje jea jjimahua pea'ai! Jamajjeya miya cuaqui yasijje ejeadobiajji pojjeama —jamaya Jesosa cua.

13

¡Jjapeequicue Eyacuiñajji nijje!

¹ Majoya pea cuana poquia cua Jesosa baa. Beca cuaa jama huohui'ajjame aca cua ba'a: —De, jjeya nei Pinatohua, emeshi meseya Jodio dejja cuana quecua mee ca'yonaje. Ma dejja cuana Janinea

meshijo ba'e poquinaje Jenosanena huasijje Eyacuiñajji bihuiaa. Eyacuiñajjija equi yasijje do-biqui majje ijjiacajji ehuone' cuana quecua canaje edahuajji. Eyacuiñajjija equijo nequi sohuinano cuaa do-biqui majje quecuajea ca'yonaje. Hua canaje equēcua'yo cuanaja ena' ijjiacajjija enajo, de. Quea mimishi nee nee cuanaje emeshi mese Pinato, de. ¿A'a ma Jodio dejja cuana quecua ca'yonaje quea mimishijojo? —jamaya poso aca cua.

² Jesosa jama cua ba'a: —Chojja, de. Miquianaya jjashahuaba taiquiani. Jodio dejja cuana quea mimishi cuani quecua'yo jjima. ¿Yajja ajjaja oe pea cuana Jenosanenajo ba'e mi mano'yonaje oya jayojjaya pea'ai ca jja coma?
³ Jamajjeya miquianaya mano'yo majje pea'ai Eyacuiñajji nijje jjapeequi jjima jjejojo cuaqui yasijje poquije'yo. ⁴ E'e, Sinoe cuiñajjijo pea dejja cuana mano'yonaje. Equi quea ao nee nee iya canaje meshi edahua ca'a. Meshi ca'a jjaajajeaqui'yo majje dejja cuiamo'ijea ca'yonaje meshiya. Quea huiso nee nee, 18 dejja cuana mano'yonaje, de. ¿A'a oya cuana quea mimishi nee neejo mano'yonaje poso aña? Chojja, de. ¿Yajja ajjaja oe pea cuana Jenosanenajo ba'e mi mano'yonaje oya jayojjaya pea'ai ca jja coma? Quea mimishi nee nee cuani; oya cuana eshe, de, mano'yo jjima. ⁵ Eyaya huohuije o'oya, miquianaya Eyacuiñajji nijje jjapeequi jjima po majje cuaqui yasijje poquije'yo, de —jamaya Jesosa cua.

Esohui acui jjajjama' cuajo

⁶ Jesosaa jiquio ehuohui'yo jama huohuime aca cua ba'a: —Oe dejja acuijjajja banajji epo poquinaje que yasijje. Acui tii majje jjajjama' cuanaje, de. ⁷ Ma dejjaa ojaya echacojji jama huohuime acanaje ba'a: “De, pea beca peejjima shequiajame ca cuanaje ma acui. Jjajja ajja cuanaje. ijajajea'yocue; pea acui bana'yocue!” ⁸ Ojaya echacojjiya jama huohuime acanaje ba'a: “Emeshi mese, jishoa'ajjacue oe eshequiajame! Eyaya jaahuana neineije so'o. Meshi tio majje ana'aija see meshi tejee huanaje so'o. ⁹ Acui eya jaahuana neinei ajje quea jjajja huiso nee nee cuaje pojja'a. Jjajjama' po o'oyajo oe cajajajea'yahua” jamaya ojaya echacojji cuanaje —jamaya Jesosa cua —. E'e, ma acui jjajjama' jayojja oe dejja jjapeequi jjima Eyacuiñajji nijje. Ma echacojjiya jjajja meesahua cani jama jayojja eyaya aña, dejja cuana jjapeequi meesahuaña Eyacuiñajji nijje —jamaya Jesosa cua.

Jesosaa oe epona mo'aa jjapiqui meequi ca'ya cua

¹⁰ Ejomishocajji pojajajo Jesosa poquia cua Jodi-oja ejjachichaquijji equi yasijje esohui huohuiya. ¹¹ Oe epona mo'aa ania cua jomajo. Edosiquianaja jjamo'aaqui mee'yo cua yahujajo. Quea huiso nee nee, 18 eshequiajame epona ejjamo'aaqui'yo ania cua. ¹² Jesosaa oya ba majje jama huohui'ajjame aca cua ba'a: —¡Epona, cuecue! Eyaya miya jjadaasapiqui meeje'yo.

¹³ Majoya Jesosa que cueajo Jesosaa emeya napa cajje epi nei nequi'ya cua. Ma eponaa Eyacuiñajji bihuia ca cua. ¹⁴ Jesosaa ma epona jjadaasapi

meequi ca'ya cua ejomishocajji pojajajo. Majoya aje Jodioja ejjachichaquiiji equi jaahuanajji Jesosa nijje quenequenea cua. Dejja cuana jama huohuime aca cua ba'a: —Me oeje oe cahuime echacojji yani. ¡Ma pojja cuanajo cuecue ejjaa-jaqui'yojji! ¡A'a ejomishocajji pojajajo Jesosaja jjaajaqui mee'yohua cuejji!

¹⁵ Jesosaa ma esohui shajja'ajja majje jama tecueame aca cua ba'a: —Chojja, ¡a'a jamaya mimijji! Miquianaya jama cuanaje ba'a: “¡A'a chacojji ejomishocajji pojajajo!” Miquianaya ca ca jiquio pojajajo chacochoqui. Miquea ana'ai ejomishocajji pojajajo ijia'ijia mee añá. Miyaya miquea ana'ai ejeyo nequi pichojeaña ena ishi meequiji. ¹⁶ E'e, jiquio epona mi jayojja, oe Jodio epona. Quea huiso nee nee, ¹⁸ eshequiajame Edosiquianaa jjamo'aaqui mee ca'ya cua, de. ¿Yajjajo acuaeya mi cuayajea mee'ajjaqui'yaña so'lo ejomishocajji pojajajo? ¿A'a mi o jjapiqui mee'yo ajja jjejojo jama cuani? ¿A'a miya jjashahuaba taiquiani jjejojo jama cuani? —jamaya cua Jesosa.

¹⁷ Jesosaja esohui shajja'ajja majje o ñiñebajji cuana quea bicho po'ya cua. Beca cuana ca quea bihui cua Jesosa nijje, ma epona jjapiqui mee ca'yajo. E'e de, Eyacuiñajjiya Jesosa quea sohui poja po mee ca'ya cua.

*Esohui acui so' che biso neijo motasa sojo
(Mateo 13.31-32; Macoso 4.30-32)*

¹⁸ Majoya Jesosaa jama huohuime aca cua ba'a: —Ebionei Eyacuiñajji oe pojji dejjaja Emeshi Mese nei cuaje, quiije ca ca Eyacuiñajji ojjañaja Emeshi Mese nei cuaje, oya quea epeejji huiso cuaje. ¹⁹ E'e,

oe motasa so' biso nei tii majje acui quea quemo jayojja cuani, huapeje cui quemajja. Cuichoiji motasa acuijo jaani. Ma eso' biso nei jayojjaya Eyacuiñajjija epeeji cuani oe pojji jayojjaya cuani ebionei. Majoya quea huiso nee nee ojaya epeeji cuaje motasa acui jayojjaya —jamaya Jesosa cua.

Esohui ehuohui'yojji pahui shejee meeji
(Mateo 13.33)

²⁰⁻²¹ Pea esohui ehuohui'yo Jesosaa jama huohuime aca cua ba'a: —Eyacuiñajji ojjañaja Emeshi Mese nei cuaje pahui shejee yani jayojjaya. Jamaya oe epona pahui dahuaaje cuanaje. Oe pojji nei eshejee meeji iya canaje. Majoya aje ohuaya jeahuahuo canaje quea huiso pohuipohui pahui yajji. Majoya aje ojjaña shejee'yonaje pohuipohui. Majoya aje quea huiso pahui cuanaje. Jamaya Eyacuiñajjija epeeji pahui shejee meeji jayojjaya cuani. Ebionei oe pojji epeeji cuana cuani, majoya aje pea cuana jjashahuabaqui mee cani Eyacuiñajjija epeeji epojji. Quea huiso nee nee po mee cani —jamaya Jesosa cua.

Esohui ehuohui'yojji esecuejjani biso neijo
(Mateo 7.13-14, 21-23)

²² Majoya aje Jenosanena huasijje poquije, Jesosa pea cuiñajji cuana huasijje dobiqúi poquia cua sohui huohuiya. ²³ Jesosa aniñaqui jjimahuajo pea cuiñajjijo ba'eya oya jama huohui'ajjame aca cua ba'a: —¿A'a oe pojji Eyacuiñajjija epeeji cuana poquije'yo eyahuasijje onijje ba'e'yohua?

Jesosa aje majoya jama cua ba'a: ²⁴ —E'e de, yani oe esecuejjani biso nei edobiquijji eyahuasijje. Joya jjapeequi sa cuani enijje ma esecuejjani biso neijje dobiqui majje poquije eyahuasijje. Beca cuana ca ca poqui ajja eyahuasijje, enijje jjapeequi ajja jjejojo. ²⁵ E'e, eya oe equi mese jayojja. Equi meseya esecuejjani ca'a ca'yonaje, beca cuana edobiqui cuajejje. Majoya esecuejo tii nequijeaje. Oya cuana jama po'ajja nequinaje ba'a: “Equi mese, ¡ca'apejocue ecuana edobiquijji!” Equi mese jama cuanaje ba'a: “Chojja, ecuea miquianaya ba jjima, de”. ²⁶ Majoya oya cuana jama po'ajja nequinaje ba'a: “De, ecuanajaya miya eba, minijje ijja'ijjianaje. Miyaya esohui huohuinaje ecuanaja meshijo”. ²⁷ Majoya aje oya jama cuanaje ba'a: “Chojja, ecuea miquianaya ba jjima. ¡Poquicue quea huesha, quea mimishi nee nee mi ca cuanaje! Miquianaya ecuea epeeji cuana pojjeamajojo, dobiqui mee jjima aña”.

²⁸ E'e de, miquianaya ma dejja cuana esecuejo nequi tii tii jayojja cuani. Miquianaya dobiqui sajo pa neineije'yo; miquianaya quea yeno nee nee cuaje'yo. Jamaya aje nequiana esecuejo nequi cuaje ba'a: “Ecuea etiiquiana ca dobiquia cua, e'e jojo nei oya cuana Eyacuiñajjija epeeji cua. Oya bajjani cua ba'a: Amajama, Isaaca, Jacobo, Eyacuiñajjija esohui huohuijji nei cuana pea'ai. Jjeya Eyacuiñajji nijje nequi. Ecuana capoqui'yahua eyahuasijje”. Cho, miquianaya poqui ajja; quea yeno nee nee cuaje'yo. Shajja'ajja sa po ajja cuanaje ecuea esohui, Eyacuiñajjija esohui pea'ai. ²⁹ Ojjaña dejja joya enijje jjapeequi jjima dobiqui ajja tii eyahuasijje. Ojjaña meshijo

ba'e Eyacuiñajji nijje jjapeequiani eyahuasijje poquije'yo. Jomajo onijje ijia'ijjiaje quea bihui epojji. ³⁰ E'e, jjashahuabaquicue jiquio esohuijo jama ba'a: Beca cuana jjeya ona huoojea'yojji cuani eyajo ona huoojea'yojji pojjeama cuaje'yo. Joya jjeya ona huoojea'yojji pojjeama ca ca eyajo ona huoojea'yojji nei nei cuaje'yo e jayojja —jamaya Jesosa cua.

Jesosa quea yeno cua Jenosanenajo ba'eca cuanajo

(Mateo 23.37-39)

³¹ Majoya aje Paniseo dejja cuana Jesosa que cueya cua onijje mimiya. Majoya aje oya cuana jama cua ba'a: —¡Poquicuajicue oe, miya emeshi meseya, Enodeya, quecua sa acani!

³² Majoya aje Jesosaa jama aca cua ba'a: — Cho, ¡miquianaya jja ca oe poquicuajicue emeshi mese yasijje, Enode yasijje; oya dejja quea mase nee nee! Jjeya jiquio pojajajo, mecahuajje pea'ai eyaya eshahua quea mase cuayaqui mee'yaña, emano cuana jaa jjaajaqui mee'yaña. Ma mecahuajje acua cuaje'yo ecuea echacojji; ¡jamaya Enode aquicue! ³³ E'e jjeya ca iña poquije'yo Jenosanena huasijje. Jomajo eya manoje'yo ma ecua Eyacuiñajjija esohui huohuijji cuana mano ca'ya cua huasijjeya.

³⁴ Majoya Jesosa quea yeno nee nee cua Jenosanenajo ba'e cuanajo. Oya jama cua ba'a: — Jodio cuana Jenosanenajo ba'e, miquianaya ecuea quea jea nee nee. Jamajjeya eya miquianajo quea yeno cuani. E'e, miquianaaya aje oe Eyacuiñajjija esohui huohuijji quecua'ya cua; ojaya

ehuoosjea'yo cuana jajahuejjajea'ya cua meiya pea'ai. ¡Bacue! Oe cachina enaeseya ebacua ejaahuanajji huojje cani. Jama jayojjaya eyaya miquianaya iyaa sa neineiaña e que ejaahuanajji. Jamatii miquianaya enijje jjapeequi sa po ajja. ³⁵ Jamajjeya eya quea yeno nee nee miquianajo cuani. Miquianaaya Eyacuiñajji eya pea'ai cajaa anaje. Jamajjeya ohuaya jaahuana ajja miquianajaya cuiñajji Jenosanena. Jamatii miquianaaya nei jaahuanaje; ba'ajja, quea camaja cuaje. Miquianaaya eya cajaa anaje, jamajjeya eba beca'yojji pojjeama mo nequianajaya. Miquiaaya eya cue o'oyajo jama aje ba'a: “Miya Eyacuiñajjija huosjea'yo ojjaña jaahuanajji. Eyacuiñajjiya miya cajaanuana cahua quea bame” jamaya miquianaya cuaje quijje —jamaya Jesosa cua Jenosanenajo ba'e cuana nijje.

14

Jesosaa oe dejja eshejje tii tii nequi shacuashacua mee ca'ya cua

¹ Oe ejomishocajji pojjajo Paniseo dejja etiiya Jesosa iyaa ca cua ijia'ijjiaa. Jamajjeya Jesosa poquia cua oja equi yasijje. Pea Paniseo dejja cuana Moisesija etehue'yo huohuijji cuana pea'ai poquia cua oja equi yasijje ijia'ijjiaa. Oya cuana Jesosajo jama jjashahuaba taiquime cua ba'a: —Jesosaa pojja'a oe jjaajaqui mee caje'yo ejomishocajji pojjajo; ba'ajja.

² Jesosa pejejo oe dejja quea mano nee, eshejje tii tii nequia cua. ³ Jesosaa oya cuana jama

huohui'ajjame aca cua ba'a: —¿A'a ya che jjaajaqui mee'yome jiquio ejomishocajji pojajajo? E'e pojja'a, chojja pojja'a. ¿A'ya acuae miquianaya jjashahuabaquiani so'o?

⁴ Oya cuana mimi jjima nequia cua Jesosa bahuejjajji nisho. Majoya aje Jesusaa ma dejja eshejee tii nequi napa ca cua emeya. Ma dejja shacuashacua mee ca'ya cua. Jesusaa oya jama huohuime aca cua ba'a: —¡Poquicue miquea equi yasijje!

⁵ Majoya Jesusaa Paniseo dejja cuana jama huohuime aca cua ba'a: —Miquianaya chacochoani ejomishocajji pojajajo. Bacue miquea ebacua, ana'ai pojja'a ejomishocajji pojajajo jjani quea doe yasijje oquequiajo, miquianaaya jjequishuajeyo. Jamaya miya chacochoani ¿a'a e'e? E'e jojo nei. Jama jayojjaya shacuashacua mee'yomeya eyaya anaje —jamaya Jesosa cua.

⁶ Paniseo dejja cuana jjashahuabaquiequi jjejojo, mimi jjima nequia cua.

E'ijjia'ijjiajji equi yasijje iyaa ca cua

⁷ Majoya Jesusaa Paniseo dejja cuana nijje ijjia'ijjiaa cueaniya ba ca cua Paniseo dejja cuana e'anijji bame bame sa'ajja cuequi. Ba majje jama huohuime aca cua ba'a: ⁸ —Oe equi meseya miquianaya pojja'a iyaa caje ijjia'ijjiaa. ¡A'a e'anijji quea bame sa'ajjajji! ⁹ Equi meseja epeeji nei cueje, ca'ani'yahua ma e'anijji bame bamejo o pejejo. Jamaya miquianaya nijje mimije ba'a: “¡Nequisohuacue miya; poquicue pea e'anijji yasijje! Ecuea epeeji ca jiquiojo ca'ani'yahua”. Quijjejjenei nequi e'anijjijo anioque'yo majje quea

bicho miya cuaje ojjaña ba caje'yo jjejojo. ¹⁰ E'e de, jamajjeya miqúanaya iyaa cajje ijja'ijjiaa, janiocuecúe pea cuana nijje quijjeyejjenei nequi e'anijjijo! Majoya ma equi mese cueje mi que pojja'a, jama huohuime acaje ba'a: “¡Miya cuecúe e'anijji bame yasijje e pejjejo!” Majoya pea cuaa ba caje miya anijji bamejo ani. Jamajjeya miqúanaya quea bihui nee cuaje. ¹¹ Jamaya cuaje miqúanaya. Eyacuiñajjija eba ojjaña jama cuani. Miqúanaya jama jjashahuaba taiquime cuani ba'a: “Eya che oe ese ejja quea bame nee nee cuani”. Cho, Eyacuiñajjija eba miya. Miqúanaya jja oe jjashahuaba bamebamequicue jama ba'a: “Eya ca ña pea cuana ba'e meesahua sa cuani oya cuana quea bame epojji”. Majoya aje Eyacuiñajjiya miqúanaya quea bame ba'e meesahua caje. Majoya miqúanaya dejja quea bame nee nee cuaje —jamaya Jesosa cua.

¹² Majoya Jesosaa Paniseo dejja etii jama huohuime aca cua ba'a: —Jamatii miquea bobi quea huiso anijo, miquea huapa pojjeama, miquea epeejji nei pea'ai miyaya iyaaña ijja'ijjiaa. ¹³ Jamajjeya miya ohuaya iyaa caje esosejjeya. ¡A'a jama amajamajajji! ¡Iyaacue aema' cuana, jeo'ajja cuana, poquideja cuana, cojjama' cuana iyaacue bobi ijjaa pea'ai! ¹⁴ Ohuaya nequiana ca ca sosequia jjima miya acaje. Majoya miyaya ma jayojja ajo Eyacuiñajjiya miya quea bihui nee po mee caje. Quijje miya eyajo ba'eje'yo Eyacuiñajji nijje. Majoya aje Eyacuiñajjiya miya eyajo sosequia caje'yo quea huiso nee —jamaya aca cua Jesosaa.

Esohui ehuohui'yo ojee e'ijjia'ijjiajji
(Mateo 22.1-10)

¹⁵ Oe dejjaa Jesusaja esohui shajja'ajja majje Jesusa jama huohuime aca cua ba'a: —Ojjaña quea bihui cuaje eyajo ojee ijia'ijiani Eyacuiñajji nijje oja epeeji cuana nijje pea'ai.

¹⁶ Jesusaa jama huohuime aca cua ba'a: —E'e jojo nei, ca joya eyahuasijje poquije'yo quea bihui nee cuaje. Jiquio esohui ehuohui'yojo ca jama jjashahuabaquime pocue ba'a: Oe emeshi meseja bobi quea huiso aninaje. Iyaa canaje dejja cuana quea huiso nee nee. ¹⁷ Bobi acua cuajo, huoojea canaje ojaya echacoji ona iyaaa. Iyaa canaje ojaya epeeji cuana. ¹⁸ Oe epeeji jama cuanaje ba'a: “De, eya poqui sa po ajja, jjeya jjeshenaje meshi, eya poquije ca iña meshi baa”.

¹⁹ Pea epeeji jama cuanaje ba'a: “De, eya poqui sa po ajja pea'ai, eyaya jjeshenaje me oeje huosome ana'ai acuijo she'anayijaca. Poquije ca iña ana'ai jaahuanaa”. ²⁰ Pea epeeji jama cuanaje ba'a: “De, poqui sa po ajja ca iña; oya ca iña jjeya nei jjahuanaquiaña”. ²¹ Echacojjiya oja meshi mese yasijje cue'yo majje huohui canaje ojjañaja esohui ma cue ajja cuanaje cuanaja. Majoya emeshi mese huohui cajje quea quene nee cuanaje. Huoojea ca o'oyanaje ojaya echacoji pea iyaaa. Jama cuanaje ba'a: “¡Jjequicue jjeyahua nei pea cuana! ¡Iyaaquicue aema' cuana, jeo'ajja cuana, poquideja cuana, cojjama' cuana pea'ai ecuea equi yasijje bobi ijiaa”. ²² Majoya echacojji poquinaje pea jjequiya. Jjequi majje echacojjiya emeshi mese jama huohuime acanaje ba'a: “Emeshi mese, eyaya pea cuana jjequinaje, e'anijji

cuiñajeyo jjima cuanaje. Quea dejja huiso cue jjima, de”. ²³ Jamajjeya emeshi mese jama cuanaje o'oya ba'a: “¡Poqui o'oyacue quea huesha nee nee; pea cuana ba'e yasijje iyaaquicue! ¡Cue meecue pea cuana: “Ecuea e'aniiji cuiñajeyo jjima” acue! Ecuea equi cuio mee sa aña dejjaa. ²⁴ Ecue epeeji cuana ca ca eyaya ebionei iyaa'ajjanaje, jamatii enijje ijia'ijia jjima cuani” jamaya cuanaje emeshi mese —jamaya aca cua Jesusaa. Jamaya Eyacuiñajjiya dejja cuana quea huiso nee nee iyaa'ajja cani, jamatii oe pojji poquiani onijje ijia'ijiaa.

Quea camaja Jesusaja epeeji epoji
(Mateo 10.37-38)

²⁵ Ojjaña Jesosa equijje aca poquia cua. Majoja Jesosa jjabajeaqui'ya cua. Ohuaya jama huohuime aca cua ba'a: ²⁶ —¡Miquianaya enijje jjapee neinei qui sa cuani, eya oe quea jea nee nee acue! ¡Miquea huapa pojjeama oe pojji quea jea acue! Miquea enaese, mique chii cuana, mique huanase cuana, mique bacua cuana, mique doe, mique jjo'i jama, ¡quea jea nee ameya mo oe acue! ²⁷ Miquianaya enijje jjapeequiajo pea cuana miquiana nijje mimijajije. E'e, jiquio ecua acui ecueata'apee quea camaja e'aboji jama jajoja enijje jjapeequiajo quea camaja cuaje. E'e de, pea cuaa miquianaya cuia sa acaje, quecua sa acaje pojja'a enijje jjapeepajeaqui'yo ajjajojo. Miquianaya ecuea epeeji nei po tiitianiyo jamajjeya e'e jojo nei miquianaya ecuea epeeji nei nei cuani. ²⁸ ¡Ejo jjashahuaba neinei quicue enijje jjapeequi jjimahua, quea camaja epo cuahua-

jje! Miya quea nee, quea yeno pojja'a cuaje eni-jje jjapeequi majje. E'e jojo nei oe dejja equi iya jjimahuaajo jjashahuabaquiani ma equi e'iyajji nishojo. ²⁹ Majoya ohuaya cajaa acanaje mi iya majje. Beca cuaa niñeba canaje jama ba'a: ³⁰ “E'e de, ma dejjaa iya'ajja canaje, jjashahuaba neinei equi jjima jjejojo mi iyajeyo canaje”. E'e, jamaya enijje jjapeequi jjimahuaajo ijjashahuaba neinei quicue ejjapee tiitiquijji enijje!

³¹ —E'e de, oe emeshi meseya pea emeshi mese nijje jjaquecuaqui mee sa acanaje. Ebionei ohuaya sico canaje ojaya sohuinano cuana. Ojaya yani 10 mil sohuinano cuana, quea huiso pishana. Pea emeshi meseja ca ca sohuinano 20 mil cuanaje, quea huiso nee nee, de. Jamajjeya ma emeshi mese oe pojji pishana sohuinanojo jjaquecuaqui mee jjimahuaa jjashahuaba neinei quinaje. ³² Oya jama cuanaje ba'a: “De, quea camaja, ecuea oe pojji sohuinano yani”. Jamajjeya emeshi meseya pea emeshi mese yasijje oe sohuinano huohui pohua huoojea canaje jjaquecuaqui mee sa po ajjaa jjejojo. Onijje jjapeequi sa cuanaje.

³³ E'e, jamaya miquianaya jjapeequi sa cuani enijje pojja'a. ijjashahuaba neinei quicue ejo jjapeequi jjimahua! Quea camaja cuaje enijje jjapeequi majje —jamaya Jesosa cua.

Ehuohui'yo sanejo

(Mateo 5.13; Macoso 9.50)

³⁴ Jesosaa pea esohui jama huohuime aca cua ba'a: —Sane quea bame nee nee. Jamatii sane sese'ama cua jjemo jeajea cajji. ³⁵ ¿Achacua jeajea cajji? Quea huesha nee nee. E'e, quea huesha jea

jjima ca ca meshi quea tai sane tejee cuaje, saneya acui tii mee jjima acaje. Jamaya miqianaya enijje jjapeequiani, majoya jjapeepajeaquiye'yo pojja'a. Miquianaaya eya pajea'yo majje eyaya miqianaya jeajeaje'yo quea huesha nee nee sane jayojjaya. Jamajjeya ijjashahuaba neineiquicue enijje jjapeequi jjimahua! —jamaya Jesosaa aca cua.

15

*Ehuohui'yo ñajjajja epoquiquehua ba'yojjijo
(Mateo 18.10-14)*

¹ Dejjaja cuana emeshi meseja bejjo jjeshejji cuani poquia cua Jesosa que oja esohui shajja'ajjaa. Oya cuana jamatii quea mimishi nee nee cua. Pea dejjaja cuana quea mimishi nee nee poqui pea'aiya cua Jesosaja esohui shajja'ajjaa. ² Paniseo dejjaja cuana, Moisesija etehue'yo huohuijji cuana jjaniñebaqui aña cua pea cuana nijje jama Jesosajo po aña cua ba'a: —De, Jesosa jjapeequiani dejjaja quea mimishi nee nee cuana nijje, ijjia'ijjia ani ona nijje, de.

³ Ma esohui shajja'ajja majje Jesosaa esohui ejjashabaqui meeji jama aca cua ba'a: ⁴ —Oe dejjaja yaninaje, oya ñajjajja cuana quea huiso nee, 100 huisome. Oe ñajjajja poquiquehuanaje. Dejjaja poquinaje ñajjajja sa'ajja'yohua. Pea ñajjajja 99 huisome ojee ijja'ijjiaqui jea canananaje. Sa'ajja neinei ca'yoquinaje, de. ⁵ Majoya aje ba'yo majje abo ca'yonaje. Abo majje dojo ca'yonaje o nequijji yasijje, quea jaji nee nee po'yonaje. ⁶ Ñajjajja meseya ojaya epeeji jama huohuime acanaje ba'a: “Ba'yonaje eyaya ecuea oe ñajjajja,

de. Jjeya nei enequi'yo, e'e de, jjeya eseya quea bihui epo'yo”.

⁷ —E'e, ñajjajja epoquiquehua oe dejja quea mimishi nee nee jama jayojja cuani. Eyacuiñajji ma ñajjajja mese jayojja cuani. Jamatii Eyacuiñajjiya dejja mimishi cuana sa cani ojaya epeeji epojji. Ohuaya dojo sa cuani ma dejja eyahuasijje. Eyacuiñajji quea bihui cuaje oe dejja mimishiya ojaya mimishi pajea ca'yajo, Eyacuiñajji nijje jjapeequiajo. Ojjaña eyajo ba'eca cuana quea bihui cuaje'yo ma dejja mimishi Eyacuiñajji nijje jjapeequiajo —jamaya Jesosa cua.

Esohui ehuhui'yo eponaa bejjo ba ca'ya cuajo

⁸ Jesosaa pea esohui jama huohuime aca cua ba'a: —Oe eponaja bejjo ome miji pea'ai aninaje. Oe bejjo oquequehuaajeaquinaje meshi yasijje equi yiyedojojjo tiiya. Jamatii sa'ajja neinei ca'yoquinaje eponaa. Cuaquijjiya bejjo jeaja'a'ajja ca'yonequinaje. Majoya aje cuiashaba'ajja ca'yonaje. Majoya aje cuiashaba'yo majje ba ca'yonaje bejjo. ⁹ Majoya aje quea bihui po'yonaje bejjo ba majje ojaya epeeji cuana huohui ca'yonaje jama ba'a: “E'e ee, eseya jjeya quea bihui epo'yo. Eyaya ba'yonaje bejjo ma oquequehuaajeaqui cuanaje” epona cuanaje. ¹⁰ E'e, ma bejjo oe dejja jayojja cuani. Oya quea mimishi nee nee jjapeequi sa cuani Eyacuiñajji nijje; ojaya mimishi pajea'yo sa cuani. Jiquio eua epona bejjo ba majje quea bihui nee nee cuani jayojja Eyacuiñajji quea bihui cuani dejja mimishi onijje jjapeequiajo. Eyacuiñajjiya esohuidojojji cuana eyajo ba'e quea bihui nee

nee cuaje oe dejja Eyacuiñajji nijje jjapeequiajo
—jamaya Jesosa cua.

*Esohui ehuohui'yo oja chiiya oja bacua nijje
jjabei'qui'ya cuajo*

¹¹ Pea esohui Jesosaa jama huohuime aca cua ba'a: —Oe emeshi meseja becamejjijji pea'ai e bacua ejja nequinaje. ¹² E bacua ejja shacuima' nequi epohua oja chii jama huohui'ajjame acanaje ba'a: “Ecue chii, ¡bejjo mo quia'yocue ecuea yajji; miya mano'yo jjimahua oe mo quia'yocue!” Jamajjeya oja chii jama cuanaje ba'a: “E'e ma'aje”. Ma echahua mesejame oja iya poquia quia ca'yonaje echahua mese que. ¹³ Majoya aje quijje pishana echahua meseya ojaya aquiana, meshi pea'ai quia canaje bejjo sosejje. Ma bejjo sosejjeya poquinaje pea meshi yasijje quea huesha nee nee. Jomajo quea mimishi nee nee ba'enaje, de. Ohuaya bejjo quia jeyojeyo ca'yonaje huoo majamajajjiya jjejojo. ¹⁴ Chama'yo tii ojaya bejjo po'yonaje, quea shoe nee nee po'yonaje pea'ai. Ma meshijo bobi chama'yo tii cuanaje ejjeshejji, de. ¹⁵ Ohuaya oe dejjaja echacojji sa'ajja canaje. Oe dejjaa oya huoojea canaje cuichi nequi yasijje cuichi cuiñajji epojji. Majoya ohuaya cuichi cuiñaqui canaje. Chama'yo tii ojaya bobi po'yonaje, de. ¹⁶ Jamajjeya aje cuichija bobi ijji sa cuanaje quea shoe nee nee jjejojo, bobi peaja quia jjima nei nei cuanaje jjejojo.

¹⁷ —Majoya aje jama jjashahuaba neinei'qui'yome cuanaje ba'a: “E'e de, ecue chiija echacojji jomajo yani, bobi quea huiso yani

jomajo, de. ¿Yajjajje shai eya jiquiojo quea shoe nee nee po'yo ani, de? ¹⁸ Eya capoqui'yahua ecue chiija equi yasijje. Eyaya oya jama huohuiñaqui'yome aje ba'a: —Ecue chii, eya quea mimishi cuanaje minijje, Eyacuiñajji nijje pea'ai —eyaya añaquiye'yo ecue chii. ¹⁹ Ecue chii enijje quea quene cuaje eya quea mimishi cuanajejojo. Ohuaya eya oja bacua pojjeama jayojja acaje. Jamajjeya mo eya ojaya echacojji capo'yahua. Eya quea shoe nee nee, aema' pea'ai. Quea yeno nee nee eya cuani ecue mimishijo. E'e de, jjeya nei eya poquije'yo ecue chiija equi yasijje” jamaya jjashahuabaquinaje ma ebacua ejja.

²⁰ —Majoya aje poqui o'oyanaje oja chiija equi yasijje. Majoya oja chiiya oja bacua ejja ejiojjijje quea huesha cueje'yo ba canaje. Jama cuanaje ba'a: “Ecue bacua ejja pojja'a joma cueje'yo”. Oya majoya quea jaji nee nee po'yonaje oja bacua ejiojjijje cueje'yo ba majje. Majoya aje oja bacua que poquinaje; emeya cuiapashi cajjequi'yonaje; shemo tojjo cajjequi'yonaje quea jeajojo.

²¹ —Majoya aje ebacua ejjaa oja chii jama huohuime acanaje ba'a: “Miya ecue chii nei nei, eya quea mimishi nee nee cuanaje minijje, Eyacuiñajji nijje pea'ai, de. Miyaya pojja'a eya niñebaña, jamajjeya pojja'a eya miquea echacojji capo'yahua miquea ebacua pojjeama jayojja”.

²² —Oja chii jama cuanaje ba'a: “Chojja, miya ecuea ebacua ejja nei, echacojji pojjeama”. Oja chiiya echacojji cuana jama huohuime acanaje ba'a: “¡Yecue ecue bacua ejjaja daqui eyacua nei nei, oe emehua o pea'ai, ejiojji shejee pea'aiya oe yecue! ²³ ¡Quecuacue oe ana'ai esei esejaya

ojee e'ijjiajji! Jjeya eseya ojee ijia'ijjiaje ecue bacua ejja cue'yonajejo. ²⁴ Eya jjeya quea bihui ecue bacua ejjajo; oya emano'yo jayojja cuanaje, chama'yo tii, jjeya ca cue'yonaje ecue bacua ejja, eshe de. Oya ca ca ecuaquisho'yo cuanaje, jiquio pojajajo ca eyaya ba'yonaje ecue bacua ejja". Majoya aje bobi acua amajje ojjaña ijia'ijjianaje.

²⁵ —Edoe mese chacochocho aninaje quejo; oja ba jjima echahua mese cue'yonaje. Quijje oya cue'yonaje oja equi yasijje. Shajja'ajja caña'yonaje quea shajjaquijjo cuani ojjaña ijia'ijjiani ojee. ²⁶ Ohuaya oe esho'i huohui'ajja canaje: "¿A'ya acuae po ca ani so'o?" ²⁷ Jama esho'iya acanaje ba'a: "Mique chahua cue'yonaje quea aja nee nee, de. Mique chii quea bihui po'yonaje, de. Jamajjeya ojjaña ijia'ijjia mee cani ojee quea bihui'yohua jjejojo".

²⁸ —Majoya aje oja doe quea quene nee nee cuanaje, pea cuana nijje ijia'ijjia sa po ajja cuanaje. Majoya oja chii cuayaquinaje edoe mese jjequidobias nisho. Dobiqiu ajja cuanaje oja bacua ejja equenequene neinei'yo jjejojo. ²⁹ Majoya edoe mese oja chii nijje miminaje: "Eya chacochocho nei'yonaje ee nei, de. Quea shequiaja huiso nee nee. Eya mimishi'ama nei cuanaje minijje; jamatii eyaya miquea esohui shajja'ajjanaje, de. Miyaya che ecue chivo sho'i cuia jjima anaje ecuea epeeji nijje ojee e'ijjiajji. Miquea quea nahue cuanaje ejo, de. ³⁰ Mique bacua ejja sho'i shajjama' cue'yajo ca jjaya ca oe che ana'ai quecua'yonaje. Oya quea mimishi nee nee cuanaje; pea epona cuana nijje jjacojjojeaqui nequi'yonaje miquea bejjo sosejje, de" jama cuanaje edoe mese.

³¹ —Majoya oja chii jama cuanaje ba'a: “Miya ecue bacua ejja quea bame nee, miya eyaya jaahuana neineiaña. Ojjaña aquiana ecuea, miquea epo'yojji. ³² Mique chahua cue'yajo ecuanaya quea bihui po'yonaje. Oya ca ca emano'yo jayojja cuanaje. Oya cue'yonaje jjeya, eshe de. Oya ecuaquisho'yo jayojja cuanaje; jjeya nei ca ca eyaya oya ba'yonaje” jamaya oja chiia oja bacua ejja etii acanaje. E'e de, mahuiso — jamaya Jesosa cua. Jamaya Eyacuiñajjiya quea jea ameya acaje dejja mimishi cuaa oja mimishi pajea ca'yajo, onijje jjapeequiajo pea'ai.

16

Esohui ehuhui'yo echacomeeji jjadasiaquia cuajo

¹ Jesosaa o shajja'ajjajji cuana jama huohuime aca cua ba'a: —Oe emeshi mese quea bejjo huiso nee aninaje. Ohuaya shajja'ajja canaje ojaya echacomeejiya sii cani ojaya aquiana. ² Jamajjeya huohui'ajja canaje ojaya echacomeeji jama ba'a: “Pea cuaa eya huohui canaje miya siipojji cuani. ¿A'a cuae jja miya siipojji nei so'o? ¡Huohui po'ajja socue! Jamajjeya miya ecuea echacomeeji nei pojjeama. ¡Yecue ma papenijo etehue'yo jaa ebajjani cuana!

³ —Majoya aje echacomeeji jjashahuabaquinaje jama ba'a: “De, chama'yo tii ca ecua echacojji cuaje'yo, ecuea emeshi meseya eya cajaa aca'yonaje, de. Eya jjeya quea aa mano echacochacojji, de. Eya ca iña eme huo sa po ajja quea bicho jjejojo. ⁴ E'e de, jjeya nei ca iña jjashahuabaquinaje pea dejja

cuanaja sosequia'yo jjimajo. Eyaya oe pojji sosejjesheje'yo. Majoya eya ecuea emeshi meseya huoojea cajo pea cuaa ba'e meesahua caje, enijje quea bihui cuaje. E'e de, eyaya tehueje o'oya ojjaña echacojji cuanaja emeshi mese sosequia jjima; oe pojji aje'yo” jamaya echacomeejji jjashahuabaquinaje. ⁵ Jamajjeya ohuaya pea dejja cuana iyaa canaje emimijji, ache huiso onajaya sosequia'yo jjima ebajji. Ohuaya jama huohui'ajjame acanaje ba'a: ¿Ache sose huiso acuae miquea sosequia'yo jjima so'o? ⁶ Oe dejjaa jama saja'ame acanaje ba'a: “Ecuea sosequia'yo jjima mahuiso ba'a: ecuea esei 100 natame, quea huiso nee nee eyaya jjeshenaje, de”. Majoya echacomeejji jama cuanaje ba'a: “E'e de, e'e jojo nei miquea papeni yani ecue tehue. Jjeya ca ca miquea sosequia'yo jjima nequi 50 natame, jamaya eyaya tehueje o'oya pea papenijo oe pojji esosequia'yojji”. ⁷ Majoya ohuaya pea dejja acanaje jama ba'a: “¿Ache huiso acuae miquea sosequia'yo jjima so'o?” Oya jama cuanaje ba'a: “Quea huiso nee nee, 100 natame anoso ai, de”. Echacomeejji jama cuanaje ba'a: “E'e de, jjeya ca ca papenijo tehueje o'oya 80 natame esosequia'yojji” jamaya cuanaje echacomeejji dejja cuana nijje, onijje quea bei epojji.

⁸—E'e de, quijje pishana emeshi meseya ojaya echacomeejji ae po ani shai ba canaje. Ba majje jama cuanaje ba'a: “E'e de, ohuaya eya dasia canaje. Jamatii oya jjashahuaba neineiqui'yonaje. Oya quea epeeji huiso nee nee po sa cuanaje o ba'e meesahuajji epojji”. Mahuisoya jiquio esohui —Jesosa cua—. ⁹ ¡Miquianaya ca ca jjashahuaba

neineiquicue quea bame epojji pea cuana nijje!
Jamajjeya miya Eyacuiñajjiya ba'e meesahua caje.
Majoya miquianaya mano'yajo, ohuaya dobiqúi
mee caje'yo eyahuasijje eba'e tiitii'yojji.

¹⁰ —Miquianaaya jjeya oe pojji aquiana
jaahuana neineiaña, miquianaya quea bame
po majje quijje eyajo miquianaya quea huiso
jaahuana neineije'yo. Miquianaya oe pojji
jjadasiaquiani quijje miquianaya jjadasiaquijji
nei nei cuaje. ¹¹ Miquianaya oe pojji aquiana
jiquiojo jaahuana jjima aña, Eyacuiñajjiya
miquianaya aquiana quia jjima acaje'yo eyajo.
¹² E'e de, miquianaya pea cuanaja aquiana
jaahuana jjima añajo Eyacuiñajjiya miquianajaya
aquiana quia jjima acaje'yo eyajo —jamaya Jesosa
cua.

¹³ —E'e de, ¡miquianaya jja ca oe Eyacuiñajjiyo
jjashahuaba majamajaquicue! ¡Oe nei neijo oe
jjashahuabaquicue, aquianajo pojjeama! Jamaya
oe Eyacuiñajji nijje jjapeequi sa cuanijo, ¡a'a
aquianajo jjashahuabaqui majamajajji! —jamaya
cua Jesosa.

¹⁴ Paniseo dejja cuana ma esohui shajja'ajja
majje mimijajia cua Jesosa nijje bejjo quea
huiso sa cuanijo. ¹⁵ Jamajjeya aje Jesosaa
jama tecueame aca cua ba'a: —Miquianaya
jjashahuaba taiquiani miquianaya oe dejjaya
quea bame ba'yani poso cuani. Dejja cuaa ca ca oe
miquianaya quea bame poso acani. Miquianaaya
dejja cuana dasiaña. Miquianaaya ca ca oe
Eyacuiñajji dasia jjima aña, ojaya miquianaya eba
nei nei, de. Miquianaya jama cuani boti'ama.

E'e, joya miquianaaya quea bame poso año Eyacuiñajjija boti'ama —jamaya Jesosa cua.

Eyacuiñajjija esohui ma ani tiiti'yome cuaje

¹⁶—Yahuajo nei nei Eyacuiñajjija esohui huohuijji cuaa huohui ca cua Moisesija etehue'yojo. Jama cua ba'a: “Quijje Eyacuiñajjija huoojea'yo ojjaña jaahuanajji Emeshi Mese oe nei cueje”. Jjeya nei ca ca Huaniya enajo ona besameejji cuanaje huohui canaje Eyacuiñajjija pea esohui jama ba'a: “Quito ojjañaja Emeshi Mese cueje jjeya nei”. Jamajjeya quea huiso nee nee dejja cuana jjapeequi sa cuani Eyacuiñajji nijje. ¹⁷ Jamatii Eyacuiñajjija esohui e'e jojo nei cuani, quea bame cuani. Quijje ojjaña meshi cuana majameta cuana chama'yo tii cuaje, de. Eyacuiñajjija esohui ca ca ma ani tiiti'yome cuaje —jamaya Jesosa cua.

Esohui ejjahueiquijji

(Mateo 19.1-12; Macoso 10.1-12)

¹⁸ Jesosaa esohui jama huohuime aca cua ba'a: —Oe dejjaja ehuanase huei cuani pea ehuaña'yojji jamaya pea cojjojji cuani. Oe dejja oe epona ehuei huana'yo majje pea cojjojji cuani pea'ai. Epona yahue hueijji cuani pea cojjojji pea'ai cuani. Jamajjeya dejja cuaa ja'a ehuanase hueijji, eponaa pea'ai a'a miquea yahue hueijji! —jamaya Jesosa cua.

Ehuohui'yo oe dejja quea aquiana huiso nee nee Nasanojo pea'ai

¹⁹ Jesosaa pea esohui jama huohuime aca cua ba'a: —Oe dejja quea bejjo huiso nee nee cuanaje. Ojaya daqui quea bame nee; quea nahue nee nee

oja jjeshe huosho caninaje. Bobi quea huiso aninaje ojaya equijo; ijia'ijia majamajanaje. ²⁰ Pea dejja ca aema' cuanaje Nasano bajjani. Oya chiji nei nei po'yonaje; oya quea mano cuanaje. Jamatii Nasano dejja quea bejjo huisoja esecuejjani pejjejo aniñaquinequinaje. ²¹ Jamatii ojaya chiji iñahuehuua sio canaje. Oya jama po'ajja aninaje ba'a: “¡Chemo bobi quiacue joya miquea ijia shaa ani!” jamaya Nasano po'ajja aninaje. ²² Nasano Eyacuiñajjija epeeji cuanaje, jamajjeya mano'yo majje Eyacuiñajji ani yasijje poqui'yonaje. Nasano ani'yonaje Amajama pejjejo, Jodioja etiiquiana pejjejo. Majoya aje ma dejja quea aquiana huiso mano'yonaje pea'ai. Ohuajea canaje cuaa. ²³ Oya Eyacuiñajjija epeeji pojjeama, jamajjeya emano'yo ojjaña eshahuaja epeeji cuana poqui caquijje poquinaje cuaqui yasijje. Jomajo oya quea nee nee po'yoqui. Jomajo ohuaya Nasano, Amajama pea'ai ba canaje eyajo quea huesha nee nee. ²⁴ Oya jama taaame cuanaje ba'a: “Amajama ecuea etiiquiana, ¡che oe ejo jjashahuabaquicue! Eya quea quiyo nee nee po'yoqui jiquiojo, de. ¡Che jjo yana chopeshihuacue! ¡Huoojeacue Nasano ecue yana chopeshiya eya quea naba taja nee nee acue!” jamaya ma dejja quea aquiana huiso cuaquijo nequi cuanaje Amajama nijje. Nasano ca oe poqui jjima cuanaje.

²⁵ —Amajamaa eyajo jama huohuime acanaje ba'a: “De, miyaya pajea'yonaje pojja'a. Miya eshehua quea aquiana huiso ba'enaje meshijo. Jamatii Eyacuiñajji nijje jjapeequi jjima cuanaje. Nasano ca ca aema' quea mano po'yonaje pea'ai. Oya ca ca Eyacuiñajjija epeeji cuanaje. Jamajjeya

Eyacuiñajjiya oya quea jaji nee nequi mee ca'yani. Miya ca mi ca oe quea yeno nequi'yo, quea quiyo nequi'yo. ²⁶ Eyacuiñajjiya miya cue mee jjima acani ecuana nequi yasijje ojaya epeeji pojjeama cuanajejojo. Ecuana mi que poqui mee jjima acani pea'ai” jamaya cuanaje Amajama.

²⁷ —Ma dejjaya cuaqui dojjojo nequi jama taaame po nequinaje ba'a: “¡Che jjo oe ecue huapa pojjeama meshijo ba'e jjashahuabaqui meecue Eyacuiñajjiyo! ¡Huoojeacue Nasano ecue chiija equi yasijje huohuiya! ²⁸ ¡Ecue chahua me oeje huiso tiya jjashahuabaqui meecue Eyacuiñajjiyo acue! Eyacuiñajji niije cajjapeequiahua cuaqui yasijje mi cueje'yo acue”.

²⁹ —Majoya aje Amajama jama huohuime aca o'oyanaje ba'a: “Yani aje jja ca Eyacuiñajjiya esohui etehue'yo, Moisesiya tehue ca cua yahuajo nei nei. Pea cuaa tehue ca cua pea'ai yahuajo nei nei, de. Ma esohui oya cuaa cashajja'ajja cahua. Esohui shajja'ajja majje poqui'yo ajja cuaqui yasijje, mi jayojja epo'yojji pojjeama” jamaya cuanaje Amajama.

³⁰ —Majoya aje ma dejja cuaquiyo nequi jama cua ba'a: “Chojja de, oya cuana jjashajja'ajjaqui ajja. Ma esohui etehue'yojo jjashahuabaqui ajja. ¡Huoojeacue oe emano'yojaa shequi o'oya esohui huohuiya! Majoya quea bame cuaje, de. Onaaya emano'yojaa shequi o'oyajo ba majje jjashahuaba neineiQuije Eyacuiñajjiya esohuijo. Jjapeequije'yo Eyacuiñajji niije, de” cuanaje ma dejja cuaquiyo nequi.

³¹ —Majoya aje Amajama jama cuanaje ba'a: “Chojja de, jjashajja'ajjaqui ajja Moisesiya ete-

hue'yojo, Eyacuiñajjija esohuijo, jamaya ohuaya shajja'ajja jjima acaje emano'yojaa shequi o'oya ca Eyacuiñajjija epeeji epojji. Chojja, eyaya oya emano'yojaa huoojea'yojji pojjeama esohui huohuiya” jamaya cuanaje Amajama eyajo nequi. E'e de, mahuiso —jamaya Jesosa cua.

17

Quea mimishi mi po o'oya chana'
(Mateo 18.6-7, 21-22; Macoso 9.42)

¹ Jesosaa o shajja'ajjajji cuana jama huohuime aca cua ba'a: —Jamatii pea cuaa ecuea epeeji eyacua quea mimishi po mee o'oya sa acani. Jamaya o cuajo Eyacuiñajji quea quene nee nee cuaje onijje. Ohuaya oya jeajea caje'yo cuaqui yasijje, de. ² Jamajjeya ꞑecuea epeeji quea mimishi epo mee cuahuajje oe mano'yocue! E'e, ꞑonaaya mei enaajo yiipeca mee majje bae quea doe yasijje jjajeaquejea meequi'yocue! Jamajjeya ꞑa'a quea mimishi po mee'yojji cuana!

³ —E'e de, coya mi quea mimishi po o'oya chana'. Miquea epeeji quea mimishi po o'oyajo, ca oe jama huohuiquime acue ba'a: “Miya quea mimishi cuanaje. ꞑA'a quea mimishi po o'oyajji!” Majoya oya pojja'a jama cuaje ba'a: “E'e de, eya quea mimishi cuanaje, jjeya ca ca eya quea mimishi epo'yojji pojjeama minijje”. Jamajjeya ꞑmiquianaaya ma mimishijo a'a jjashahuaba majamajajji! ꞑJapeequi o'oyacue onijje! ⁴ E'e pojja'a ca ca oya mimijaji majamajaje minijje, majoya oya quea yeno nee nee cuaje ojaya mimishijo. Jamajjeya ꞑjamatii miquianaya oja mimishijo a'a

jjashahuaba majamajaquijji! ¡Jabeiqui o'oyacue onijje! —jamaya Jesosa cua.

Jesosaa o shajja'ajjajji cuana jjabahuejjaqui mee ca cua

⁵ O shajja'ajjajji cuaa Jesosa jama huohuime aca cua ba'a: —¡Ecuanaaya jjabahuejjaqui mee neine-icue mijo e'e jojo nei ejjashahuabaquijji, mi jayojja eba'ejji!

⁶ Jesosa jama cua ba'a: —De, miquianajaya eya eba, eya miquea epeeji nei cuani. Eyaya miquianaya jjabahuejjaqui meenaje yahuajo. Miquianaya pojja'a ca mi ca oe jjashajja'ajjaqui pishananaje. Miquianaya ejo e'e jojo nei jjashahuabaqui pishana majje Eyacuiñajjiya miquianaya amee caje'yo ojjaña eyaya aña jayojja jama, ma dejjaa ajjima acani amee caje'yo pea'ai. E'e, miquianaaya acui jama yajjemo ba'a: ¡Acui, nequisohuacue; ena huasijje poquicue! Majoya acui nequisohua majje ena huasijje poqui'yome. Jamajjeya ¡miquianaya ejo e'e jojo nei jjashahuabaquicue! —jamaya Jesosa cua.

Oe echacojji emeshi meshija esohuijo cajiashajja'ajjaquiahua

⁷⁻⁸ Jesosaa pea esohui jama huohuime aca cua ba'a: —Oe echacojji chacojeyo majje cue'yonaje oja emeshi meseja equi yasijje. Jamatii hueahueanaje, oya ijjiia'ijjiia sa cuanaje, jomishoca'yo sa cuanaje. Oya jomishoca'yo jjima cuanaje; ijjiia'ijjiia jjima pea'ai cuanaje. Ma emeshi meseya oya jama huohuime acanaje ba'a: “¡Besaquicue, pea daqui huoshocue, ecuea bobi cuacuacue! ¡Majoya ecuea bobi yecue!

¡Eya ijiajeyoajo majoya miquea ya'yojjiya cuacua'yocue!”⁹ ¿A'a ma emeshi meseya oja echacojji huohui caje oya quea bame cuanaje? Chojja, ma echacojjiya jamatii shajja'ajja cani emeshi meseja esohui.¹⁰ Jamaya miquianaya Eyacuiñajjija esohui shajja'ajja majje ¡a'a miquianaya quea bame cuani poso jjabaquijji! ¡A'a jamaya jjashahuabaquijji nequiana! ¡Jamatii miquianaya jjashajja'ajjaquicue oja esohuijo, ma echacojjiya jamatii shajja'ajja canequinaje, emeshi meseja esohui jayojja jama acanaje! — jamaya Jesosa cua.

Jesosaa jjajeaqui mee ca'ya cua ome miji pea'ai deja batata epo'yo

¹¹ Majoya Jesosaa Jenosanena huasijje poquijeya Janinea meshi yeje ca cua. Samania meshi sahuajje jjayejequia cua.¹² Majoya aje oe cuiñajji yasijje Jesosa dobiqúi jjimahuaajo, deja batata epo'yo ome miji pea'ai mimi sa cua Jesosa nijje. Jamatii nequinaje quea cuiñajji huesha pishana onaja jeajea batata epo'yojojo. Jamajjeya oya cuana nequia cua quea huesha.¹³ Onaaya Jesosa jama taaame aca cua ba'a: —Jesosa, miya ecuanaja Emeshi Mese, ¡ecuanaya che batata epo'yo jjajeaqui mee'yocue!

¹⁴ Jesosaa oya cuana bajea majje jama huohuime aca cua ba'a: —Eyaya miquiana jjajeaqui meeje'yo, ¡poquicue Eyacuiñajjija equi yasijje! Jama huohuime acue esohui huohuijji ba'a: “De, bacue, yahuajo pishana ecuanaya batata epo'yo cua, jjeya ca ecuanaya quea yami bame nee nee'yo”.

Majoya aje Jesusaa oya cuana jjajeaqui mee ca'ya cua. Majoya aje oya cuana poquije jjayamibamequi'ya cua, quea bihui nee nee cua. ¹⁵ Oe dejja ca ca jjashahuabaquia cua Jesosa bihuiajji ojaya eyami ejjajeaqui mee'yojojo. Majoya aje quea bihui po'yo majje jjanojjaquia cua; Jesosa que cue o'oya cua. Jjanobajjima nei Eyacuiñajji bihuia ca cua. ¹⁶ Ecuio'shajjajo nequia cua Jesosa cojja nei; oya jama cua ba'a: —E'de, Jesosa, miyaya eya jjajeaqui mee'yonaje, eya quea yami bame po mee'yonaje. Miya quea sohui poja nee nee —jamaya ma batata epo'yo cua. Oya Samania dejja cua, Samania meshijo ba'e, Jodio dejja pojjeama.

¹⁷ Majoya aje Jesusaa ona nijje nequi jama huohuime aca cua ba'a: —¿A'a cuae ome miji pea'ai jjajeaqui mee'yonaje? ¿Aecue beca cuana so'o? Oe nei ca ca oe cue'yonaje e bihuiaa, Eyacuiñajji bihuiaa pea'ai. ¹⁸ Ma dejja Jodio dejja pojjeama, Samania meshijo ba'e; beshahua nei Eyacuiñajji ojaya ba jjima. Jodio dejja cuana Eyacuiñajjija epeeji nisho. Oya cuana quea yami bame nee po'yo sa cuanaje Eyacuiñajji bihuiajji pojjeama.

¹⁹ Majoya Jesusaa ma dejja jama aca cua ba'a: —¡Nequisohuacue; poquicue! Miyaya eya quea yami bame epo'yojji huohui'ajjanaje. Miya ejo e'e jojo nei jjashahuabaquinaje ecuea ejjajeaqui mee'yojji. Jamajjeya eyaya miya jjajeaqui mee'yonaje. E'e jojo nei miya jjapeequinaje Eyacuiñajji nijje.

*Achajja Jesusa Emeshi Mese nei epojji cueje
(Mateo 24.23-28, 36-41)*

²⁰ Paniseo dejja cuaa Jesosa jama huohui'ajjame aca cua ba'a: —¿Ache shono Eyacuiñajjija huoojea'yo ecuea Emeshi Mese nei epojji cueje? ¿A'a ohuaya ojjaña emeshi mese cuana jeajea caje'yo?

Jesosa jama cua ba'a: —Chojja, ma jayojja pojjeama, de. Ojaya emeshi mese cuana ejeabichajeajji pojjeama. ²¹ Pea cuana pojja'a jama mimime cuaje ba'a: “Eyacuiñajjija huoojea'yo cueyanaje pea meshi yasijje”. Siajje ca cuani, Eyacuiñajjija huoojea'yo yani jjeyahua nei, jaahuana cani ojaya epeeji cuana ojjaña Eyacuiñajji nijje jjapeequiajo. Oya Emeshi Mese cuani, de.

²²⁻²⁵ Majoya Jesosa o shajja'ajjajji cuana nijje jama mimime cua ba'a: —Ecuea epeeji nei, jjeya Jodio dejja cuaa eya quecua sa acani. Majoya aje eyahuasijje eya poquije'yo. Jiquio tii eya miquiana nijje nequi ajja. Miquianaaya ca ca eya nequi mee sa aje'yo minijje. Cho, nequi ajja. Beca cuaa miquianaya jama acaje ba'a: “Cue'yonaje aje Jesosa jiquiacua”. Pea ca jama cuaje ba'a: “Jesosa yani jomajo”. ¡A'a eya sa'ajjajji onaa siajje acajje! Eya jocuama poqui jjima. E cue o'oyajo pojjeje jayojja cuaje, jeaja'ajeaje ojjaña meshi cuana. Majoya aje ojjaña meshijo ba'e cuaa eya ba neinei caje'yo. Eya meshi yasijje cueje o'oya ojjaña Doe Mese epojji. ²⁶⁻²⁷ Yahuaajo Noe ba'ya cua. Oya dobiqúi jjimahuajo bishe ai yasijje, pea dejja quea mimishi nee nee cua, jjashajja'ajjaqui sa po ajja Eyacuiñajjija esohuijo. Jamatii oya cuana ijja'ijja ania cua; ishi'ishi nequia cua; jjahuanaqui nequia cua. Majoya aje Noe dobiquia cua bishe ai yasijje. Ma dejja cuana ca ca jamatii jjashahuabaqui sa po ajja Eyacuiñajjijo.

Oya cuana jama jjashahuabaquime pojea'ajja aña cua ba'a: “Eyacuiñajjiya eseya hui'i mee'yo jjima acaje”. Cho, majoya aje Eyacuiñajjiya ena quea quemo huoojea ca'ya cua; hui'i mee ca'ya cua ojjaña dejja cuana, de. Ma jayojjaya e cueyajo, dejja cuana jama cuaje. Quea mimishi tii tii po nequije.

²⁸ —E'e de, jamaya yahuajo Noti ba'ya cua tii. Dejja cuana quea mimishi nee nee cua. Jamatii ijia'ijia ania cua, ishi'ishi nequia cua, jjeshejjeshe nequia cuanaya cua, quiaquia nequia cuanaya cua, banabana nequia cuanaya cua, equi iya cuanaya po nequia cua. E'e de, Eyacuiñajjiyo jjashahuabaqui sa po ajja nei nei cua. ²⁹ Ma pojajo Noti Sonoma cuiñajjiyo ba'e cuayaquiajo Eyacuiñajjiya ena cuani jayojja cuaqui oque mee ca cua Sonomajo. Ojjaña quiyo jeyojeyo'ya cua; chama'yo tii cuanaje.

³⁰ —Jamaya ojjaña cuana Eyacuiñajjiyo jjashahuabaqui jjima anijo, eya cueje o'oya.

³¹ Jamajjeya miqianaya pojja'a quejo chacochoqui e cue o'oyanijo, ¡a'a miqianajaya equi yasijje poquiji aquiana jjequi'yohua! ¡A'a jjashahuabaquiji miqianajaya aquiana cuanajo! ³² ¡A'a pajea'yojji Notija ehuanase oja aquianajo jjashahuabaquia cua! Jamajjeya oya sane pojji po mee ca'ya cua Eyacuiñajjiya ojaya aquianajo jjashahuabaquiqui jojoya. Chama'yo tii oya po'ya cua. ³³ Jamaya miqianajaya aquianajo jjashahuabaqui majamaja anijo miqianaya Eyacuiñajjiyo jjashahuabaqui jjima cuaje, de. Jamajjeya miqianaya chama'yo tii cuaje'yo. E'e de, miqianaya ca ca jjashahuabaqui

majamaja ani Eyacuiñajjijo ojaya epeeji cuaje; ba'e tiitiije'yo onijje.

³⁴ —E cue o'oyajo becanejjijji pea'ai cahuijaa, oe dojosohuaqui caje'yo, pea ca jeajea canaje'yo.

³⁵ Beca epona quecuapasha cuequi oe dojosohuaqui caje'yo, pea jeajea canaje'yo. ³⁶ Beca dejja quejo chacocho nequi oe dojosohuaqui caje'yo, pea ca jeajea canaje'yo Eyacuiñajjija esohuidojojjiya —jamaya Jesosa cua.

³⁷ Jesosa o shajja'ajjajjiya jama huohui'ajjame aca cua ba'a: —¿Achacua acuae maya cuaje so'o, Jesosa?

Jesosa jama cua ba'a: —Miquianaya eya baje joya ecua be'o e'ihui yasijje oqueani jama —jamaya Jesosa cua.

18

Jesosaja esohui ehuohui'yo oe epona e'ahuemanojo

¹ Jesosaa o shajja'ajjajji cuana huohui ca cua emimi majamajajji Eyacuiñajji nijje. Ohuaya jama huohuime aca cua ba'a: ² —Oe cuiñajjijo oe sohuinano aninaje. Oya jjapeequi sa po ajja pea dejja nijje, Eyacuiñajji nijje pea'ai. ³ Oya cuiñajjijo tiya oe e'ahuemano aninaje. Ma e'ahuemanoja aqui ana peaa sii ca'yonaje. Jamajjeya oya poqui majamajanaje sohuinano huasijje. Jamajjeya ohuaya jama huohui'ajjame acanaje ba'a: “¡Che iña yohua sahuacue ma aqui ana onaa sii ca'yonajejo!” Poqui majamajanaje sohuinano huasijje huohui'ajjaa. ⁴ Jamatii sohuinanohua

saja'a jjima acanaje, de. E'ahuemano pajeapajea'yo ajja nei nei cuanaje huohui epo tiitiinequijji jjejojo. Sohuinano jama jjashahuabaquime cuanaje ba'a: "E'e de, ma e'ahuemano pajeapajea'yo ajja nei nei, cue majamajani ca coma. Ojaya esohui shajja'ajja sa po ajja nei nei ca iña. ⁵ Eyaya aje ca oya yohua sahuajeya ma ca oe oya cue'yo jjima tii epojji". ⁶ Jamajojoya aje oe yohua sahua canaje —jamaya Jesosa cua.

—Sohuinano yohua sahua sa po ajja cuanaje. Jamatii ohua huohui'ajja majamaja cajje, ohuaya epona yohua sahua canaje. ⁷ E'e de, Eyacuiñajjiya sohuinano jayojja pojjeama. Jamatii oya shajja'ajja sa cuani miquijanajaya emimi. Majoya ohuaya miquijanaya yohua sahua bamebame caje. Miquijanaya ojjaña pojajajo mimi tiitianajo, ohuaya miya shajja'ajja caje'yo. ⁸ Ohuaya miya yohua sahua caje'yo. E'e jojo nei ecuea esohui. Jamatii e cue o'oyajo, ¿ae cuaje dejja cuana? ¿A'a oya cuana mimi majamaja nequije Eyacuiñajji nijje? E'e pojja'a. ¿A'a jjapeequi tiitiinequije Eyacuiñajji nijje? E'e pojja'a, ba'ajja —jamaya Jesosa cua.

Ehuohui'yo beca dejjajo oe quea bame pea bame'ama cuani

⁹ Jeesosaa pea dejja cuana huohui ca cua ejjabahuejjaqui meejjijo. Ma dejja cuana jjashahuaba taiquia cua jama ba'a: —Ecuana ca quea bame nee cuani, beca cuana ca ca bame'ama ba'yani.

Jamajjeya ma dejja cuana Jeesosaa jama huohuime aca cua ba'a: ¹⁰ —Yaninaje beca dejja.

Oe dejja Moisesija etehue'yo huohuijji nisho cua, oya Paniseo dejja cuanaje. Pea dejja emeshi meseja bejjo chichajji cuanaje. Oya cuana poquinaje Eyacuiñajjija equi yasijje bihuiiaa, mimiya Eyacuiñajji nijje. ¹¹ Paniseo dejja dobiqúi majje nequiñaquinaje ojjañaja ebajji. Oya jjabajea-sohuaqui majje Eyacuiñajji nijje mimi nishonaje ojjañaja eshajja'ajajji jama ba'a: “E'e de, yani eya jiquiojo, eya quea bame nee nee cuani. Eya mimishi'ama nei, siipojji pojjeama, eya pea cjojji pojjeama, beca cuana ca quea mimishi nee cuani. ¹² E'e de, eya miquea esohui shajja'ajja majje quea bame cuani; miquea esohui jayojja ba'yani. Ecuea 10 bejjo yanijo, eyaya mi yasijje oe quiaña. Jamatii eyaya aña; quea bejjo huiso nee nee eyaya quiaña mi yasijje, Eyacuiñajji. Eya ma dejja bejjo chichajji jomajo nequi jayojja pojjeama, eya ca mimishi'ama nei, oya ca ca quea mimishi nee nee, de. E'e de, mahuiso Eyacuiñajji ecuea esohui” jama mimi nisho nequinaje onaja ebajji Paniseo dejja.

¹³ —Majoya ca ma dejja bejjo chichajji cuani jashahuabaqui majje miminaje Eyacuiñajji nijje. Oya quea yeno cuanaje ojaya mimishijo. Ohuaya Eyacuiñajji mimishi cuana cuijea mee'yo sa acanaje. Jamajjeya jama mimime cuanaje ba'a: “E'e de Eyacuiñajji, eya yani, eya quea mimishi nee nee cuanaje. Jjeya eya quea mimishi po maja sa po'yo ajja. ¡Jjapeequi sa cuani minijje, jamajjeya cuijea'yocue ecuea mimishi cuana! E'e de, mahuiso ecuea esohui, Eyacuiñajji, acua” jamaya cuanaje ma dejja.

—Eyacuiñajji nijje mimijeyo majje Paniseo

dejja, bejjo chichajji cuani pea'ai poquinaje.
 14 Paniseo dejjaja mimishi cuana cuijea'yo jjima cuanaje quea bame nisho ba'ejajojo. Eyacuiñajjiya bejjo chichajji cuanija mimishi cuijea ca'yonaje, o quea mimishi po maja sa po ajjajojo. E'e de, miquianaya Paniseo dejja jayojja po chana'. ¡Miquianaya ca oe pea dejja jayojjaya pocue! Majoya aje mi jjapee tiitiquije'yo Eyacuiñajji nijje —jamaya Jesosa cua.

Eshui Jesosaa esho'iquiana ohua quea jea nee nee aca cuajo

(Mateo 19.13-15; Macoso 10.13-16)

15 Dejja cuaa esho'i cuana dojo ca cua Jesosa que. Jama huohuime aca cua ba'a: — Jesosa, ¡miyaya ecuanajaya ebacua cuana napacue emeya! ¡Miyaya Eyacuiñajji huohuicue ecuanaja bacua jaahuanajji! —jamaya cua ejeajji cuana, enaese cuana pea'ai.

Jesosa shajja'ajjajji cuana quea quene cuanaje ma dejja cuana nijje. Jama cua ba'a: —¡A'a ye majamajajji miquianaja bacua Jesosa que! — jamaya cua o shajja'ajjajji cuana.

16 Jesosaa ca ejeajji cuana enaese cuana pea'ai jama huohuime aca cua ba'a: —¡Yacua oe miquianajaya bacua cuana yecue! Eyacuiñajjiya quea jea nee nee ebacua cuana, ecuea pea'ai. Oya cuana quea bame cuani, ojaya epeeji nei cuani. Jamajjeya ¡ebacua cuana a'a poqui meeji! ¡Ebacua cuana e que cacue'yahua, de! 17 ¡Miquianaya Eyacuiñajjiyo jjashahuaba cuajiquicue jiquio ecua esho'iquiana cuani jama! Jamajje e que

poquije'yo eya eyajo ojjaña huoojea'yojji cuaje
—jamaya Jesosa cua.

*Oe dejja quea aquiana huiso Jesosa nijje mimia
cua*

(Mateo 19.16-30; Macoso 10.17-31)

¹⁸ Pea pojajajo oe dejja quea aquiana huiso po-
quia cua Jesosa huohui'ajjaa. Oya jama cua ba'a:
—Jesosa, miya quea bame cuani, ¿achajja acuae po
cajji Eyacuiñajji nijje eba'e tiitii'yojji so'o?

¹⁹ Jesosa jama cua ba'a: —¿Yajjajo acuae moya
quea bame aña so'o? Oe neiya ca jja ca oe Ey-
acuiñajji quea bame nee cuani. ²⁰ Miquea eba
ojaya esohui. Jamajjeya miya ba'e tii tii sa cuani
onijje, jama shajja'ajjame ojaya esohui acue ba'a:
¡A'a pea cojjojji pojji!
¡A'a dejja quecuajji!
¡A'a sii pojji; a'a siajje pojji!
¡Miquea chii, miquea enaese pea'ai shajja'ajjacue!
—jamaya Jesosa cua.

²¹ Ma dejja quea aquiana huiso jama cua ba'a:
—E'e de, jamaya eyaya anaje esho'yahuaa, jama
tii tii sohuaqui ca ca iña. Eya oe dejja quea bame
nee, de.

²² Jesusaa ojaya esohui shajja'ajja majje jama
huohuime aca cua ba'a: —A'yo sahua oe pea
yohua'ajja jjima so'o. ¡Ojjaña miquea aquiana
cuana quia jeyojeyo'yocue! ¡Aquiana quiajeyo'yo
majje miquea aquiana sosejje jjeshenaje bejjo
quiacue joya aema' cuana huasijje! Majoya miya
Eyacuiñajji nijje jjashahuaba neineiquire, ohuaya
miya ba'e tiitii mee caje'yo eyajo. Miyaya be-
jjo aema' cuana huasijje quiajeyo'yo majje ma-
joya miquea aquiana cuanajo jjashahuabaqui'yo

ajja cuaje, Eyacuiñajjijo ca ca jjashahuabaquije. Majoya eyahuasijje poqui'yo majje aquiana quea bame nee nee cuaje miquea epojji. E'e, jamaya acue majoya cue o'oyacue enijje jjapeequiya! — jamaya Jesosa cua.

²³ Ma esohui shajja'ajja majje dejja quea aquiana huiso quea yeno po'ya cua. Oya quia sa po'yo ajja cua quea bejjo huiso jjejojo, quea aquiana huiso nee nee jjejojo. Poqui'ya cua; aquiana quia'yo jjima aca cua. Jjapeequi jjima Eyacuiñajji nijje, de. ²⁴ Jesosa quea yeno cua ma dejja quea aquiana huiso poquije ba majje; jama cua ba'a: —Oe dejja quea bejjo huiso anijo, quea camaja ejjapeequijji Eyacuiñajji nijje. Jamatii jjashahuabaquiani ojaya aquianajo; Eyacuiñajjijo ca ca jjashahuabaqui ajja. ²⁵ Oya cameno, mona ai'ai jama, jjayejjequi jjima cuaje ahuoja quii huejjajje jayojja. Jamaya dejja quea aquiana huiso beshahua nei poqui jjima eyahuasijje cuaje —jamaya Jesosa cua.

²⁶ Pea cuaa ojaya esohui shajja'ajja majje Jesosa jama huohui'ajjame aca cua ba'a: —Ojjaña cuana quea bejjo huiso sa cuani, de. ¿Ae shai che poquije'yo eyahuasijje Eyacuiñajji nijje ba'e'yohua?

²⁷ —E'e de, oe dejjaa oya eyahuasijje epoqui meeji pojjeama. Eyacuiñajjiya ca mi ca oe poqui mee caje'yo eyahuasijje onijje eba'e tiitii'yojji — jamaya Jesosa cua.

²⁸ Majoya aje Peno jama cua ba'a: —De, ecuana poqui sa cuani eyahuasijje, jeajeana'yonaje ecuea aquiana jiquio meshijo minijje epoqui'yojji.

²⁹⁻³⁰ Jesosa jama cua ba'a: —E'e, ecuea eba. Miqianaaya ojjaña aquiana cuana

jeajeana'yonaje epoquijji enijje. Jamajjeya miqúanaya mano'yajo, Eyacuiñajjiya miqúanaya poqui mee caje'yo eyahuasijje onijje eba'e tiiti'yojji. E'e de, miqúanaya equi jeajeana'yonaje, jamajjeya Eyacuiñajjiya miqúanaya sosequia caje quea huiso nee nee. Quijje miqúanaya mano'yajo Eyacuiñajjiya quea huiso nee nee eyajo quia caje'yo. Miqúanaya jeanananaje miqúanajaya huanase, eba'cua, miqúanajaya o'i, miqúanajaya chii pea'ai. Eyacuiñajjiya miqúanaya huapa pojjeama jayojja quiame acaje mi jaahuanajji. Eyajo pea'ai miqúanaya jama quiameya acaje quea huiso nee nee. Jamaya acaje ohuaya joya ojaya aquiana jeana'yojji cuani enijje chacochohua —jamaya Jesosa cua.

Jesosaa huohui ca o'oya cua o mano'yojji
(Mateo 20.17-19; Macoso 10.32-34)

³¹ Jesosaa oja 12 shajja'ajjajji nei cuana jjachichaqui mee ca'ya cua. Ohuaya jama huohuime aca cua ba'a: —E'e de, jjeya eseya poquije Jenosanena huasijje. Miqúanajaya eba Eyacuiñajjiya esohui yahuaajo nei nei pea cuaa ejo tehue ca cua. Joya ecua onaja tehue jaa jamaya eya acaje'yo cuaa. Eya mano mee caje'yo ojjañaja Edoe Mese cuanijojo. Jamajjeya eya Jenosanena huasijje poqui majje manojje'yo. ³² Eya pea cuaa iña majje dojo caje Jodio pojjeama huasijje. Oya cuanaja ba jjima Eyacuiñajji, de. Oya cuana mimijajije enijje; ejo soaje; cojja cuichojea caje cuaa mo. ³³ Cuia caje mo emeya cuaa, de. Majoya aje mo mano mee caje'yo pea'ai cuaa. Eya mano

neineije'yo. Majoya pea beca peejjima cahuime po majje, eya ca iña shequije o'oya, de —jamaya Jesusa cua.

³⁴ O shajja'ajjajji cuana ca ca jjashahuabaqui jjima cua Jesusaja esohuijo. Oya cuana ba jjima, yajjajo ohua o mano'yojji huohui cani poso jjabaquia cua.

*Jesosaa cojjama' quea cojjaja'a po mee ca'ya cua
(Mateo 20.29-34; Macoso 10.46-52)*

³⁵ Jesusa Jenico cuiñajji chipi nei poquia cua. Oe dejja cojjama' chemo po aña cua ejiojji cojja sahuajo. ³⁶ Cojjamaa shajja'ajja ca cua dejja quea huiso cueje, jamajjeya huohui'ajja ca cua: —¿A'ya mi so'o?

³⁷ Pea cuana jama cua ba'a: —Jesusa iquio cueje, de.

³⁸ Majoya aje jama taaame cua ba'a: —Jesusa, miya Eyacuiñajjija huoojea'yo cuani. Miya ma etiiquiiana emeshi mese, Dabi jayojja cuani. Eya ca iña oe che cojjama', de. ¡Che iña jjacojjaja'aqui mee'yocue!

³⁹ Ehui dojojji pea cuana poquije jama cua ba'a: —De, ¡quea shajjaquijjo pajjaja coma a'a taaajji!

Oya ca ca taaa o'oya cua; jama cua ba'a: —Jesusa, ¡che iña yohua sahuacue, miya Eyacuiñajjija huoojea'yo!

⁴⁰ Jesusa poquije tii nequiñaquia cua. Majoya aje oya jama cua ba'a: —¡Cojjama' e que jjequicue!

Yechipi cajo Jesusaa cojjama' jama huohui'ajjame aca cua ba'a: ⁴¹ —¿Apiojji eya miyaya taaaña, cojjama'?

—Jesosa, miya ecuea Emeshi Mese nei, mi que e jjacojjaja'aqui mee'yojji mi taaanaje —jamaya cua cojjama'.

⁴² —E'e de, ijyeya miya quea cojja ja'a po'yocue! Eyaya miya jjabapojjaqui mee'yonaje ejo e'e jojo nei jjashahuaba bamebamequinajejojo —jamaya Jesosa cua.

⁴³ Majoya aje quea cojja ja'a nee nee po'ya cua. Oya Jesosa nijje poquia cua. Oya jama cua ba'a: —E'e de, Eyacuiñajji quea bame nee nee, de. Jesosaa ecuea ecojja quea ja'a po mee ca'yonaje, de.

Pea cuaa ma ba majjeya Eyacuiñajji bihuia ca cua.

19

Jesosaa Saqueo ba ca cua

¹ Jesosaa Jenico yejje canana cua; quea dejja huiso jjachichaquia cua Jesosa bajji. ² Oe dejja Saqueo bajjani cua. Ojjañaja eba Saqueo quea bejjo huiso nee nee cua. Oya bejjo chichajji cua emeshi meseja yajji. Oya ca jjadasiaquijji cua.

³ Ohuaya ca ca Jesosa ba sa aca cua. Jamajjeya Saqueo poquia cua Jesosa baa pea cuana ejjachichaqui nequi yasijje. Quea chi'aa jjejojya ca ca oe ojaya beshahua nei Jesosa ba jjima cua.

⁴ Jamajjeya Saqueo cuajicuaji poquia cua, ejiojji cojja sahuajo nequi acui yasijje sohuaquiñaquia cua. ⁵ Jesosa jjayejje'ajjaquia cua acui aa biajje Saqueo anijje. Majoya aje ohuaya bajeasohua majje jama aca cua ba'a: —Saqueo, ¡oque'yocue! Jjeyahua nei iña poquije miquea equi yasijje aniya!

⁶ Majoya aje oya nequioque'ya cua. Majoya aje nequioque'yo majje poquia cua ojaya equi yasijje Jesosa nijje. Oya quea bihui cua. ⁷ Pea cuaa ca ca niñeba ca cua Jesosa poquije ba majje; jama mimijajime cua ba'a: —De, Jesosa Saqueo nijje poquinaje anicuaa, Saqueo quea mimishi nee nee, de.

⁸ Majoya aje dobiquia cua Jesosa Saqueoja equi yasijje. Quijje pishana ijia'ijjiajeyo majje Saqueo nequisohua'ya cua. Ohuaya Jesosa jama huohuime aca cua ba'a: —E'e de, jjeyahua eyaya aema' cuana huasijje bejjo quiaje esejja. Eya siipoggi nei cuanaje, de. Jjeya ca iña siipo sa po'yo ajja. Jamaya eyaya aje ba'a: Eyaya oe bejjo sinaje, eyaya quiaje'yo ebeca pee pea'ai bejjo. Eya mimishi po sa po'yo ajja. E'e jojo nei ecuea esohui jjeya. Siajje pojjeama cuani —jamaya Saqueo cua.

⁹ Jesosaa oya jama huohuime aca cua ba'a: —E'e de, miya Jodio dejja nei, jamatii miya Eyacuiñajji nijje jjapeequi jjima cuanaje. Jjeya ca ca miya e'e jojo nei jjapeequi sa cuani Eyacuiñajji nijje. ¹⁰ E'e, eya cueyanaje ojjaña jjapeequi meeya Eyacuiñajji nijje. Eyaya mi jayojja pea cuana ba sa aña —jamaya Jesosa cua.

Esohui ehuohui'yo bejjojo
(Mateo 25.14-30)

¹¹ Jesusaja esohui shajja'ajja majje pea cuaa jama aca cua ba'a: —Jesosa, Jenosanena huasijje poqui majje miya ojjañaja Emeshi Mese cuaje, jjeya nei pojja'a. Ecuana jamajjeya mijo quea bihui nee nee cuaje'yo —jamaya poso aca cua dejja cuaa.

¹² Jamajjeya Jesosaa oe esohui ejjashahuaba quimeejjijo jama huohuime aca cua ba'a: —Oe dejja emeshi mese epo'yojji pea meshi yasijje poquinaje. Majoya oya emeshi mese epojji bajjani ca'yajje huacuaya cue'yonaje o nequinaje meshi yasijje. ¹³ Poqui jjimahuaa ohuaya iyaa canaje ojaya ome miji pea'ai echacojji cuana bejjo equiajji. Ojjaña oe ebashosocojo bejjo quea huiso quia canaje. Jama huohuime acanaje ba'a: “E'e de, jiquio bejjo eyaya miquianaya quiaña, aquiana jjeshejji. ¡Esose quea huisojo bejjo jjahuisoqui meecue! Eya cue'yo majje quea huiso bejjo bañaje'yo. Eya majoya quea bihui cuaje” jamaya cua ma emeshi mese poqui jjimahua.

¹⁴ —Majoya aje emeshi mese poquinaje pea meshi yasijje emeshi mese epojji ohua bajjani ca'yajje. Oja meshijo nequi dejja cuanaja boti'ama cua. Jamajjeya dejja cuaa oe dejja huohui pohua ma meshi yasijje huoojea ca cua. Jama huohuime aca cua ba'a: “Ecuanaajaya ma dejja emeshi mese cuajo boti'ama cuaje”.

¹⁵ —Oya ca ca bajjani ca'yajje emeshi mese cuanaje. Jamajjeya ma dejja huacuaya cue o'oya cua oja meshi yasijje. Cue o'oya majje iyaa mee ca cua ojaya echacojji cuana ehuohui'ajjajji, ache huiso bejjo chicha canaje ebajji. ¹⁶ Ebionei oe echacojji poquinaje o que. Jama cua ba'a: “Emeshi mese, miquea bejjo quea huiso nee nee chichanaje. Miyaya eya oe bashosoco bejjo quianaje, jjeya ca ca yani ome miji pea'ai bashosocome bejjo. Eyaya chaco neineinaje, de”. ¹⁷ Emeshi meseya jama acanaje ba'a: “E'e de, miya oe echacojji quea bame nee cuanaje. Jjeyahua nei miya emeshi mese

jayojja aje, ¡ome miji pea'ai cuiñajji jaahuanacue, miyaya quea bame cuanajeya jjejojo!”

¹⁸ —Pea echacojji poquinaje emeshi mese que. Jama huohuime acanaje ba'a: “Emeshi mese, miyaya bejjo oe bashosoco quianaje. Jjeya ca ca eyaya iyehuiso chichanaje me oejje bashosocome bejjo. E'e de, eyaya chaco neineinaje pea'ai”.

¹⁹ Jamajjeya emeshi mese jama cuanaje ba'a: “E'e de, miya quea bame cuanaje. Miya emeshi mese jayojja aje, ¡me oejje cuiñajji jaahuanacue!”

²⁰ —Pea echacojji poquinaje o que. Oya jama cuanaje ba'a: “Emeshi mese, ma'aje miquea oe bashosoco bejjo. Quia jjimajje bejjo cuanaje. Eja sisijo bebo majje jaahuana neineinaje. ²¹ E'e de, miya etecueaje poso ca ca mi quianaje. Ecuea miya eba dejja quenequene cuajijji nei nei. Quea dejja taija jjejojo miquea aqui ana quea huiso yani. Jamajjeya eya quea mete cuanaje miquea bejjo quiajji. Jamajjeya jaahuananaje miquea bejjo nei”. ²² Majoya aje emeshi meseya oya tecuea canaje. Oya jama cuanaje ba'a: “Siajje miya, de. Miquea ejjashahuaba taiquijji jayojja jama eyaya miya aje. Miya shajjama' cuanaje; jjahuisoqui mee jjimaya ecua bejjo anaje. ²³ ¡Bacue, ecue bejjo oya huiso tii miyaya jaahuananaje! ¿Api-ojji miyaya bejjo ejjeshejji jaajji equi yasijje mi iyaquinaje, ejjahuisoquijji? Miyaya chachaco jjima cuanaje, de”.

²⁴ —Emeshi mese oya cuana jomajo nequi jama huohuime acanaje ba'a: “E'e de, ¡jjequiseja-jea'yocue ecue quia bejjo ma echacojji shajjama' cuanajeja! ¡Quia'yocue ma ebionei echacojji cua-

naje yasijje, ma quea huiso bejjo chichajji cuanaje yasijje!” jamaya emeshi meseya acanaje.

²⁵ —Oya cuana jama cuanaje ba'a: “Emeshi mese, miquea ebionei echacojji ca ca quea bejjo huiso cuani. Yani ojaya ome miji pea'ai huisome, de”. ²⁶ Majoya aje emeshi meseya jama acanaje ba'a: “¡Shajja'ajjacue ecuea esohui e'e jojo nei! Oe dejja chacochocho ani quea bame, shajja'ajja cani ecuea esohui, eyaya quiaje quea huiso nee nee. Oe dejja ca ca chacochocho ajja, shajjama' cuani, eyaya quia jjima aje. Iñaje'yo ojjaña ojaya aqui ana o shajjama' jojoya. ²⁷ E'e de, pea dejja cuanaja eya boti'ama. Oya cuana eya emeshi mese epojji sa po ajja ca ca oya. ¡Ma dejja cuana yecue eque! E cojja nei nequia majje ¡quecuajeacue ojjaña eba-jji!” cuanaje ma emeshi mese, de —jamaya aca cua Jesosaa.

Oya huohui ca cua ma esohui ojjaña eba-jji eseya cachacochocho'yahua Jesosaja yajjijo quea bame nee, eseya cajjashajja'ajjaqui'yahua ojaya esohuijo pea'ai. Eseyaya quea huiso onijje cajjapeequi mee'yahua. Majoya Jesosa cue o'oya majje ojaya epeeji quea huiso cuaje. Majoya oya jama cuaje ba'a: “Miquianaya quea bame cuanaje; jajapeequi meenaje quea huiso nee ecuea epeeji epojji. ¡Jamajjeya poquicue enijje eyahuasi-jje! Beca cuana ca ca jeajeaje cuaqui yasijje shaj-jamajojo, de”.

Jesosa nequiñaquia cua Jenosanenajo
(Mateo 21.1-11; Macoso 11.1-11; Huani 12.12-19)

²⁸ Majoya Jesosa mimijeyo majje poquia cua Jenosanena huasijje. ²⁹ Poquijeya ba cañaquia cua beca cuiñajji Mepaje, Betania pea'ai. Ma cuiñajji cuana chipi neiyo eyiyo nequi yohua bajjani ba'a: Onimo. Majoya Jesusaa becamejjijji pea'ai o shajja'ajjajji cuana huoojea ca cua. Jesusaa oya cuana jama huohuime aca cua ba'a: ³⁰—¡Poquicue jocuama ma cuiñajjijo chipi nei! ¡Bañaqui majje bacue mapichi esho'i ai ejeyonequia nequi! ¡Ba majjeya oe pichocue! ¡Picho majje yecue! ¡Joya onaja e'anisohuaquijji ajjima nei nei oe yecue!

³¹ Onaa: “¿Apiojji acuae ecuea mapichi pichojeaña so'o?” acajje, oe jama huohuime acue ba'a: “¡Mapichi jjequicue!” Jesosa cuanaje. Oya pa mapichi sa cuani, de, acue.

³² Majoya aje oya cuana poquia cua; bacañaquia cua mapichi. Majoya aje bañaqui majje pichojea ca cua ma ecua Jesusaa huohui ca cua jama pichojeameya aca cua. ³³ Majoya aje emapichi mese cuaa ba ca cua, mapichi picho cuequi. Majoya aje ba majje emapichi meseya Jesusaja eshajja'ajjajji cuana jama huohui'ajjame aca cua ba'a: —¿Apiojji acuaeya ecua mapichi pichojeaña so'o?

³⁴ Oya cuana jama cua ba'a: —Jesusaa sa canijojo ca ca ecuaaya pichojeaña.

³⁵ Majoya aje dojo ca cua Jesosa que. Daqui iya ca cua mapichija edaasa biajje. Majoya Jesosa anisohuaquia cua mapichija edaasa biajje; poquia cua Jenosanena huasijje. ³⁶ Jesosa poquianijo jjachichaquia cua ojjaña dejja cuana ejiojji sahuajo. Onaaya daqui ao jjequi jeapiihui ca cua ejiojjijo Jesosa ja'ajjequijji. Emeshi mese jama

ja'ajjequimeya acaninaje cuaa ohua ba cahua-jje. ³⁷ Eyiyo Onimojo ani jaooque majje ojjaña Jesusaja epeeji cuana quea bihui nee nee cua. Sohuicuayaña cua jama ba'a: ³⁸ —Eyacuiñajji, miya quea bame nee nee. Miyaya Jesosa huoojeanaje ecuea Emeshi Mese epojji jjeya nei. Ecuana quea bihui nee nee. Ojjaña meshijo ba'e cuana, eyajo ba'e cuana pea'ai quea bei cuani —jama sohuicuayameya cua cuana.

³⁹ Majoya Paniseo dejja cuaa quea dejja huiso pejejeo nequiya sohuicuayaqui shajja'ajja majje quea quene nee nee cua. Jamajjeya oya cuaa Jesosa jama huohui'ajjame aca cua ba'a: —Jesosa, ¡miquea epeeji cuana huohuicue: “¡A'a sohuicuayajji!” acue! —jamaya cua Paniseo dejja cuana.

⁴⁰ Majoya aje Jesusaa jama saja'ame aca cua ba'a: —Chojja de, eyaya ecuea epeeji cuana: “¡A'a sohuicuayajji!” ajo, mei sohuicuayaje, de. Ojjaña jja ca oe jjeya cabihuia cahua Eyacuiñajji —jamaya Jesosa cua.

⁴¹ Quijje pishana Jenosanena bañaqui majje Jesosa pa neineiya cua Jenosanenajo ba'e cuana ojaya esohuijo shajjamajojo. ⁴² Oya jama mimimeya cua ba'a: —Eya quea yeno nee nee jiquio cuiñajjijo ba'eca cuanajo, oya cuana quea mimishi nee nee jojoya. Oya cuana mimishi cuana pajea'yo sa po ajja nei nei, de. Jamajjeya aje jja oe quea nee nee cuaje'yo, ecuea epeeji po sa po ajja cuanajejojo. ⁴³ Sohuinano cuana cueje o quecua'yohua. Sohuinano cuana jjanequitoquije'yo jiquio cuiñajjijo. Majoya oya cuana cuayaqui ajja

nei nei cuaje. ⁴⁴ Majoya aje oya cuana quecua jeyojeyo caje'yo, chama'yo tii acaje'yo. Equi cuana dahuaajea jeyojeyo caje'yo chama'yo epo'yojji. Jamaya cuaje oya cuana ecuea esohuijo shajjama' cuanajejojo, eya Eyacuiñajjija huoojea'yo ojjaña jaahuanajji cajaa acanajejojo —jamaya cua Jesosa Jenosanenajo ba'e cuana nijje.

Eyacuiñajjija equi aquiana quiajji pojjeama coma ca equi Eyacuiñajji nijje emimijji

(Mateo 21.12-17; Macoso 11.15-19; Huani 2.13-22)

⁴⁵ Majoya Jesosa dobiquia cua Eyacuiñajjija equi yasijje. Dobiqumajje Jososaa beca cuana aquiana quia cuequi ba ca cua. Ma ba majjeya quea quene nee nee cua. Majoya aje Jososaa ma aquiana quia cuequi jeacuayajea ca cua. ⁴⁶ Ohuaya jama tecueame aca cua ba'a: —Eyacuiñajjija etehue'yo jama cuani ba'a: “Eyacuiñajjija equi onijje emimijji”. Aquiana quiajji pojjeama, ona siajje ajji pojjeama pea'ai —jama tecuetecuemeya Jososa cua.

⁴⁷ Ojjaña pojjaajo Jososaa esohui huohui ca nequia cua Eyacuiñajjija equijo. Jamatii Eyacuiñajji nijje mimiani etii cuaa, Moisesija etehue'yo huohuijji cuaa, emeshi meseya pea'aiya Jososa sa'ajja ca cua equecua'yojji. ⁴⁸ Jamajjeya esohui huohuijji cuana jama jjashahuabaquimeya cua ba'a: —Quea camaja ca e'iñajji Jososa equecua'yojji, oya quea epeejji huiso nee nee aña. Shajja'ajja neinei cani ojaya esohui cuaa, de.

20

¿Aya acuae Jesosa huoojea ca cua esohui huohuiya?

(Mateo 21.23-27; Macoso 11.27-33)

¹ Oe pojjajo Jesosaa esohui huohui ca cua Eyacuiñajji equijo. Jesosa que cueya cua Eyacuiñajji nijje mimiani etii cuana, Moisesija etehue'yo huohuijji etii cuana Jodio etiiquiiana pea'ai. ² Oya cuaa Jesosa jama huohui'ajjame aca cua ba'a: —¿Aya acuae mi huoojea canaje esohui huohuiya so'o? — jamaya aca cuaa cua.

³ Jesosa jama cua ba'a: —Eyaya pea'ai miquianaya huohui'ajjaje. ⁴ ¿Aya acuae Huani ma ona besameejji cuanaje huoojea canaje so'o? ¿A'a Eyacuiñajjiya pojja'a? ¿A'a dejja cuaa pojja'a? ¡Huohui'ajja socue mo! Majoya eyaya miquianaya huohuije ajea huoojea acuae eya.

⁵ Oya cuana mimipanajajia cua. Majoya aje jama aca cua ba'a: —¿Yajja saja'ame seya aje so'o? Eseyá quea mete ojjaña dejja cuanajo, de. Eseyá saja'ajje jama cuaje ba'a: “Eyacuiñajjiya Huani huoojea canaje”. Majoya pojja'a Jesosaa jama saja'ame acaje ba'a: “¿Yajjajo miquiaaya cajaa Huanija esohui anaje so'o?” ⁶ Eseyá jama ajje ba'a: “Dejja cuaa Huani huoojea canaje”. Ojjaña dejja cuaa se jaja ca'yo chana' meiya, ojjaña dejja jashahuabaquiani Eyacuiñajjiya Huani huoojea canajejojo.

⁷ Jamajjeya jashahuabaqui majje Jodio cuaa Jesosa jama saja'ame aca cua ba'a: —Cua'a de. Ecuanaajaya ba jjima nei. ¿Aya shai Huani huoojea canaje? —anisho ca cua quea meteya jjejojo.

⁸ Majoya Jesosa jama cua ba'a: —E'e de, jamajjeya ecuea miquianaya ehuohuijji pojjeama e huoojeajji epo —jamaya Jesusaa Jodio dejja cuana aca cua.

Pea esohui ehuohui'yo ejjashahuabaquijji jjonojjajja quejo

(Mateo 21.33-44; Macoso 12.1-11)

⁹ Jesusaa dejja cuana jama huohuime aca cua ba'a: —¡Iiquio ejjashahuabaqui'yojji shajja'ajjacue! Oe equé meseya jjonojjajja bana canaje. Ojaya que quea quemo nee nee cuanaje; oopana jono bana canaje. Ma jono yohua bajjani cuanaje ba'a: uva. Ma jono cuana bana majje ohuaya echacojji cuana cuiña mee canaje. Ohuaya ejjajja cuiñajji cuana jama huohuime aca cua ba'a: “Jjonojjajja jahuajeyajo miquianajaya yajji esejja acue. Pea esejja ca ca ecuea cuaje”. Majoya ojaya que cuiña mee majje quea huesha poquinaje quijje nei nei cue'yohua. ¹⁰ Quijje jjonojjajja jahuajo ohuaya ma pea meshijo ba'e ojaya pea echacojji huoojea canaje jjonojjajja cuiñajji cuana huasijje. Ma echacojji jjonojjajja cuiñajji cuana huasijje poqui majje jama huohui'ajjame acañaquinaje ba'a: “Eya equé meseya miquiana que huoojea canaje jjonojjajja esejja jehua'yohua. ¿Ache acuae pa equé meseja iya tepe mee?” Majoya ejjajja cuiñajji cuana quea dejja ta jjejojo quea quene cuanaje equé meseja huoojeajji nijje. Jama cuanaje ba'a: “Cho, quia sa po ajja iña. Chama' ca jjaja ca oja, ecuea ca jjaja ca oe”. Majoya ejjajja cuiñajji cuaa echacojji cuiajea canaje. Cuiajea majje huoojeajea ca'yonaje equé mese yasijje; jamatii poqui'yonaje.

11 Majoya equé meseya pea echacojji huoojea ca o'oyanaje huacuayaya. Huohui'ajja cañaqui o'oyanaje jama ba'a: “¿Ache acuae equé meseja jjonojjajja so'o?” Majoya quia sa po ajjaa jjejojo cuiajea ca o'oyanaje. Poqui o'oyanaje jamatiya, de. ¹² Equé meseya pea echacojji huoojea ca o'oyanaje huacuayaya. E'e de, ma pea poqui majje jama huohui'ajjame acañaqui o'oyanaje ba'a: “¿Ache acuae pajjaja equé meseja jjonojjajja so'o? Eyaya cadojo'yahua o que”. Majoya jjonojjajja cuiñajji cuana quenequene neineinaje onijje. Quecuajea'ajja canaje jjonojjajja cuiñajji cuaa. Poqui'yonaje echacojji jamatii equé mese yasijje.

¹³ —Majoya equé mese jjashahuabaqui'yonaje oja quejo. Oya jama cuanaje ba'a: “¿Yajja acuae eyaya aje'yo so'o? Ecue bacua ejja pojja'a cahuoo-jeahua. E'e, oya poqui majje ma jjonojjajja cuiñajji cuaa oya ba caje. O ba majje pojja'a jjashajja'ajjaquije. Ba'ajja”. Majoya aje oja bacua ejja huoojea canaje jjonojjajja cuiñajji cuana huasijje. Jjonojjajja jjequi'yohua nisho huoojea'ajja canaje.

¹⁴ Majoya aje onaaya ebacua ba canaje. Jama cuanaje ba'a: “Bacue, equé meseja ebacua ejja cueyanaje, de. Cua'a ejjaquecuajeaqui oe equé mesena'yojji” jama jjashahuaba taiquimeya cuanaje cuana. ¹⁵ Jamajjeya jjonojjajja cuiñajji cuaa equé meseja bacua ejja quecua ca'yonaje. Majoya aje quea huesha nee nee jeajea canaje —jamaya Jesosa cua—. ¿Yajja acuae equé meseya acaje'yo jjonojjajja cuiñajji cuana? ¹⁶ Equé mese poquiije jjonojjajja cuiñajji cuana quecuajeaa oja bacua ejja quecua'yo epo jojoya. Majoya aje pea dejja que cuiña meequi caje'yo —jamaya Jesosa cua.

Dejja cuana jama cua ba'a: —De, jjonojjajja cuiñajji cuana quea mimishi nee nee, de. Chama' ca jjaja ca dejja cuajjama mimishi.

¹⁷ Jesusaa cojja ba oneone ca cua ma dejja cuana. Majoya aje oya jama cua ba'a: —E'e de, yani jjaja, de. ¿A'a jjaja miquianajaya ba jjima Eyacuiñajjiya etehue'yo pojja'a? Ba jjima pojja'a jjajajje, jamajjeya aje mi eyaya jama huohuime aje ba'a: Jamatii dejja cuaa oe equi iyajji, equi yamajjana quea ca'a nee nee sa'ajja cani. Beca cuaa jeajea cani acui ca'a quea bame pojjeama posojojo. Pea dejjaja eba nei nei acui yamajjana equi iyajji. Jama cuaje ma acui ca'ajo ba'a: “Jiquio aje jja oe acui quea ca'a nee nee ba'a, de. Jamajjeya aje jja oe eyaya dojoye'yo quea bame nee nee jojoya”. Jamaya Eyacuiñajjiya eya babaca canaje Emeshi Mese nei quea bame nee nee epojji acui quea bame jayojja. ¹⁸ E'e de, miquianaaya ca ca eya cajaa aje, ma acui cajaa onaa acanaje jayojja. Ojjaña joya eya Emeshi Mese epojji cajaa acajo Eyacuiñajjiya jeajea caje'yo cuaqui yasijje —jamaya Jesosa cua.

¹⁹ Jesusaja esohui shajja'ajja majje Eyacuiñajji nijje mimiani etii cuana, Moisesija etehue'yo huohuijji cuana pea'ai quea quene nee nee cua. Oya cuana jjaja'aqui majje jama mimimimime ojee cua ba'a: —¡De! A'a jja ca eseya jama acani, de. Oya mimiani eseya jjonojjajja cuiñajji cuana jayojja, de. Pea cuaa Jesosa cajaa acanaje jayojja eseyaya cajaa aje pea'ai pa —jamaya ma Jodio dejja cuana cua.

Jamajjeya Jodio dejja cuaa Jesosa iña sa aca cua ejeanobiajji nisho. Ojaya epeejji cuana quea

huisojojo, Jesosa mi iña ca cuaa cua. Jama cua ba'a: —De, eseya o iñajo dejja cuana quea quene nee nee cuaje ese nijje —jamaya cua Jodio dejja cuana; Jesosa iña jjima cua.

Esohui ehuohui'yo emeshi mese yasijje bejjo quiajjjo

(Mateo 22.15-22; Macoso 12.13-17)

²⁰ Majoya Eyacuiñajjija esohui huohuijji cuaa pea dejja cuana Jesosa iñajji nisho bejjo quia ca cua. Ma dejja cuana poquia cua Jesosa baa; dejja quea bame nisho cua. Huohui'ajja ca cua Jesosa ojaya yajja saja'ame ya'yojji nisho. Jamajjeya Moisesija etehue'yo jayojja jama mi saja'a cajo dojo ca quiaye sohuinano huasijje jeanobiaa. ²¹ Ma dejja quea bame nisho cuaa Jesosa jama huohui'ajjame aca cua ba'a: —Jesosa, ecuanaja eba miyaya e'e jojo nei huohuiaña Eyacuiñajjija esohui nei. Miyaya baña dejja cuana oya jayojjaya cuani. ²² ¡Jamajjeya mo oe che huohuicue! ¿A'a jamajjeya Eyacuiñajjija epeejji cuaa bejjo quia cajji emeshi meseja yajji? Quia ca ajja pojja'a.

²³ Jesusaja eba cuanaje Jodio cuanaja ejjashahuabaquijji. Jamajjeya ohuaya jama huohui'ajjame aca cua ba'a: —¿Apiojji acuae nequiaa iña dasia sa aña so'o? Miquianaya ca ca ecuea epeejji nisho cuani, de. ²⁴ ¡Jjequicue bejjo esodojjo ebajji, emeshi meseja epana'yojji!

Majoya oya cuaa oe bejjo jjequi ca cua. Jjequi cajo, Jesusaa jama huohui'ajjame aca cua ba'a: —¿Bejjoje ae ecajja'yo ani? ¿Ae bajjani tehueme'ya bejjo? —jamaya Jesosa cua.

—Emeshi mese oja cajja'yo, Sesa bajjani.

²⁵ Majoya aje Jesosa jama cua ba'a: —Jamajjeya ¡Sesaja bejjo quiaquicue ohua sa cajo! ¡Eyacuiñajji a'a pajea'yojji; oya bihuiaque; shajja'ajjacue pea'ai!

²⁶ Ma epeejji nisho cuana quea mete nee nee cua Jesosaja ojaya ejjashahuabaquijji ebajojo. Jamajjeya jama cuana cua ba'a: —Quea jjashahuabaqui ja'a nee oya, Jesosa. Jjadasia meequi ajja, de —jamaya cua ma epeejji nisho cuana. Jamajjeya mimi o'oya sa po ajja Jesosa nijje. Jamajjeya Jesosa iña jjima cuanaja cua.

Mano'yo majje eshequi o'oyajji
(*Mateo 22.23-33; Macoso 12.18-27*)

²⁷ Ma pojajjo tii Sanoseo dejja cuana poquia cua Jesosa huohui'ajjaa. Sanoseo dejja cuana jamatii jjashahuabaquia cua pea cuana mano'yo majje eshequi o'oyajji pojjeama.

Jesosaja ca ca jama sohui huohuime ajjima cua. Jamajjeya Sanoseo dejja cuaa oya edasiajji nisho aca cua. Majoya aje jama huohui'ajjame aca cuaa cua ba'a: ²⁸ —Esohui huohuijji, Moisesiya jama tehueme aca cua yahuajo nei nei ba'a:

“Oe dejja jjahuanaquinaje. Majoya aje mano'ya cua bacuamahua. Ojaya ehuanase quiijjo-jea ca cua. Ahuema' ani'ya cua jjamejoqui jjimahua quiijjojea. Majoya aje ahue-mano'yajo oja chahuaa cahuana ca'yahua, oja doeja bacua jea jayojja nei epojji”.

²⁹ Jamajjeya jama cuaje pojja'a ba'a: Oe dejja quea doe huiso cua, me oeje pea becanejjijji pea'ai nequia cua. Ma dejjaa epona huana ca cua. Majoya mano'ya cua; bacuamahua quiijjojea ca

cua. ³⁰ Ma dejjaja quijjojea ani echahua meseya huana ca o'oyanaje. Bacua jea jjimahua quijjojea ca o'oyanaje. ³¹ Majoya pea echahua meseya huana ca o'oyanaje. Majoya pea echahua meseya huana'ajja ca poquiapoquia cua. ³² Majoya aje oya epona mano'yonaje yahueja quijjojea ani tiya. Jjamejoqui ajja cuanaje, bacuama' nei nei tii pona cuanaje, de. ³³ Jamajjeya miquea esohui jama cuani eyajo shequi o'oya majje ¿ajea ehuanase jiquio cuaje eyajo; ache oja doeja? O huana-coojji epoja pojja'a, pea echahua meseja pojja'a; oja चाहua cuana ahuia'ajja'yo epo —jamaya cua Sanoseo dejja cuana.

³⁴ Jesosaa jama aca cua ba'a: —De, miquianajaya ba jjima. Jiquio meshijo dejja cuana jjahuanakuiani; epona cuana jjahuiakuiani. ³⁵ Jamajjeya jiquio meshijo Eyacuiñajjija epeeji mano'yo majje eyahuasijje poquije'yo. Ejjahuanaku'yojji pojjeama cuaje'yo eyajo; epona cuana pea'ai ejjahuiaku'yojji pojjeama cuaje'yo eyajo. Jjamejoqui ajja pea'ai cuaje'yo eyajo. ³⁶ Mano'yo ajja cuaje jomajo; esohuidojojji jayojja jama cuaje'yo. Eyajo ojjaña Eyacuiñajjija ebacua cuaje'yo, eshequi'yo jjejojo. ³⁷ ¿A'a miquea ba jjima dejja cuana ojjaña mano'yo majje shequije o'oya? Jamajjeya Eyacuiñajjiya yahuajo nei esohui tehue mee ca cua miquiana jjabahuejjaquijji. Moisesiya tehue ca cua yahuajo nei nei ma acui jijiqui ba majje. Eyacuiñajji mimia cua onijje jama ba'a:

“Eyaya miquea etiiquiana cuana jaahuanaña, Amajama, Isaaca, Jacobo pea'ai ecuea epeejjijjojo. Oya cuana enijje enequi tii tii”.

38 Eyacuiñajji emano'yo cuana meshijo e'ohuajeajaa jaahuanajji pojjeama cuani. Eshe nequi cuana, emano'yo shequi'yo cuana pea'ai eyajo ohuaya jaahuana cani ojaya epeejiijojo —jamaya aca cua Jesosaa.

39 Pea Moisesija etehue'yo huohuijji cuaa jama huohuime aca cua ba'a: —E'e de, quea ja'a nee nee miquea esohui, Jেসসা. Quea bame nee nee, de.

40 Majoya huohui'ajja beca'yo jjima tii aca cuaa cua quea meteya jjejojo, jjadasia meequi ajjaajojo.

¿Aya Jেসসা huoojjea ca cua dejja jaahuanajji pojji?

(Mateo 22.41-46; Macoso 12.35-37)

41 Jেসসা oya cuana jama aca cua ba'a: — Miquianaya jama jjashahuaba taiquime cuani ba'a: “Jেসসা Dabija osecua poso nequiaa añã. Jamajjeya oya Eyacuiñajjija Bacua pojjeama poso nequiaa añã” jamaya jjashahuaba taiquimeya nequiana cuani. Dabi emeshi mese yahuajo nei nei ba'ya cua. Eya ojaya eba nei nei, de. Ojaya eya eba dejjaja bacua ejja pojjeama, Eyacuiñajjija Bacua Ejja. 42 Jamajjeya ohuaya esohuicuayajji tehue ca cua Salmojo; jama cua ba'a:

“Eyacuiñajjiya ecuea Emeshi Mese Quito jama huohuime acanaje ba'a: —¡Enijje anioquecuc ebañei mijijje ojjañaja Emeshi Mese epojji!

43 Eyaya mi quecua'yojji epo jeabichajea jeyojeyoje'yo. Majoya aje miyaya oya cuana jeajeaje'yo cuaqui yasijje cajaanajojo —jamaya aca cua Eyacuiñajjiya”.

Jamaya Dabiya ejo tehue ca cua yahuajo nei nei.
⁴⁴ Jamajjeya Dabiya Quito oja Emeshi Mesejojo bajjani ca cua. Jamajjeya Quito Dabija osecua cua, ojaya Emeshi Mese nei. Eya jja iña iquio Quito, de, dejjaja bacua pojjeama; Eyacuiñajjija Bacua Ejja, jamajjeya eya ojjañaja Emeshi Mese nei —jamaya Jesosa cua.

Jesosaa Moisesija etehue'yo huohuijji cuana tecueajea ca cua

(Mateo 23.1-36; Macoso 12.38-40; Noca 11.37-54)

⁴⁵⁻⁴⁶ Ojjañaa Jesusaja esohui shajja'ajja canijo, Jesosaa o shajja'ajjajji cuana jama aca cua ba'a: —Coya mi oe Moisesija etehue'yo huohuijji jayojja po chana'. Oya cuana po'ayequequi daqui aojji ojjañaja quea bame ebajji nishoya. Oya cuana quea bhui cuani shajja'ajja majje ojjañaja esohui jama cuani ba'a: “Ma esohui huohuijji quea bame cuani, oja daqui quea bame, oja esohui quea ja'a nee” jamaya shajja'ajja saya cuani ma esohui huohuijji cuana. ¡E'e jojo nei pojjeama! Jodioja equi ejjachichajji yasijje dobiqúi majje ebionei anioque sa cuani Eyacuiñajjija esohui huohuijji pejjejo. E'ijjia'ijjiajjijo pea'ai anioque sa cuani equi mese pejjejo. Beca cuaa quea bame poso acani. ⁴⁷ E'ahuemanoja aquiana sii cani o chaco sahuajji nisho po majje. Majoya oya cuana mimi nisho ani Eyacuiñajji nijje. Oya quea mimishi nee nee. Eyacuiñajjiya oya cuana jeajea caje'yo cuaqui yasijje, onijje mimi nishojjijojo —jamaya cuana Jesosaa aca cua.

21

*E'ahuemano aemaa bejjo quia ca cua
Eyacuiñajjija equijo
(Macoso 12.41-44)*

¹ Eyacuiñajjija equijo, Jesusaa dejja cuana quea aquiانا huiso nequi ba ca cua. Ma dejja cuaa bejjo iya ca cua ejjeshejji iyajji yasijje. ² Majoya e'ahuemano aema' nei neiya bejjo iya ca cua. Becanejjijji pea'ai bejjo ojaya cua, oe pojji nei nei cua, de. Chama'yo cua ojaya bejjo ohua iya cajje bejjo iyajji yasijje. ³ Majoya Jesusa jama cua ba'a: —E'e, jiquio e'ahuemano quea bame cuanaje. Ohuaya ojjaña tii bejjo iya ca'yonaje. Jamajjeya Eyacuiñajji quea bihui cuanaje onijje. ⁴ Quea aquiانا huiso nee nee cuaa ca ca oja quiabishi iya canaje. Quea bame pojjeama ca ca oya cuana. Ma e'ahueமானohua iya canaje ojaya bejjo bobi jjeshejji nisho, de. Chama'yo ojaya bejjo po'yonaje. Jamajjeya quea aquiانا huiso nee nee cuana quea bame pojjeama cuanaje — jamaya Jesusa cua.

*Pea cuaa Eyacuiñajjija equi cajjajeajea mee
caje'yo
(Mateo 24.1-2; Macoso 13.1-2)*

⁵ Beca cuana mimia cua Eyacuiñajjija equijo jama ba'a: —iDe, bacue mei quea bame, aquiانا quea bame ani Eyacuiñajjija equijo! Aquiانا quea bame sosema' quia Eyacuiñajjija equi quea bame epojji.

Majoya aje Jesusaa jama aca cua ba'a: ⁶ — E'e de, quiije pishana jiquio equi, aquiانا pea'ai chama'yo tii acaje'yo, de. Ma mei bame cuana

pea biajje e'iyá sohua'yojji pojjeama. Pea cuaa ma equi cajjajeajea caje'yo —jamaya cua Jesosa Eyacuiñajjija equijo.

Dejja cuana quea mase nee cuaje quijje
(Mateo 24.3-28; Macoso 13.3-23)

⁷ Majoya o shajja'ajjajji cuaa jama huohui'ajjame aca cua ba'a: —Jesosa ecuea esohui huohuijji, ¿ache shono acuae shai pea cuaa Eyacuiñajjija equi mei cuana cajjajeajea mee caje'yo? ¿Yajja acuae acaje so'o?

⁸ Jesosa jama cua ba'a: —Ma Eyacuiñajjija equi quea bame cajjajeajea'yo jjimahuajo, jamaya cuaje ba'a: Quea huiso nee nee cueje e bajjani nisho po majje. Jama mimi nishome cuaje ba'a: “Eya Jesosa Quito bajjani, de”. Pea jama cuaje ba'a: “Eya jjeyahua nei cue o'oyanaje, eya Quito, Eyacuiñajjija huoojea'yo”. ¡A'a ojaya esohui shajja'ajjajji! Siajje ca cuaje. ⁹ Miquiaaya shajja'ajjaje pea meshijo ba'e cuana jjaquecuaquiequi pea meshijo ba'e cuana nijje. ¡A'a miquianaya quea mete pojji! Jamatii acua pojjeama oe po ajja jjima cuaje so'o —Jesosa cua—. ¹⁰ Dejja cuana jjaquecuaquije'yo ojjaña meshijo ba'e cuana, cuiñajjijo ba'e cuana pea'ai. ¹¹ Quea huiso emano mee-jiya mano mee caje'yo. Ojjaña quea mete nee nee cuaje, de. Bobima' cuaje, manoj'e'yo quea dejja huiso cuana bobimajo. Meshi huehuahuehuaje ojjaña meshi yasijje pea'ai, de. Ojjaña quea mete nee nee cuaje'yo eyatahuatahua huehuahuehuajo meshi huehuahuehuajo pea'ai, de —jamaya Jesosa cua.

12 —Jiquio jama po jjimahuajo beca cuaa miquianaya quea nee po mee caje'yo ecuea epeeji cuanijojo. Oya cuanaja boti'ama nee nee cuaje, de. Miquianaya iña majje dojo caje jeanobiajeaa Jodioja equi ejjachichaquiiji cuana huasijje. Dojo caje miquianaya emeshi mese nequi cojja nei yasijje. Majoya ohuaya jama huohui'ajjame acaje ba'a: “¿A'a miquianaya Jesusaja epeeji nei?” E'e jojo neiyojo, miquianaya jeanobiajea caje. 13 Jama po majjeya ja'a quea mete pojji! Miquianaya ejo huohuije ma emeshi mese yasijje. Jamajjeya quea huiso emeshi mese cuaa shajja'ajja caje ecuea esohui Eyacuiñajji esohui pea'ai —jamaya Jesosa cua—. 14 E'e, ja'a quea mete pojji ache esohui miquianaaya huohuije'yo! 15 Eyaya nei miquianaya quea ja'a nee po meeje. Eyaya esohui huohui sahuaje ehuohuiji ejo. Ma pojjaajo pea cuanaja miya esaja'ajji pojjeama miquianajaya esohui quea ja'ajojo. Miquianajaya esohui e'e jojo nei cuaje, de. 16 Miquianajaya huapa pojjeama cuaa, miquianajaya epeeji cuaa pea'aiya dojo caje ejjajeantobiajeaquiiji equi yasijje miquianaya ecuea epeejiyojo. Ohuaya miquianaya quecua mee caje'yo, de. 17 Ojjaña miquianaya cajaa acaje'yo ecuea epeeji cuanijojo. 18 Onaa cajaa acajje a'a jjashahuaba taiquiiji jama ba'a: “Eyacuiñajjiya ecuana pajea ca'yonaje, de”. Cho, Eyacuiñajjiya miquianaya pajea'yo jjima acaje'yo. Ohuaya ca ca miquianaya jaahuana caje'yo ojaya epeeji cuanijojo. 19 Ojjaña jiquio jayojja cuajo, ja'a miquianaaya eya pajea'yojji! Miquianaya jjapeequipajea'yo ajjajo Eyacuiñajjiya miquianaya ba'e tiiti mee caje'yo eyajo.

20 —Miquianaaya sohuinano cuana Jenosane-najo ejjanequitoqui'yo nequi ba majje miquiana-jaya eba ma cuiñajjijo ani cajnajeajea cuajicuaji caje'yo. 21 Ojjaña Jodea meshijo ba'e cuana capoqui'yahua eyiyo huasijje. Ojjaña Jenosane-najo ba'e cuana cacuayaqui'yahua. Quea huesha ba'e cuana, ja'a cue'yoquijji Jenosanena huasijje! Capoqui'yahua quea huesha nee, ma sohuinano cuaa equēcua ca cuaje jjejojo. 22 E'e de, jamaya quea nee nee cuaje, Eyacuiñajjija esohui yahuajo tehue ca cua jama jayojjaya cuaje. 23 Epona cuana o'ejji, bacua sho'ijji pea'ai quea yeno nee nee cuaje; quea camaja epoquicuajijji cuaje, de. Eyacuiñajjija quea nee nee nee po mee caje Jenosanenajo ba'e cuana. 24 Sohuinanohua beca Jodio dejja cuana yacua caje'yo. Beca cuana ca ca iña majje jeyo caje. Jeyo majje dojo caje pea meshi quea huesha nee yasijje. Quea yeno nee nee cuaje, de. Sohuinano cuaa, Jodio dejja pojjeama cuaa Jenosanenajo equi ani cajnajeajea'yo majje pea equi iya caje'yo eba'e'yojji. Majotiiya oya cuana ba'eye'yo jiquio ecua Eyacuiñajjija ba'e mee caje'yo. Ma shonoya aje oya cuana poquije'yo —jamaya Jesosa cua.

¿Achajja acuae cuaje Jesosa cue o'oyajo?

(Mateo 24.29-35, 42-44; Macoso 13.24-37)

25 Majoya aje Jesosaa jama aca cua cuana ba'a: —E cue o'oya jjimahuaajo ojjaña quea mete cuaje eshequi, ba'i pea'ai quea apo cuajo. Jiji'yo ajja cuaje, de. Majameta cuana jjacajjaqui'yo majje jijijijioqueje. Ba majje dejja cuana quea mete nee nee cuaje; piopio caje'yo, de. Ena cuana

quea shajjaquijjo cuaje enashajo quea quemo nee neejojo. ²⁶ Mete caje'yo majameta huehuahuehuajo. Deija cuana shacamano caje'yo mete'yo majje. Oya cuaa jama huohui'ajjame acaje ba'a: “¿Yajja shai cuani so'o?” ²⁷ Ojjaña cuaa eya ba caje. Eya ojjañaja Edoe Mese cuani cueje'yo bo biajje. Quea ca'a nee nee; quea sohui poja nee nee cuaje, de. E'e, quea bame cuaje ma pojajoya. ²⁸ ¡Miquianaaya jiquio ba majje nequisohuacue! ¡Jjabajeasohuacue! Eya cueje o'oya miquiana dojohua eyahuasijje eba'e'yojji tii tii. Jamajjeya ¡quea bihui pocue! —jamaya Jesosa cua.

²⁹ Jesosaa pea esohui jama huohuime aca cua cuana ba'a: —E'e de, ¡bacue ma acui, iquena bajjani! ¡Ojjaña acui cuana bacue! ³⁰ Eseyaya meshijo acui iña yani ba majje eseya jama cuani ba'a: “E'e jojo nei nayaja po'yonaje”. ³¹ ¡Jiquio ecua acui iña yani ba majje acuijjajjajo jjashahuabaquiani jayojja jama eyatahuatahua huehuahuehuani ba majje bacue eya cueje o'oya!

³² E'e jojo nei ojjaña ma pojja cuanajo ba'e cuana mano jeyojeyo'yo jjimahuajo ojjaña acua cuaje'yo eya ojjañaja Emeshi Mese oe nequije'yo. ³³ Eyatahuatahua, meshi pea'ai chama'yo cuaje'yo. Ecuea esohui ca ca ma ani tiitiime cuaje'yo.

³⁴ —¡Ishoa'ajja anicue iña oe nequiaa! ¡A'a jjashahuaba majamajaquianijji miquianajaya eba'ejjijo! ¡Miquianaya oe che jjashahuabaquicue e ecue o'oyajjijo! ³⁵ Ibia ijjiameejji eshe'a'ani jjacamicuajiqui'yani jayojjaya jama cuecuajimeya eya cuaje. E'e, ojjañaja eya ba

jjima cuecuajije. ³⁶ Jamajjeya oe ¡shajja'ajjacue ecuea esohui! ¡A'a pajea'yojji, quea camaja cuaje, de! Ojjaña cuana quea mete nee nee, quea nee nee pea'ai cuaje, de. Jamajjeya ijja'ishoa'ajja aniqui tiitiicue! ¡Miquianaya ecuea epeeji po tiitiicue! ¡Eyacuiñajji nijje mimiani tiitiicue quea ca'a epojji! Eya cue o'oyajo miquianaya ecojja nei nequiñajije. Eya miquianajaya Edoe Mese cuaje, jamajje miquianaya quea bihui cuaje, mete'ama cuaje —jamaya Jesosa cua.

³⁷ Ojjaña pojajo Jesosaa esohui huohui canequia cua Eyacuiñajjija equijo. Mecajje poqui nequia cua eyiyo Onimo huasijje cahuiya.

³⁸ Mecajjeahua Jesosa cue o'oya nequia cua Eyacuiñajjija equi yasijje. Ojjaña dejja cue nequia cua oja esohui shajja'ajjaa.

22

Jodio dejja etii cuana jjashahuabaquia cua Jesosa quecua'yojji

(Mateo 26.1-5, 14-16; Macoso 14.1-2, 10-11; Huani 11.45-53)

¹ Majoya aje quijje pishana ojjaña Jodio dejja cuana jjachichaquia cua Jenosanena huasijje ej-jashahuabaquijji yahuajo nei esohuidojojjiya cuia jjima oja bacua cuana aca cuajo. Ijjia'ijjia ca cua ojee pahui hua jjimajo, Jodio etiquianaa jayoj-jaya. ² Ma epojja cue jjimahuajo, Eyacuiñajji nijje mimiani etii cuana, Moisesija etehue'yo huohuijji etii cuana pea'ai jjashahuaba taiqui nequia cua jama ba'a: —¿Achajja iñame shai seya Jesosa aje? Esey a jjeya Jesosa iñajo ojjaña ejjachichaqui nequi cuana quea quene cuaje ese nijje —jamaya cua

quea mete jjejojo Jesusaja epeeji cuanajo. Jamatii ca ca iña mee sa aca cua Jesusa equecua'yojji.

³ Jodasa Jesusa shajja'ajjajji nisho cua. Ojaya pea bajjani cua ba'a: Isicaniote. Beca cuanaja Jesusa iña jjimajojo, Edosiquiaa Jodasa jjashahuaba taiqui mee ca cua Jesusa iña meesahuajji. ⁴ Jamajjeya Jodasa poquia cua Eyacuiñajji nijje mimiani etii cuana que, Eyacuiñajjija equi jaahuanajji cuana pea'ai ani yasijje huohui pohua. Jama huohuiñaquime aca cua ba'a: —Ecuea eba Jesusa ma o oe nei poquiani yasijje. Eyaya miquianaya huohuije'yo.

⁵ Majoya oya cuana quea bihui cua Jodasaja esohui shajja'ajja majje. Jamajjeya jama cua ba'a: —E'e de, ecuana miyaya ba meecue ma Jesusa oe nei poquiani yasijje. Majoya aje ecuanaaya miya sosequiaje, de.

⁶ —E'e de, eyaya aje mi iñasahua meeje'yo — Jodasa cua. Majoya ohuaya sa'ajja ca cua e'iña mee'yojji Jesusa dejjama huasijje poqui.

Jesosaa o shajja'ajjajji cuana nijje bobi ijia ca cua

(Mateo 26.17-29; Macoso 14.12-25; Huani 13.21-30; 1 Conitio 11.23-26)

⁷ Majoya ma epojjajo Jodio cuana ijia'ijjianijo Eyacuiñajji nijje mimianiya oe ñajjajja yahue sho'i quea bame nee nee quecua ca'ya cua Eyacuiñajji bihuiajji. Jodio dejja cuaa pahui hua jjima ijia ca ania cua. ⁸ Jamajjeya aje Jesusaa Penó, Huani pea'ai huoojea ca cua oe equi yasijje bobi jjequiya.

⁹ O shajja'ajjajji cuaa jama huohui'ajjame aca cua ba'a: —Jesusa, ¿ache equijo acuae seya pahui hua jjima ijiaje so'o?

¹⁰ Jesosa jama cua ba'a: —¡Jenosanena huasijje oe poquicue! Majoya aje miquiaaya baje oe dejja meshimisijo ena dojo caje. ¡O ba majje o cuaje jja nei nei poquicue o dobiquije'yo huasijjeya!

¹¹ Majoya ma equi mese jama huohui'ajjame acue ba'a: “Écuea esohui huohuijji jama cuanaje ba'a: —¿Ache equecuayijjijo acuae ecuana ijia'ijjiaje e shajja'ajjajji cuana nijje so'o? Ecuana ijia sa cuani pahui hua jjima, Eyacuiñajji bihuiajji”.

¹² Majoya aje mi huohui caje equi meseya equecuayijji quea quemo. ¡Majoya aquiana iyajeacue; bobi cuacuacue! —jamaya Jesosa cua.

¹³ Majoya aje oya cuana poquia cua; ba ca cua Jesosaja esohui jayojjaya. Majoya iya ca cua.

¹⁴ Majoya siñajo Jesosa o shajja'ajjajji cuana cueya cua ma equi yasijje. Dobiqui majje anioquea cua e'ijia'ijjiajji.

¹⁵ Majoya Jesosa jama cua ba'a: —Eya miquiana nijje oe yejje nei ijia'ijjiaje'yo, onaa e quecua ca'yo cuahuajje. ¹⁶ E'e de, eya e'ijia'ijjia beca'yoyji pojjeama miquiana nijje mano'yo majje. Jama-jjeya quijje eyaya cue o'oya majje jiquio pahui ijiaje o'oya ojjaña cuanaja Emeshi Mese neiya jjejojo —jamaya Jesosa cua.

¹⁷ Majoya ohuaya caneco jjeshe ca cua. Emejo iñanequia majje mimia cua Eyacuiñajji nijje. Majoya aje ohuaya o shajja'ajjajji cuana aca cua jama ba'a: —Ma'aje, jiquio jjonojjajja na ishicue; ishi-jeyocue oe! ¹⁸ E'e de, eyaya ishi beca'yo jjima jjonojjajja na aje, Ecue Chiya eya ojjaña huoo-jea'yoyji po mee caje'yo; ojjaña eya shajja'ajja caje'yo —jamaya Jesosa cua.

19 Majoya aje pahui jjeshe ca cua. Pahui jjeshe majje oya mimia cua Eyacuiñajji nijje. Mimi majje pahui miji ca cua. Majoya aje miji majje quia ca cuana cua. Jama huohuime aca cua ba'a: —Jiquio pahui ecuea eyami. Jjeya nei pishana eya manoje'yo, Eyacuiñajji esohui jayojja cuaje miquianaja mimishi cuijea'yojji. ¡Jamajjeya miquianaaya jiquio pahui ijjiacue; jamatii apoquiapoquiacue! Jiquiajja ijji majje imiquianaya jjashahuabaquicue e mano'ya cuajo!

20 Majoya ijji'ijji'ajeyo majje Jjosaa caneco jjeshe ca o'oya cua. Jjeshe majje jama huohuime aca cua ba'a: —Jiquio jjonojjajja na ecuea ena', de. Ecuea ena' cuayaqui'yajo eya manoje'yo. Jamajjeya Eyacuiñajjiya cuijea caje'yo tii ojjañaja mimishi cuana. Eyacuiñajjiya esohui eyacua quia caje'yo ba'a: “Ojaya epeeji cuanaja mimishi cuana cuijea mee caje'yo tii ecuea ena' cuayaquijeya”.

21 Majoya aje Jjosa jama cua ba'a: —Yani oe ese nijje e shajja'ajjajji nisho cuani; ijji'ijjiani ese nijje, de. Maaya eya sohuinano cuana iña mee caje'yo. 22 Eya manoje'yo, Eyacuiñajji esohui jama cuanaje jojoya. E'e de, ma e shajja'ajjajji nisho Eyacuiñajjiya quea nee nee po mee caje'yo. Ohuaya ma e shajja'ajjajji jeajea caje'yo cuaqui yasijje e ohua sohuinano cuana iña mee caje'yojojo —jamaya aca cua Jjosaa.

23 Majoya aje o shajja'ajjajji cuana mimia cua jama ba'a: —De, ¿aya shai jama acaje? —jama mimime o shajja'ajjajji cuana cua.

¿Ache o shajja'ajjajji quea bame nee nee cuaje eyajo?

²⁴ O shajja'ajjajji cuana mimipanajaji nequia cua. Oya cuana jama cua ba'a: —¿Ache o shajja'ajjajji quea bame nee nee cuaje eyajo?

²⁵ Jesosaa jama huohuime aca cua ba'a: —Miquianaya mimiani ecuea epeeji pojjeama jayojja, de. ¡A'a jama jjashahuabaquijji! Jamatii miquianajaya eba emeshi mese cuana quea mase cuani ojaya echacojji cuana nijje. Jamatii ma echacojji cuaa shajja'ajja cani ojaya emeshi meseja esohui jayojja oya quea mase cuanijojo. Ojaya echacojji cuana quea bihui nisho cuani.

²⁶⁻²⁷ ¡Miquianaya ma emeshi mese jayojja jama a'a pojji! ¡Eyajo emeshi mese jayojja quea bame nee nequi sa cuanijo pea cuana jjeya nei ba'e meesahuacue! ¿Ache shai quea bame nee nee so'o? Emeshi mese, ojaya echacojji pojja'a. Emeshi mese, de. Jamaya Eyacuiñajji epeeji pojjeama jjashahuabaquiani. Ecuea epeeji cuana ca e jayojja caba'yahua. Eyaya miquianaya ba'e bame meesahuaña. Eya mase'ama cuani miquiana nijje; miquiana chacosahuajji cuani eya, de. ¡Jamaya pocue e jayojjaya! Majoya quea bame cuaje —jamaya Jesosa cua.

²⁸ Majoya Jesosaa o shajja'ajjajji cuana jama huohuime aca cua ba'a: —Miquianaya jamatii po'ayequiequinaje enijje. Jjapeequi tiitiinequinaje enijje, jamatii beca cuaa eseya cajaa acanaje. ²⁹⁻³⁰ Jamajojoya aje oe miquianaya Eyacuiñajjiya quea bame quia cani, e ohua acanaje jayojjaya. E'e, ohuaya eya ojjaña dejja cuanaja Emeshi Mese nei po mee ca'yonaje; jamaya eyaya

miquianaya Jodio dejja cuanaja emeshi mese jayojja po meeje'yo eyajo. Jomajo eseya ba'e tiitiije'yo; quea bihui cuaje —jamaya aca cua Jesusaa o shajja'ajjajji cuana.

Jesosa Peno nijje mimia cua

(*Mateo 26.31-35; Macoso 14.27-31; Huani 13.36-38*)

³¹ Majoya Jesosa mimia cua Peno nijje. Penoja pea bajjani cua ba'a: Simohui. Jama Jesosa cua ba'a: —Simohui, shajja'ajjacue jiquio esohui ba'a: Edosiquiaa miquianaya eya pajea mee'yo sa acani. Ohuaya miquianaya mimishi po mee'yo sa acani. ³² Simohui, eya miminaje mijo Eyacuiñajji nijje. Miyaya eya cajaa jayojja aje. Majoya miya enijje jjapeequi neineije o'oya. Jamajjeya enijje jjapeequi o'oya majje ipea e shajja'ajjajji cuana jjapee tiitiiqui meesahuacue enijje!

³³ Simohui jama cua ba'a: —Ecuea Emeshi Mese nei, Jesosa, eya aje minijje tiiya poquije mi jeanobia caje yasijje mi jayojja pea'ai mano'yome po'yohua. Ecuea aje mi epajea'yojji pojjeama.

³⁴ Jesusaa Peno jama aca cua ba'a: —Peno, mecahuajje cachina yahue taaa jjimahuajo, miya jama siajje pome cuaje ba'a: “Chojja, ecuea Jesosa ba jjima”. Pea beca peejjima siajje ameya aje miyaya —jamaya Jesosa cua.

Beshahua nei acua Jesosa e'iñajji

³⁵ Majoya aje Jesusaa o shajja'ajjajji cuana jama huohui'ajjame aca cua ba'a: —Yahuajo pishana eyaya miquianaya huoojeanaje esohui huohuiya. Eyaya miquianaya huoojeanaje aema' jamatii bejjoma', bashosocoma', miquea ejiojjijo nei nequi

dojonaje. Eyaya miqúanaya jaahuananaje. ¿A'a miqúanaya quea shoe cuanaje? Chojja.

Oya cuana jama cua ba'a: —E'e jojo nei, jaahuana neinajeya aje jja ca miyaya ecua, de.

³⁶ Majoya aje Jesosa jama cua ba'a: —E'e de, jjeya ca ca beca cuaa eya quecua caje'yo. Eya miqúana nijje nequi tii ajja jiquio meshijo, eya mano'yo majje. ¡Jamajjeya ca oe miquea bejjo dojocue; miquea bashosocojo biyocuatajeacue quea huesha epoquijji! ¡Jjequicue miquea equecua-jji! Chamajo jjeshecue miquea daqui moo sosejje. ³⁷ E'e de, yahuajo Eyacuiñajji etehue'yo ejo jama cua ba'a: “Dejja mase cuanaja boti'ama Eyacuiñajji huoojea'yo cuaje. Dejja mimishi jayojja acaje'yo. Jamajjeya quecua caje'yo cuaa” jamaya acaje jjeyahua nei, de —jamaya Jesosa cua.

³⁸ O shajja'ajjajji cuana jama cua ba'a: —Bacue, yani ecuanaja beca equecujji. Ecuanaa sohuinano cuana quecuaje'yo, de.

Jesosa jama cua ba'a: —Miqúanajaya ba jjima ecuea esohui, de. Mahuiso ecuea esohui —jamaya Jesosa cua.

Jetesemani quejo Jesosa mimia cua Eyacuiñajji nijje

(Mateo 26.36-46; Macoso 14.32-42)

³⁹ Majoya Jesosa poquia cua Onimo eyiyo huasijje mimiya oja Chii nijje. Cuamaya oya poqui majamaja nequia cua mimiya Eyacuiñajji nijje. Onijje o shajja'ajjajji cuana poquia cua pea'ai. ⁴⁰ Majoya aje Jososaa jama aca cua ba'a: —¡Mimi majamajacue oe Eyacuiñajji nijje mimishi'ama epojji!

⁴¹ Majoya Jesosa poquia cua quea huesha pishana mimiya Eyacuiñajji nijje oe nei. Majoya oya ecui'oshajjajo nequi majje mimia cua jama ba'a: ⁴²—E'e de, Eyacuiñajji, eya beshahua nei poqui sa po ajja acui ecueata'apee yasijje. Eya quea mete nee nee ojjañaja mimishi cuanajo, de. Ecue Chii, ecuea eba miyaya eya acui ecueata'apee yasijje poqui mee sa aña emano'yojji ojjañaja mimishijo. Jamajjeya ¡quea ca'a po meecue eya miquea ej-jashahuabaqui'yojji jayojja jama e'ajji! —jama mimimeya Jesosa cua.

⁴³⁻⁴⁴ Jesosa quea mano jjabaquia cua emano'yojji jjejojo. Majoya mimi o'oya cua oja Chii nijje jjanobajjima nei. O janobajjima nei mimianijo, shishi majje ena' jayojja oquequia cua meshi yasijje, de. Majoya aje esohuidojojji eyajje nequioquea cua Jesosa mete'ama po meeya. Ohuaya majoya Jesosa quea nee ca'a po mee ca cua; jama cua ba'a: —¡Mique Chiija esohui jayojja jama acue! —jamaya aca cua.

⁴⁵ Majoya Jesosa oja Chii nijje mimipajea'yo majje oya poquia cua o shajja'ajjajji cuana huasijje. Ba ca cua oya cuana ecahuijaa quea yeno nee nee jjejojo, de. ⁴⁶ Ohuaya oya cuana jama aca cua ba'a: —¿Apiojji acuae miquianaya ecahuijaa so'o? ¡Anisohuacue jja oe; mimi majamajacue miquianaya Eyacuiñajji nijje! Jamajoya pea cuaa quea mimishi epo mee'yojji pojjeama —jamaya Jesosa cua.

Jesosa ña ca cuaa cua
(Mateo 26.47-56; Macoso 14.43-50; Huani 18.2-11)

⁴⁷ Jesosa mimianijo tii Jodio etii cuana, sohuinano cuana, Eyacuiñajji nijje mimiani etii cuana pea'ai cueya cua. Jodasa, Jesosa shajja'ajjajji nisho cueya cua o que. Oya ehui dojojji nei cueya cua. O e'iñajji jjanequichipiquia cua Jesosa nequi yasijje. Jjanequichipiqui majje shemo tojjo nisho ca cua. ⁴⁸ Majoya aje Jesusaa jama aca cua ba'a: —Jodasa, miyaya eya shemo tojjo nisho majje sohuinano cuana iña mee'yonaje. ¿Yajjajo Jodasa? —jamaya Jesosa cua.

⁴⁹ Majoya o shajja'ajjajji cuaa ba majje Jesosa jama huohui'ajjame aca cua ba'a: —Jesosa, ¿a'a ecuaaya sohuinano cuana jajajeaje?

⁵⁰ Majoya aje oe oja eshajja'ajjajjiya dejja esapa jajapojojeajji nisho eshajja jajasejjajea ca cua ebañei shajjajje. Eyacuiñajji nijje mimiani etiiija echacojji cuanija eshajja, de.

⁵¹ —Chojja, ¡a'a jja oe jajajji! —Jesosa cua.

Majoya Jesusaa ma dejjaja eshajja ejajasejjajea emeya nequia ca'ya cua. Shajja jaja jjima jayojja shajja pana'yome aca cua. ⁵² Majoya Jesusaa dejja cuana jama huohui'ajjame aca cua ba'a: —¿Apiojji miquianaya cueyanaje baajji, acuijji e'iñaa? ¿A'a cuae jja iña siipojji so'o? ⁵³ E'e de, ojjaña poj-jajo eya esohui huohui po nequinaje Eyacuiñajjiija equijo. Miquianajaya eya iña jjima cuanaje ma equijo quea meteya jjejojo dejja cuanajo. Jjeya ca ca Edosiquiaa miquianaya iña mee canaje jiquio quejo dejjamajo.

Peno Jesusaja epeejji nisho jayojja cua

(Mateo 26.57-58, 69-75; Macoso 14.53-54, 66-72; Huani 18.12-18, 25-27)

⁵⁴ Majoya sohuinano cuaa Jesosa iña'yo majje dojo ca cua Eyacuiña'aji nijje mimiani etiija equi yasijje. Penohua ca ca quea huesha pishana quiquishi ca poquia cua. ⁵⁵ Majoya pea sohuinano cuaa cuaqui dahuahuojje ca cua equi epeeyi dojjojo. Majoya anioquea cua cuaqui pejjejo ejjayoquijji. Peno pea'ai anioquea cua ona nijje yajja Jesosa onaa acaje ebajji. ⁵⁶ Echacojji ahuema'aniya Peno jjayoquiani ba majje cojja ba neinei ca cua. Ba majje pea cuana jama huohuime aca cua ba'a: —E'e, joya Jesusaja epeejji ani ba'a — jamaya cua ahuema'ani.

⁵⁷ Peno jama cua ba'a: —Ecuea Jesosa ba jjima nei nei.

⁵⁸ Quijje pishana pea dejjaa Peno ba ca o'oya cua. Jama cua ba'a: —Miya jja Jesusaja epeejji, o shajja'ajjajji cuani.

—Chojja, ecuea Jesosa ba jjima nei nei —jamaya aca cua Penohua.

⁵⁹ Majoya quijje pishana peaa oya ba ca o'oya cua: —E'e, oya jja Jesusaja epeejji nei nei. Oya jja Janinea meshijo ba'e Jesosa jayojjaya.

⁶⁰ Majoya aje Peno jama cua ba'a: —Chojja de, ¿ajeo ajja mi ca mimiani so'o?

Peno miminequijo tii, oe cachina yahue taaa cua. ⁶¹ Ma cachina taaajo Jesosa jjanequijea pajjaquia cua Peno bajji. Majoya aje Peno jjashahuabaquia cua Jesusaja ehuhuijo jama ba'a: “Cachina yahue taaa jjimahuajo, pea beca peejjima siajje ameya aje miyaya, eya ba jjima nisho aje”. ⁶² Majoya Peno cuayaquia cua. Pa neinei'ya cua Jesosa ba jjima nisho epo jjejojo; quea yeno nee nee'ya cua.

Jesosa Jodio dejja cuaa niñeba ca cua
(Mateo 26.67-68; Macoso 14.65)

⁶³ Sohuinano cuaa Jesosa jaahuana ca nequia cua, cuaya meequi'yo jjima yajji. Majoya Jesosa niñeba ca cuaa cua, majoya Jesosa cuia ca cua.

⁶⁴ Majoya cuia majje cojja japa ca cua. Cojja japa majje shemo cuiasejjajea ca cua. Shemo cuiasejjajea majje ohuaya cuaa Jesosa jama huohui'ajjame aca cua ba'a: —¿Aya acuae mi cuia canaje so'o? ¡Jjashahuaba'ajjaqui!

⁶⁵ Majoya sohuinano cuaa Jesosa niñebajea neinei ca'ya cua, mimijaji neinei'ya cua onijje.

Pea cuaa Jesosa dojo ca cua Jodio etii cuana huasijje huohui'ajjaa
(Mateo 26.59-66; Macoso 14.55-64; Huani 18.19-24)

⁶⁶ Jjapojjaquiajo Jodio etii cuana jjachichaquia cua. Ojjaña Jodio etii, Eyacuiñajji nijje mimiani etii, Moisesija etehue'yo huohuijji etii cuana, ojjaña ojee mimia cua Jesusajo. Majoya sohuinano cuaa Jesosa dojo ca cua Jodio etii cuana huasijje. Majoya aje etii cuaa Jesosa jama huohui'ajjame aca cua ba'a: ⁶⁷ —¡Huohuicue ecuanaya miquea ebajjani! ¿A'a miquea ebajjani Quito, Eyacuiñajjija huoojea'yo, pojja'a?

Jesosaa jama saja'ame aca cua ba'a: —Eya “e'e” cuajo miquianaya jjashajja'ajjaqui ajja, de. ⁶⁸ Miquianaya eyaya huohui'ajjajje saja'a jjima aje'yo eya. Jamaya eya saja'ajje miquianajaya eya epichojea'yojji pojjeama. ⁶⁹ E'e, eya poquije'yo jjeja nei pishana eyahuasijje Eyacuiñajji nijje

ebañeijje ani'yohua. Jomajo ecue Chii quea sohui poja nee nee enequi tii tii —jamaya Jesosa cua.

⁷⁰ Majoya aje Jesosa ojjaña jama huohui'ajjame aca cua ba'a: —¿A'a miya Eyacuiñajjija Bacua Ejja nei so'o?

Jesosaa jama saja'ame aca cua ba'a: —E'e jojo nei miqiaaya esohui ejo aña.

⁷¹ Majoya aje oya cuana jama mimijajime cua ba'a: —¡De, pea dejja a'a iyaajji Jesosa huohuijji! Ecuana ijeya nei shajja'ajjanaje ojaya esohui. Ohuaya Eyacuiñajji niñeba canaje Eyacuiñajjija Bacua Ejjaa miame —jama mimijajimeya cua Jesosa nijje.

23

Jesosa emeshi mese Pinato huasijje dojo ca cua
(Mateo 27.1-2, 11-14; Macoso 15.1-5; Huani 18.28-38)

¹ Majoya ojjaña nequisohua majje poquia cua emeshi mese Pinato huasijje Jesosa dojhua. Pinato esohuinano mese cua, ojjaña emeshi mese cuanaja emeshi mese pea'ai cua. ² Jesosa dojo majje Pinato cojja nei nequia ca cua Jodio etii cuaa. Onaaya Jesosa jama niñebame aca cua ba'a: —Ecuaa jiquio dejja banaje. Mimitecuetecuequi ecuanaja meshijo. Oya jama cuanaje ba'a: “¡A'a bejjo quiajji emeshi mese sosequiajji!” Oya pa Eyacuiñajjija huoojea'yo cuani; oya pa Jodioja emishi mese posa cuani, de —jamaya oya cuana siajje cua Jesosajo.

³ Majoya Pinatohua Jesosa jama huohui'ajjame aca cua ba'a: —¿A'a miya Jodioja emeshi mese cuani?

Jesosaa jama saja'ame aca cua ba'a: —Miyaya huohuiaña jayojjaya cuani eya.

⁴ Majoya Pinatohua etii cuana jama huohuime aca cua ba'a: —De, jiquio dejja jjashahuaba taiqui ajja, capichojea'yahua jja, de.

⁵ Oya cuana quea quene nee nee cua. Mimia cua janobajjima nei nei. Jama tecuetecueme cua ba'a: —Oya ca ca jjashahuaba taiquinaje, de. Ohuaya esohui huohui ca ayequiequinaje ojjaña cuiñajji yasijje. Ebionei Janinea meshijo hohui canaje, jjeya Jodea meshijo huohui canaje jiquio cuiñajji cuana huasijje, jjeya nei pea'asi, de. Ojjaña quea quene nee nee, quea shajjaquijjo nee nee ohuaya po mee canaje cuana —jama siajje ameya aca cua Jodio etii cuaa.

Jesosa dojo ca cua pea emeshi mese que, Enode que

⁶ Pinatohua ona shajja'ajja majje jama huohui'ajjame aca cua ba'a: —¿A'a jiquio dejja Janinea jo ba'e?

⁷ —E'e —oya cuana cua.

Pinatohua ma shajja'ajja majje Jesosa huojea ca cua Enode que, Janinea ameshi mese que. Enode Jenosanenajo ania cua anicuaa poqui. Jamajjeya Pinatohua Jesosa, Jodio etii cuana pea'ai huoojea ca cua Enode que.

⁸ Enode Jesosa ba majje jama cua ba'a: —E'e de, jjeya nei eyaya baña jiquio dejja Jesosa. Eyaya oya ba sa anaje ojaya esohui eshajja'ajjajji; emano'yo cuana eshequi mee caje'yo ba sa anaje pea'ai —jamaya cua Enode. Oya ca ca Jesusaja epeejji po sa po ajja nei.

⁹ Majoya Enodeya huohui'ajja majamaja ca nequia cua. Jesosaja oya Enode sohui saja'a jjima cua. ¹⁰ Jodio etii cuaa Jesosa niñeba neinei ca añã cua. ¹¹ Majoya Enodeya, oja sohuinano cuaa Jesosa hue'e ca cua esoadojojji. Daqui quea sose huiso emeshi meseja jayojja Jesosa huosho mee ca cua emeshi mese nisho yajji. Majoya aje daqui huosho mee majje bihuia nisho ca cua. Majoya aje Jesosa huoojea ca o'oya cua cuaa Pinato que. ¹² Ma pojajajo Jesosa nijje mimijaji majje Enode Pinato nijje jjapeequinaje. Yahuajo Pinato Enodeja epee-
jji pojjeama cua.

Jesosa Pinatohua mano mee ca'ya cua

(Mateo 27.15-26; Macoso 15.6-15; Huani 18.39–19.16)

¹³ Majoya aje Pinato jjachichaquia cua Jodio etii cuana nijje, Jenosanena emeshi mese cuana nijje, pea dejja cuana nijje pea'ai. ¹⁴ Jama huohuime aca cua ba'a: —Miquianaya ¿apoiiji Jesosa yenaje so'o? Miquianaya jama cuanaje ba'a: “Ohuaya ojjaña dejja cuana quea quene, quea shajjaquijjo po mee cani” poso anaje. Cho oya ca ca quea mimishi pojjeama cuani. E que miquiaaya yajo aje jja, eyaya Jesosa huohui'ajjanaje. Jjeya nei ecuea eba Jesosa, oya jjashahuaba taiqui ajja. Oya quea mimishi pojjeama. Joya eua miquiaaya huohui yaña jama pojjeama. ¹⁵ Enode jama cuanaje ba'a: “Oya ca jja ca quea mimishi pojjeama, de”. Jamajjeya ohuaya Jesosa huoojea ca o'oyanaje e que. ¡Bacue! Eyaya Jesosa mano mee'yo jjima aje, capichojea'yahua jja Jesosa, de. ¹⁶ Jamajjeya eyaya oya cuia meeje.

Majoya aje cuia mee majje pichojea meeje'yo — jamaya cua Pinato.

¹⁷ Ojjaña eshequiaja Pascuajo Pinatohua oe ejeanobia nequi huoojeacuaya ca'yaninaje, Jodio cuana quea bei epojji. Jamajjeya Pinato jama cua ba'a: —Jesosa eyaya huoojeacuaya meejo'yo jiquio shejo.

¹⁸ Ma esohui shajja'ajja majje ojjaña Jodio cuana quenequene neinei'ya cua; taaa cua jama ba'a: — Chojja, ¡Mashama ca oe huoojeacuaya'yocue! ¡Quecua mee'yocue Jesosa!

¹⁹ Mashama jeanobia ca cua yahuajo pishana, oya quea mase nee nee cua. Oya Shomano emeshi mese quecuapanajji epo; ona quecua'yojji epo pea'ai. Oya quea mimishi nee nee cua.

²⁰ Pinatohua ca ca Jesosa huoojeacuaya'yo sa aca cua, jamajjeya jama mimome po o'oya cua ba'a: —Cho, Jesosa ca ca oe huoojeacuaya mee'yo sa aña.

²¹ Ojaya esohui shajja'ajja majje ojjaña cuana janobajjima nei nei jama taaame cua ba'a: — Chojja de, ¡Jesosa ca oe quecua mee'yocue jjeya nei! ¡Acui ecueata'apeejo oe ba'ehuanasohuajecue!

²² Pinatohua jama huohuime aca o'oya cua ba'a: —¿Apiojji shai miquianaaya oya mano mee'yo sa aña so'o? Oya ca jja ca quea mimishi pojjeama cuani. Eyaya oya cuia neinei mee'yo majje huoojeacuaya meeje'yo. ²³ Majoya aje ojjaña cuana taaa o'oya cua jama ba'a: — ¡Ba'ehuanasohuajecue oe acui ecueata'apeejo Jesosa!

Ojjaña cuana taaa majamaja cua. Quenequene neineiya cua Pinato nijje. ²⁴ Jamajjeya pinato

jama jjashahuabaquime cua ba'a: —E'e de, eyaya Jesosa caquecua meejea'yahua, dejja cuana enijje quea quene cuequiijo. Eyaya ca oe Mashama cahuojeacuaya mee'yahua.

²⁵ Majoya aje pinatohua ma ecua ojjaña taaanaje jama jayojjaya aca cua. Jamajjeya ohuaya Mashama huoojeacuaya mee ca'ya cua; Jesosa ca ca oe huoojea ca cua acui ecueata'apeejo eme' cacajeajji emano'yojji.

Jesosa ba'ehuanasohuajea ca cua acui ecueata'apeejo

(Mateo 27.32-44; Macoso 15.21-32; Huani 19.17-27)

²⁶ Majoya sohuinano cuaa Jesosa acui ecueata'apeejji dojo mee ca cua o ba'ehuanasohuajejji. Jesosa saja ca cua acui quea biquieya jjejojo. Jamajjeya sohuinano cuaa oe dejja ma acui dojo mee ca cua. Oya Simoni bajjani cua; Sinene meshijo ba'e cue cua. Jamajjeya Simoniya Jesosa quiquishijji dojo ca cua acui ecueata'apee abojji. ²⁷ Ojjaña dejja cuana epona cuana pea'ai pa poquia cua Jesusajo quea yeno jjejojo. ²⁸ Jesusaa epona cuana ba majje jama aca cua ba'a: —Jenosanenajo ba'e epona cuana, ¡a'a oe ejo pajji! ¡Miquianaja pa sa cuanijo pacue miquianajo miquianaja bacuajo pea'ai!

²⁹ Quijje pishana quea camaja cuaje miquianajo. Miquianaaya jama huohuije ba'a: “Oe epona bacuama' camaja'ama ba'yani”. Sohuinano cuana cueje jiquio cuiñajji yasijje miquiana quecuaa, chama'yo tii cuaje miquianajaya bobi. Jamajjeya miquianajaya ebacua yanijo quea

yeno nee nee cuaje. Ebacua cuana pa neineije'yo bobimajo. ³⁰ Dejjá cuana quea yeno nee nee cuaje pea'ai. Joya ecua atii mano'yo sa cuani jama miqúanaya cuaje. Majoya miqúanaya jjashahuabaquiije jama ba'a: “Eyiyo, ¡ecuana biajje oe jaabicha cuajicue ecuana cuia cuaji'yojji” jamaya miqúanaya cuaje. E'e epona cuana, miqúanaya ani sa po ajja cuaje quea camaja ba'e jjejojo. Jamajjeya ma pojajajo quea nee nee cuaje. ³¹ Jjeya nei sohuinano cuaa eya quecua caje'yo. Maya ca ca oe quea tai pishana. Quijje ojjaña sohuinano cuaa miqúanaya quecua jeyojeyo caje'yo, maya quea tai nee nee cuaje'yo. Jamajjeya ja'a pajji ejo; miqúanajoya jja oe pa neineicue! —jamaya Jesosaa aca cua.

³² Majoya sohuinano cuaa beca siipojji dojo ca cua Jesosa nijje eba'ehuanasohuajejji. ³³ Majoya oya cuana poquia cua eyiyo Sapa Jjii bajjani yasi-
jje. Bañaqui majje Jesosaja eme' caca ca cua acui ecueata'apeejo; ejiojjijje pea'ai caca ca cua. Caca-
cayeyo majje nequiasohuajea ca cua. Ma becan-
jjijji pea'ai siipojji pea acui ecueta'apee cuanajo
nequiasohuajea ca cua Jesosa pejjejo oe ebañei
mijijje, pea shani mijijje. ³⁴ Acui ecueata'apeejo
ba'ehuanasohuajea cajje Jesosa mimia cua Ey-
acuiñaaji nijje ojjaña nequijo jama ba'a: —Ecue
Chii, ecue Chii jiquio dejja cuanaja ba jjima e'e
jojo nei eya miquea Ebacua Ejja cuani. Jamajjeya
jiquio mimishi cuijea'yocue!

Majoya aje sohuinano cuaa Jesosaja daqui hui-
jjiajaja'yo majje hue'e ca cua oja daqui ya'yojjiya.
³⁵ Ojjaña dejjaa Jesosa ba ca nequia cua, Jodio
etii cuaa pea'ai. Niñeba ca cua Jesosa jama ba'a:

—Dee, ¿a'a Jesosa ojjaña jaahuanajji pojjeama cuanaje? Oya ona nahuejji pojjeama. Jamajjeya mi nequioque'yani acui ecueta'apeejo ba'e. Oya Eyacuiñajjija Bacua Ejja jjabaqui majje jja ca oe jjeyahua neiya canequioque'yahua —jama niñebameya Jodio etii cuaa aca cua.

³⁶ Sohuinano cuana mimijajia cua pea'ai. Jesosa majoya quia'ajja ca cua jjonojjajja na sese e'ishijji nisho. ³⁷ Jama mimijajime cua ba'a: —¡Miya Jodioja emeshi mese nei jjabaqui majje mee nei nequioque'yocue acui ecueta'apeejo ba'e jjeyahua nei!

³⁸ Jesosa ba'e sapa biajje oja bajjani etehue'yo caca ca cua jama ba'a:

Oya Jesosa, Jodioja emeshi mese epo'yojji

³⁹ Oe siipojji pea acui ecueata'apeejo ba'e mimijajia cua Jesosa nijje jama ba'a: —¡A'a cuae miya Eyacuiñajjija Bacua Ejja nei jjaba'ajjaqui socue! ¡Ache oe nequioque'ajjaqui'yo socue; ecuanaya pea'ai pajjaja oe che nequioque meequi'yoque!

⁴⁰ Pea siipojjiya pea acui ecueata'apeejo ba'eya ca ca ma esohui shajja'ajja majje tanacua ca cua jama ba'a: —¡A'a jjashahuaba taiquijji, de! ¿A'a miya Eyacuiñajjijo jjashahuabaqui ajja nei nei? Jjeya se manoje'yo. ⁴¹ Eseyá mano mee ca'yani sohuinano cuaa quea mimishi nee neejojo. Jesosa ca ca mimishi'ama, de.

⁴² Majoya aje ohuaya Jesosa jama aca cua ba'a: —Jesosa, ¡miya eyahuasijje poqui'yo majje ejo che jjashahuaba bamequicue!

⁴³ Majoya Jesosaa jama aca cua ba'a: — E'e, jiquio pojajajo miya enijje eyahuasijje ba'esohuaquije'yo mano'yo majje.

Jesosa mano'ya cua

(*Mateo 27.45-46; Macoso 15.33-41; Huani 19.28-30*)

⁴⁴ Majoya esheque biacojjajja nequijo, shequima'po mee ca'ya cua. Quea apo nee nee po mee ca'ya cua ojjaña meshi yasijje. Quijje nei jjapojjaqui mee ca'ya cua eshequi ejjanequijea-paaquijo. ⁴⁵ Eshequi quea apo nee nee po'yajo, Eyacuiñajjija equijo ba'ehuana ba'e daqui moo nei jja'isajeaquia cua eyiyesama neijje. ⁴⁶ Majoya aje Jesosa jjanobajjima nei taaa cua jama ba'a: —Ecue Chii, ecue Chii eyaya mi que ecue dojjoshahua huoojeaje'yo. Jjeyahua mo poquijeyoje.

Jama po majjeya poquijeya cua.

⁴⁷ Sohuinano huoojeajji cuani meseya Jesosa mano'yajo, ba ca cua. Majoya jama cua ba'a: — E'e de, e'e jojo nei Jesosa mimishi'ama nei nei cuanaje; oya Eyacuiñajjija Bacua Ejja cuanaje, de.

⁴⁸ Ojjaña dejja o ba cuequi poqui'ya cua. Ese'lo cuiaqueyajea ca poqui'ya cua quea yeno nee neeya jjejojo sapa cuana cuiapashijea ca poquia cua. ⁴⁹ Ojjaña Jesusaja epeeji cuana ca ca quea huesha nequia cua. Epona cuaa pea'ai quea huesha aniya ba ca cua Jesosa onaa cuia ca'yoqui acui ecueata'apeejo ba'e. Ma epona cuana yahuajo nei jjapeequia cua Jesosa nijje, Janinea meshijo ba'e.

Jesosa mei jjani yasijje huananobia ca cua

(*Mateo 27.57-61; Macoso 15.42-47; Huani 19.38-42*)

⁵⁰⁻⁵¹ Oe dejja Jose bajjani quea aquiana huiso cua. Oya pea Jose, Amatea cuiñajjijo ba'e. Oya jjapee tiitiiquia cua Jesosa nijje. Oya Jodio etii cua. Jesosa mano'yo jjimahuajo, oya Jodio etti cuana nijje jjachichaquia cua. Ohuaya beca etii cuana jama huohuime aca cua ba'a: —Chojja de, eya ca iña Jesosa mano mee sa po'yo ajja.

⁵² Jamajjeya Jesosa mano'yajo Jose poquia cua Pinato que Jesosa epoquijeyo ba'e huohui'ajjaa; jama aca cua ba'a: —E'e de, ¡Jesosa mo quia'yoque! Oya ca ca mano neinei'yonaje. Eyaya oya dojoye'yo ecuea mei jjani yasijje ehuananobiaqui'yojji.

⁵³ Majoya aje ohuaya Jesosa mano'yo ba'e jje-quoquea ca'ya cua acui ecuetapeejo ba'e. Jje-quoquea'yo majje bebo ca'ya cua daqui oshe quea bojea nee neeya. Bebo majje mei jjani ai yasi-jje huananobiaa dojo ca cua mano'yo tii cuanaja ejaajji ajjima huasijje. ⁵⁴ Sinecua nei, ejomishocajji epojja po jjimahuajo Jesosa huananobiaa dojo ca cua Joseya.

⁵⁵ Janinea meshijo ba'e epona cuana Jose quishishi poquia cua mei jjani yasijje Jesosa emano'yo baa. Jesosa mei jjanijo huana ca cua Joseya. Epona cuaa Jesosa emano nei'yojaa baqui ca cua shiyeshiyejo eshaquijji nisho. Majoya Joseya mei quea quemmo jeacajjajja ca cua mei jjani naba capa'yojji. ⁵⁶ Majoya epona cuaa Jesosa jjanijo ehuananobia jaa ba majje shiyeshiyejo shaqui jjima aca cua. Jamajjeya poqui'ya cua ocuayaya equi yasijjeya. Majoya acui shiye pohuipohui shiyeshiye acua aca cua Jesusaja eyami shaquijji nisho. Shaqui jjima aca cua

ejomishocajji pojja jojoya. Jamatii Jodio dejja cuana ma pojjajoya chacochocho cua.

24

Jesosa shequi'ya cua

(Mateo 28.1-10; Macoso 16.1-8; Huani 20.1-10)

¹ Mecajjeahua nei nei nomico pojjaajo, epona cuana poqui o'oya cua Jesosa ba o'oyaa. Shiyeshiye acua'ya dojo ca cua jjani jaa huasijje, Jesusaja eyami shaa nisho ihui jjima epojji. ² Epona cuaa ba cañaquia cua mei jjani eca'apejo'yo cua. ³ Oya cuana dobiquia cua ma mei jjani dojo huasijje Jesosa baa nisho. Dobiqui majje Jesosa chama' ba ca'ya cua. ⁴ Majoya quea mete nee nee po'ya cua Jesosa chama' ba majje. Ma mete'yoquiya aje eponaa beca esohuidojojji dejja jayojja ba ca cua o pejejo nequi. Ojaya daqui quea oshe nee nee, quea siyo nee nee cua. ⁵ Epona cuana quea mete nee nee cua; ecojja cahui cua quea cojja sajaja jjejojo. Majoya aje esohuidojojjiya jama huohuime aca cua ba'a: —¿Yajjajo acuaeya miquianaya sa'ajjaña Jesosa jiquiojo so'o? ¿A'a emano'yo poso? Chojja, oya shequi'yonaje. ¡Chama'yo ca jja ca jiquiojo! ¡Oya ca jja ca eshe nequi'yo! ⁶ ¿A'a jja miquianaaya Jesusaja esohui pajea'yonaje ma ohua yahuajo huohui ca cua Janinea meshijo nequiahuaa? ⁷ Jesosa yahuajo pishana, mano'yo jjimahua, jama cua ba'a: “Mimishi cuaa eya mano mee caje'yo acui ecueata'apeejo. Pea beca peejjima cahuime po majje shequi'e'yo” jamaya cua Jesosa

mano'yo jjimahua. Jamajjeya ja'a quea mete pojji! —jamaya aca cua esohuidojojjiya.

⁸ Ma esohui shajja'ajja majje epona cuaa Jesosaja esohui shahuaba ca'ya cua. ⁹ Majoya aje poqui cuajicuaji'ya cua pea cuana huohui'yohua. Huohui cañaquia cua o shajja'ajjajji cuana, ojjaña cuana pea'ai Jেসosa shequi'yonajejo. ¹⁰ Mania Madanena, pea Mania Jacoboja nae, Huana, pea epona cuana pea'ai poquia cua huohui po'yohua. ¹¹ O shajja'ajjajji cuaa epona cuana ohua huohui cajje, jama aca cua ba'a: —Epona cuana, siajje mi ca cuani Jেসosa eshequi'yojo miame. Miquiana-jaya esohui shajja'ajja sa po ajja ca iña —jamaya cuaa aca cua.

¹² Peno ca ca quea cuejipashi nei poquia cua mei jjani yasijje ba'ajja'yohua. Bañaqui majje mei jjani ye'e'ajja cañaquia cua ma Jেসosa jaa cuajo. Ba ca cua o bebojji oe ani, oja jeajeana'yo jja oe ania cua.

—De, chama'yo Jেসosa yaña, de —jamaya Peno cua. Jamaya po majje poqui o'oya cua equi yasi-jje. Poquianijo oya jjashahuabaquia cua Jেসosajo. Ojaya ba jjima; jamajjeya jama cua ba'a: ¿Yajja shai po'yonaje Jেসosa? —jamaya cua Peno.

*Becanejjijji pea'ai o shajja'ajjajjiya Jেসosa ba ca
cua Emao jiojjijje poquijeya
(Macoso 16.12-13)*

¹³ Oya pojajajo tii, becannejijji pea'ai o shajja'ajjajji cuana poquia cua Emao cuiñajji yasijje. Quea huesha pishana cua Jenosanena ebañaquijji.

¹⁴ Jেসosa emano'yo niñeba ca poquia cua. ¹⁵ O mimi poquijejo Jেসosa jjanequichipiquia cua oni-jje. Jjanequichipiqui majje onijje poquia cua.

¹⁶ Jেসosa ba majje ba tai ca'yonaje, pea dejja

posoya aca cuaa cua. ¹⁷ Majoya aje Jesosaa jama huohui'ajjame aca cua ba'a: —¿A'ya cuae nequiaa ca niñeba poquiaje so'o?

¹⁸ Majoya Quiopasiya jama saja'ame aca cua ba'a: —¿A'a miquea eba ma onaa acanaje Jenosanenajo?

¹⁹ Majoya aje jjaja Jesosa jama cua ba'a: — ¡Huohui'ajja socue mo yajja acuae mi cuanaje!

Oya jama aca cuaa cua ba'a: —Jesosa Nasanenajo ba'e. Oya quea sohui poja nee nee cuanaje. Ohuaya Eyacuiñajjija esohui huohui canaje, de. Ojjaña dejja jjashahuabaquinaje ojaya esohuijo. ²⁰ Majoya Jodio etii cuaa, emeshi mese cuaa, Jesosa iña mee ca'yonaje, acui ecueata'apeejo quecua mee ca'yonaje. ²¹ Ecuana jjashahuabaquinaje Jesosa Jodio dejja cuanaja emeshi mese epojjiyo Eyacuiñajjija huoojea'yo pea'aajo. Oya ca ca chama'yo tii po'yonaje, de. Pea beca peejjima cahuime oya emano'yojaa. ²² Jiquio pojajajo mecajjeahua nei nei epona cuana poquinaje mei jjani yasijje Jesosa shaa nisho. Jjajjasoaquinaje Jesosa chama'yojojo. ²³ Jesosa emano'yojaa ba'yo jjima cuanaje, jamajjeya cue o'oyanaje huohui po'yohua. Majoya aje pa ponaa ohuaya esohuidojojji ani ba canaje jjani dojjojo ani. Jama huohuimeya aje pa pona majoya acanaje ba'a: “Jesosa ca ca emano'yo tii pojjeama jaa, shequi'yonaje ca coma” jamaya pa pona acanaje. ²⁴ Majoya epona cuaa huohui cajje poquinaje beca cuana mei jjani yasijje. Mei jjani bañaqui majje chama' Jesosa ba canaje. Ma ecua epona cuaa esohui acanaje jayojjaya cuanaje. Onajaya Jesosa eshe-

qui'yo ba'yo jjima tii cuanaje, de —jamaya mimia cua o shajja'ajjajji cuana.

²⁵ Majoya aje Jesusaa jama huohuime aca cua ba'a: —Miquianaya jjashahuabaqui ajja Eyacuiñajjija esohuijo. ²⁶ ¿A'a miquianajaya ba jjima Eyacuiñajjija huoojea'yo ebionei camanoqui'yahua? Majoya shequi'yo majje, eyahuasijje poqui majje Eyacuiñajji ebañeijje anioqueje'yo tii tii ojjañaja Emeshi Mese epo'yojji tii tii. Jamaya yahuajo tehue ca cua Eyacuiñajjija esohuijo. ¿A'a miquiaaya pajea'yonaje pojja'a? —jamaya Jesusaa aca cuana cua.

²⁷ Majoya poquijeya Jesusaa oya cuana huohui ca poquia cua ojjaña Eyacuiñajjija esohui ojo. Ohuaya huohui coo ca cua Moisesija ojo oja tehue majoya pea esohui huohuijji cuanaja ojo oja tehue huohui ca cua.

²⁸ Majoya Emao ba cañaquia cua. Majoya aje bañaqui majje Jesosa ca jjayejje'ajjaquinana cua. ²⁹ Majoya aje o shajja'ajjajji cuaa Jesosa jama aca cua ba'a: —Siña coma, jjaapoquia coma. ¡Ecuana nijje oe cahui chichacue! —jamaya cuaa aca cua.

Majoya Jesosa onijje dobiquia cua oe equi yasi-
jje. ³⁰ Majoya aje anioquea cua e'ijjia'ijjijji. Ma-
joya aje anioque majje Jesusaa pahui jjeshe ca cua. Pahui jjeshe majje Eyacuiñajji nijje mimia cua. Eyacuiñajji nijje mimi majje pahui miji ca cua. Majoya aje miji majje quia ca cuana cua. ³¹ Pahui quia cajje Jesosa bahuejja ca'ya cuaa cua. Jama cua ba'a: —E'e de, a'a jja mi Jesosa, de. E'e jojo nei miya shequi'yonaje, de —jamaya o shajja'ajjajji cuaa aca cua.

Majoya aje Jesosa jjachamaqui'ya cua, de.
³² Majoya aje cuana jama mimime po ania cua ba'a: —E'e de, e'e jojo nei mi eyaya anaje yaña, de. Ecuea equijiji peyaanaje o shajja'ajja majje. Quea bihui nee eseya cuanaje Eyacuiñajjija esohui shajja'ajja majje.

³³ Majoya aje o shajja'ajjajji cuana ocuayaya cue'ya cua Jenosanena huasijjeya mecajje tiya. Bañaqui majje ba ca cua pea Jesosaja shajja'ajjajji cuana, 11 ejjachichaqui ani pea epeeji cuana nijje. ³⁴ Pea cuaa majoya jama aca jjequia cua ba'a: —E'e jojo nei, de. Jesosa shequi'yonaje. Simohuija eba nei nei oya cuanaje.

³⁵ Majoya aje Emao huasijje poqui cuaa jama huohuime aca cua ba'a: —Ecuana poquianijo Emao huasijje, oe dejja poquinaje ecuana nijje. Oya miminaje ecuana nijje, de. Majoya ecuana ijja'ijjianaje ojee. Ohua pahui miji cajo ecuaaya oya bahuejjanaje Jesosa cuanaje, de. Oya ca ca shequi'yonaje, e'e jojo nei, de.

Jesosa ba ca cua o shajja'ajjajji cuaa

(Mateo 28.16-20; Macoso 16.14-18; Huani 20.19-23)

³⁶ Jesosa jjapanaquia cua ona mimiani yiye-samajo. Jesosa jama cua ba'a: —¡Yani eya, de! ¡Quea bei oe pocue nequiana!

³⁷ Jesosa ba majje quea mete nee nee cua o shajja'ajjajji cuana eshahuajo poso. ³⁸ Jesosa majoya jama cua ba'a: —¿Yajjajje acuae nequiana quea mete cuani so'o? ¿Apiojji miquianaya jjashahuaba quehuaquiiani? ³⁹ ¡Bacue mo oe! Ecuea eme jjoto huejja namoja quecua huejja yani, ejiojjijje pea'ai,

de. Eyami nei jja iña iquio, eshahua pojjeama. Eshahua ca jja ca yamima', sama' pea'ai, de. ¡Napa'ajja socue mo, ecuea eyami; ba neinei'ajja socue mo!

⁴⁰ Majoya Jesusaa ojaya eme ja'a ca cua, ejiojji pea'ai. ⁴¹ Onaaya ca Jesosa pojjeama poso aca cua quea bihui jjejojo. Jjashahuabajeaqui jjima cua. Jamajjeya Jesusaa oya cuana huohui'ajja ca cua ejjashahuaba meequijji jama ba'a: —¡Bacue eya, eyami nei; che mo bobi quiacue nequiaa! Eya ca ca eshahua pojjeama, eshahua cuana ca ca ijja'ijja ajja.

⁴² Majoya aje onaaya Jesosa nahuoo cuaquijo dahua quia ca cua. ⁴³ Jesusaa nahuoo ijja ca cua, ona cojja nei aniya. ⁴⁴ Majoya ohuaya jama aca cua ba'a: —Eyaya mano'yo jjimahuaa miquianaya huohuinaje pea cuaa eya quecua mee caje'yo. Majoya eya shequije o'oya. Jamaya Moisesija etehue'yojo, cua, Salmo etehue'yojo pea'ai huohui ca cua ejo. Ojjaña Eyacuiñajjija esohui huohuijji cuaa ejo tehue ca cua pea'ai —jamaya Jesosa cua.

⁴⁵ Majoya Jesusaa huohui ca cua Eyacuiñajjija etehue'yo ona jjabahuejjaquijji. ⁴⁶ Ohuaya jama aca cua ba'a: —Jama tehueme'ya cua ba'a: “Eyacuiñajjija huoojea'yo ojjaña jaahuanajji manoje'yo. Mano'yo majje shequije'yo pea beca peejjima cahuime po majje. ⁴⁷ Ojjaña cuaa ojjaña meshi yasijje cahuohui ca'yahua Eyacuiñajjija esohui, ojaya epeejji epojji. Ebionei Jenosanenajo cahuohui coo ca'yahua. Eyacuiñajji nijje cajjapeequi'yahua, mimishi cuana capajea ca'yahua. Majoya pea cuiñajji cuana huasijje

capoquiahua ojaya esohui huohuiya”. ⁴⁸ Jjeya nei miquianaaya eya banaje, shajja'ajjanaje jiquio esohui. Jamajjeya ja'a pajea'yoyji; huohui tiitiicue! ⁴⁹ ¡Bacue oe, eyaya Edojjoshahua Bame huoojeaje miquiana huasijje, miquiana quea bame ba'e meeji! Ecue Chiiya yahuajo huohui canajeya jjejojo Edojjoshahua Bame huoojeaje'yo eyaya. Jamajjeya jiquiojo tii anicue! ¡Jenosanenajo tii ishoa'ajjacue Edojjoshahua Bame nei cueje eyajo ani! Ohuaya miquianaya quea jjashahuabaqui ja'a po mee caje'yo —jamaya Jesosa cua.

Jesosa poqui'ya cua eyahuasijje
(Macoso 16.19-20)

⁵⁰ Majoya aje Jesusaa o shajja'ajjajji cuana dojo ca cua Betania huasijje. Bañaquí majje Jesusaa eme jeasohua ca cua, jama mimime cua ba'a: — ¡Enijje jjapee neineiquicue! ¡Jjashahuabaquicue Eyacuiñajji miquianaya quea ca'a epoyji!

⁵¹ Majoya aje Jesosa eyahuasijje poqui'ya cua. ⁵² Oya cuana Jesusajo quea bihui nee nee po'ya cua. Majoya aje huacuayaya cue'ya cua Jenosana huasijje quea bihui nee nee. ⁵³ Majoya aje poqui majamaja nequia cua Eyacuiñajji equi yasijje Eyacuiñajji bihuiaa.

E'e de, acua. Eyaya, Nocaa tehuejeyonaje. Mahuisoya.

clxxxix

Eyacuiñajjija Esohui **New Testament in Ese Ejja (BL:ese:Ese Ejja)**

copyright © 2012 Wycliffe Bible Translators, Inc.

Language: Ese Ejja

Translation by: Wycliffe Bible Translators, Inc.

Ese Ejja [ese], Bolivia

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Ese Ejja

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

cxc

2014-04-23

PDF generated using Haiola and XeLaTeX on 11 Nov 2022 from source files
dated 29 Jan 2022

88838088-e20d-51ca-8c91-69194f5ae678